

**NATIONAL ASSEMBLY OF
SEYCHELLES**

Tuesday 14th September, 2021

The Assembly met at 09am

National Anthem

Moment of Reflection

Mr Speaker is the Chair

MR SPEAKER

Bonzour tou Manm Onorab e bonzour nou telespektater e oditer fidel. Byenveni pour sa nouvo sesyon travay pour sa semenn.

Bon koman kominikasyon mon a zis donn en pti leksplikasyon lo *Order Paper*. Nou nou pou komans avek kestyon pour e sa i pou pran bomaten an antye. Lalis kestyon i sarze parey labitid.

Donk nonm kestyon siplemanter pou depan en pe lo letan ki nou annan anmezir nou ale.

Apard bann kestyon regilye en *PNQ*, kestyon ki'n ganny *submit*, mon annan osi en *Urgent Question* sorti kot Onorab Gill, en Kestyon san *Notice* sorti kot Onorab Sophola.

Lo nou biznes mon annan osi 2 *matter of privilege*. Enn

sorti kot Onorab *Leader* Lopoziyon, lot kot Onorab *Leader* Biznes Gouvernman.

Mon pou pran tou lede demen *matin*. E sa se aköz mon le mon le donn mon *ruling* an menm tan ki mon pran lot *matter of privilege* pou fer li pli efikas. Fer nou en lekonomi letan.

Apard sa nou annan Mosyon. Lo Mosyon nou pou pran Mosyon Onorab Esparon apre midi, e Mosyon lo *Supplementary Budget* demen.

E sa i tou senpleman an konsiderasyon avek mon kalkilasyon. Dapre letan ki sa bann *item* i kapab pran nou. *I could be wrong*, me sa i mannyer mon pe mazin li.

Tre byen. Sa i kominikasyon. *Oh!* Dan konteks kominikasyon mon a donn laparol, briyevman Onorab Wavel Woodcock. An relasyon avek enn bann papye ki pe ganny prezante zis apre. Onorab Woodcock ou kapab adrese.

HON WAVEL WOODCOCK

Mersi Mr Speaker. Bonzour tou Manm e tou dimoun a lekout. Mr Speaker i fer dezyenm deba dan listwar Lasanble ki ganny organize par Komite Medya Lazenés e Kiltir, *MYCC* kot *precinct* Lasanble.

E ozordi MYCC i prezant rapor lo sa deba, ki ti ganny fer a lokazyon *World Press Freedom Day*. Tenm deba ti lenformasyon *as a public good*.

E ozordi koman Chairman sa Komite, mon anvi profit sa lokazyon pou remersye tou Manm, Komite MYCC ki ti partisip dan sa deba, enkli Deputy Speaker ki ti enn nou Manm lo *panel*.

Mon osi anvi remersi sekreter nou Komite Ms Elna Etienne e son asistan Ms Samia Lebon ki'n ede organiz sa deba. Mon pou osi profit sa lokazyon pou remersye tou bann *Media Houses*, radyo, televizyon ek zournal ki'n partisipe parey SBC, Télésesel, Nasyon, *TODAY* lezot ankor.

E osi tou bann *stakeholders* ki annan lentere dan medya. Sirtou dan laliberte lapres. Nou ti annan partisipasyon *Media Commission*, *Ombudsman Mrs Tirant-Ghérardi*, *Human Rights Commission* ki ti ganny prezante par Ziz Renaud, *Board SBC*, Komite Anti-Koripsyon ki ti ganny prezante par CEO, Mrs May De Silva e lezot partener dan sekter, partener dan sa sekter, dan Sekter Medya.

Deba ti konsantre lo tenm ... Parey mon'n dir lenformasyon pou byennet

piblik. E lenformasyon pou byennet, e lanfaz ti ganny met lo lenformasyon pou byennet piblik olye lo pou *empower* piblik, olye ki bann lenformasyon ki destriktif.

I enportan ki bann lenformasyon ki sorti i bann lenformasyon ki batir nou sosyete. E i enportan osi ki bann lenformasyon ki al dan piblik i konkret. I pa *misleading* e i pa bann fo lenformasyon ki i annan bann lenpak negativ lo nou sosyete.

Dan sa deba plizyer lezot keksoz in ganny touse, parey *capacity building* bann zournalis. *Training* pou bann zournalis ki zot kapab deservi zot responsabilite dan en fason ki transparan, ki byen. E nou'n osi tous lo - dan sa deba ti osi tous lo lenpak rezo sosyal lo lasosyete ozordi, e son plas dan nou sosyete modern.

E deba osi in ankouraz, plis. E in ganny fer resorti ki i annan lenportans, ki annan plis deba, bann deba e bann analiz konstruktif. Parey mon'n dir lanfaz osi in ganny met lo laliberte lapres, ki enportan dan en demokrasi modern.

E finalman Mr Speaker de rekomandasyon byen for ki ti ganny fer resorti, se lenportans bann zournalis pou verifeye kredibilite bann lenformasyon

avan ki zot prezant dan domenn piblik.

E finalman lot rekomandasyon enportan ki ti ganny fer sorti. Se ki i enportan pou annan plis enteraksyon parmi tou bann *stakeholders* enkli avek, bann *stakeholders* dan sa sekter - Sekter Medya e osi avek nou Lasanble Nasyonal.

Avek sa de mo Mr Speaker, mon prezant sa rapor avek ou. Mersi bokou.

MR SPEAKER

Mersi Onorab Woodcock. E mersi pou zot travay. Madanm Clerk mon ava apel ou pou Prezantasyon Dokiman *please*.

MADAM CLERK

Mersi Mr Speaker. Bonzour Mr Speaker, bonzour tou bann Manm e tou dimoun ki a lekout. Bann papye ki pe ganny prezante bomaten: -

World Press Freedom Day Debate, 2021 Activity Summary Report - by The Media, Youth & Culture Committee and

S.I.75 of 2021 - The Mental Health Care Health Tribunal (Rules and Procedure) Regulations, 2021. Mersi Mr Speaker.

MR SPEAKER

Mersi Madanm Clerk. Mon a demann ou fer *First Reading* sa *Public Bill*.

MADAM CLERK

Mersi Mr Speaker. *This Act may be cited as the Anti-Corruption (Amendment) (No.2) Act, 2021.* Mersi Mr Speaker.

MR SPEAKER

Mersi. Nou a pas lo *Private Notice Question*. Mon a demann Madanm *reporter* pou apel Minis, pour Lapes e Lekonomi Ble.

Bon bonzour Minis Jean-Francois Ferrari Minis pou Lapes e Lekonomi Ble. E bonzour osi Mr Radley Weber *Chairman Board SFA* e Mr Nichol Elizabeth *Chief Executive Officer SFA*.

Mersi pou zot partisipasyon bomaten e mon ava apel *Leader* Lopozisyon pou prezant son kestasyon.

HON SEBASTIEN PILLAY

Mersi Mr Speaker bonzour Mr Speaker. Bonzour tou koleg Onorab. Bonzour Minis Mr Weber e Mr Elizabeth.

Byenveni dan Lasanble Nasyonal e bonzour tou dimoun ki a lekout. Mr Speaker mon *PNQ* i lir koumsa: -

In annan konsern ki plizyer *staff* kot *SFA* pe

demisyonnen dan zot fonksyon. Prenon kont lenportans SFA pou lekonomi pei: -

Eski Minis i kapab donn detay nou Lasanble lo ki sityasyon *staffing* kot SFA e konbyen *staff* ziska la in met zot demisyon?

Ki lenpak ki sa bann demisyon pou annan lo fonksyonman e loperasyon SFA?

MR SPEAKER

Mersi Onorab Pillay. Minis ou larepons silvouple.

MINISTER JEAN-FRANCOIS FERRARI

Mersi Mr Speaker. Mersi, pou ou kestyon Onorab Pillay. Bonzour tou dimoun e tou dimoun ki a lekout. Mr Speaker, lo kestyon Onorab *Leader* Lopozisyon. Malerezman napa ni en dat pou mwan fer referans avek. SFA i egziste depi pres ki 40an.

Alors mon ti a kontan konnen si Onorab Pillay pe demann mwan pou retourn 40an an aryer, pou mwan dir li ki kantite dimoun ki'n met zot demisyon aköz i, *opened-ended*.

So kekfwa i devret presiz. Ki peryod i pe demann mwan sa bann kestyon? Mersi.

MR SPEAKER

Onorab Pillay oule fer en presizyon? Mwan mon ti a sipoze i depi ler ki Minis in pran fonksyon koman, soz. Onorab Pillay ou a konfirm sa?

HON SEBASTIEN PILLAY

Mersi, mersi Mr Speaker. Mr Speaker efektivman mon pe demann Minis sa kestyon, aköz mon pa kapab demann li, en kestyon lo ler li i pa ti Minis aköz i pa kapab reponn. Mon pe demann li en kestyon ler li in pran fonksyon koman Minis koman Minis pou Lekonomi Ble e pour Lapes. Mersi Mr Speaker.

MR SPEAKER

Tre byen. Minis.

MINISTER JEAN-FRANCOIS FERRARI

Mersi Mr Speaker. Alors avek ou permisyon Mr Speaker, mon ava reponn pou sa 10mwan, ki mon dan Minister Lapes i annan 14 travayer ki'n met zot demisyon pandan sa peryod. Mersi Mr Speaker.

MR SPEAKER

Minis.

MINISTER JEAN-FRANCOIS FERRARI

Wi dezyenm, dezyenm kestyon Mr Speaker. Ki lenpak ki sa

bann demisyon pou annan lo fonksyonman e loperasyon SFA?

Onnetman Onorab, mon pa pe prevwar okenn lenpak negativ. SFA i en lenstitisyon, kot pandan plizyer lannen in atas bokou lenportans avek *training* pou son bann *staff*. In fer sa avek bokou zefor, pou fer sir ki son bann *staff*, i byen ekiye pou delivre lo zot travay a tou moman.

I osi vre ki dan sa bann dernyen lannen apard sa ki mon kapab apel en nespes dezord zeneral kot SFA, kot 4 CEO, (ti annan 4 CEO dan 5an) mon ti dekouver en sityasyon ki ase difisil ler mon ti arive.

E la ansanm avek *management*, nou ti met 2 target pou nou lorganizasyon.

Enn;- anmenn stabilite e direksyon dan enn lenstitisyon ki mon krwar bokou dimoun i ava dakor ki ti pe drive, pandan tro bokou letan.

E dezyenman, met bon servis e lefikasite dan sa lenstitisyon pou benefis tou bann kliyan, ki esansyelman bann peser e nou propriyeter ki Gouvernman Sesel.

Pour bann anplwayer SFA, mon'n toultan dir zot ki mon anv'i vwar zot pe progrese, pe anvol pli o, pli lwen e fer plis progre e meyer louvraz, e meyer

loportinite. Alors ler en travayer i anv'i bouze, mon felisit li, mon dir li mersi, e mon swet li bonn sans.

Ler ou pran par egzantp en dimoun parey Mr Vincent Lucas en manm *staff* sinyor ki'n fer nou konnen ki anv'i ale, apre 24 lannen dan servis kot SFA, byensir nou pou mank li, nou pou mank son leksperyans. Me lavi i bezwen kontinyen.

Parey mwan, ler mon pou ale, SFA pa pou disparet, lapli pa pou aret tonbe. Ler i neserer Onorab, tou travayer SFA i vin ansanm. Bann zenn profesyonnel i zwenn nou tim, nou pous dan menm direksyon e pour sa mon remersye zot, e mon felisit zot.

Finalman Onorab mon pa konnen si pou ankoler, oubyen ou pou dezapwente, ler mon pou anons ou, ki 14 pozisyon ki ti *vacant*, in fini ganny ranpli par bann nouvo travayer, apre ki prosedir *interview* in konplete.

I annan bann pozisyon ki pa ankor ganny ranpli e ki pe ganny *advertise*, byento. Menm aktyelman i annan bann pozisyon ki pe ganny *advertise*, pou rod bann kandida ki apropriye e ki lo nivo pli o posib pou sa bann ranplasman.

Vwala, mon krwar mon'n reponn byen sa kestyon. Mersi Mr Speaker.

MR SPEAKER

Mersi alors Minis. Minis mon pou rebran en pti pwen dan kestyon *Leader* Lopozisyon. E dan son lentrodiksyon i dir, plizyer *staff* SFA ki pe demisyonnen, eski i annan en sityasyon kot SFA la, kot i annan en mouvman kot en kantite *staff* pe demisyonnen, ki i kapab en konsern?

MINISTER JEAN-FRANCOIS FERRARI

Non Mr Speaker. I annan, i annan *staff* ki annan bann, bann rotasyon normal ki bann *staff* i-i ale e bann lezot ki vini. I annan pandan, pandan sa bann dernyen mwan kekfwa in annan en *manager* ki'n ale ki dan IT, pour bann aköz in ganny ofer en pli bon travay.

In annan en lot *manager* ki ti ganny segonde avek SFA kot mon Minister e in deside pou demisyonnen.

E kekfwa se sa, aköz in annan en de sa bann travayer en pe o *profile*, ki'n deside pou zot arete e sa i zot swa. I napa nanryen ki ekstraordiner ki dan lafason ki keksoz pe deroule. Mersi.

MR SPEAKER

Mersi Minis. Nou a kontinyen avek kestyon siplemanter. Onorab Pillay.

HON SEBASTIEN PILLAY

Mersi Mr, Mr Speaker. 14 *staff* e bann e bann *managers* tre kalifye i deside pou ale kit en lorganizasyon. Minis pa vwar nanryen mal ek sa. Mon pa kapab dir nanryen lo la. Me sa ki mon bezwen demann Minis se, ki bann kondisyon ki pe kree kot SFA, ki pe fer ki sa bann dimoun pe ale?

Akoz i annan la deor, Minis plizyer alegasyon. Par egzantp i annan alegasyon ki ou annan konpannyen sekirite ki'n ganny sekirite, me ki napa *tender*. E ki aparaman sa konpannyen pe ganny loportinite pou fer sa louvraz, aköz zisteman i annan pou fer avek *incriminate United Seychelles* dan sityasyon met bonm.

I annan rapor par lezot *staff* ki annan *doctoring of* bann lenformasyon ki sipoze ganny donnen, vizavi bann lapès bann bato Espanyol.

I annan rapor vizavi lafason ki serten aktivite pe pase dan SFA, so Minis ou pe dir nou tou keksoz i *ok* kot SFA. Be nou, nou pe tann diferaman. E i nou louvraz pou met sa

bann konsern devan. E i annan lezot *MNA*, enkli *MNA* lo ou kote latab ki'n ganny aprozé par plizyer dimoun.

E, fotespere ozordi zot annan kouraz pou zot met zot pwen devan, lo bann konsern ki bann dimoun pe anmenn devan zot, lo - Minis pou ankor enn fwa mon demann ou,

Eski ou pe dir ek sa Lasanble ki sityasyon ek kondisyon travay kot *SFA* i parfe, e ki rezon ki sa bann dimoun pe ale i aköz sa bann dimoun in anvi ale. E non pa aköz serten lapros ki pe ganny pran par ou Minister e sityasyon ki egziste dan *SFA*? Mersi Mr Speaker.

MR SPEAKER

Mersi Onorab Pillay. Onorab Pillay ou bann kestyon i al for lo alegasyon. E mwan mon krwar dan nou *Standing Orders* i annan en direksyon, ki kestyon pa devre ganny baze lo alegasyon ki pa byen fonde.

Be selman –

(Off-mic)

MR SPEAKER

Non, non! Mon pou permet Minis adres li mannyer i kapab zis avek sa remark. Wi Minis.

MR SPEAKER

Onorab. En *point of order*. Wi ok. Ale, mon a donn ou laparol.

HON GERVAIS HENRIE

Mr Speaker zisteman, pwen ki ou'n fer, *Order 35(c)* i dir “*a question shall not contain statements which the Member, who asks the question is not prepared to substantiate.*”

E *Leader* Lopozisyon in fer sa toultan i anmenn en bann alegasyon ki zis pe kree en latmosfer ki i pa pare pou li donn legzanp konkret, e fe dan sa Lasanble! Aköz i ede, pou Lasanble Nasyonal propaz rimer dan nou pei. E sa i malere. Mersi Mr Speaker.

(APPLAUSE)

MR SPEAKER

Mersi. Mon'n pran ou pwen. Mon, selman mon pou les Minis *deal* avek sa, i a fer referans avek sa ki i konsider i zis alegasyon, ki pa byen fonde. E si i annan pwen valab ladan i a kapab adrese. Minis.

MINISTER JEAN-FRANCOIS FERRARI

Mersi Mr Speaker. Mr Speaker mon krwar ou'n reponn dan, sa ki mon ti pe mazine. Mon pa'n vin isi pou mwan reponn okenn

alegasyon, e mon refize reponn alegasyon!

Mwan mon pare pou mwan reponn bann kestyon baze lo bann fe. E Onorab *Leader* Lopozisyon in dir poudir fotespere i annan dimoun i annan kouraz pou dir sa ki zot anvi.

Me mon ti a kontan ki Onorab Pillay li osi, i montre nou pou dir i annan en pe kouraz. I pa vin zis ek alegasyon, dan sa Lasanble.

Mon dezyenm pwen Mr Speaker, mon pa pe reponn non pli lo sekirite. Mon pa'n ganny, mon pa'n ganny en kestyon, pou mwan vin dan Lasanble lo kestyon sekirite.

Parkont, parkont Mr Speaker mwan mon ava dir ki napa okenn sityasyon ki perfe. I annan toultan bann sityasyon ki *fluid*, ki sanze toulezour.

Nou dan en peryod, dan lavi nou Nasyon kot i annan bokou sanzman ki pe pran plas. E sanzman i toultan difisil, sanzman i toultan deranz nou dan nou *comfort zone*. Sanzman i toultan anmenn bann sityasyon ki nou pa tro abitye avek. Me sanzman i la, e sanzman in arive.

Alors nou pou bezwen viv avek sa bann sanzman. E ler nou fer - ler nou pe, mon pe travay dan en fason pros avek

SFA, mon realize pou dir pa tou keksoz ki mars parfetman parey en, en pti robot.

I annan, nou annan en nouvo *Board*, ki'n pran son responsabilite pli boner sa lannen. E mon ti a kontan remersye Mr Radley Weber, *Chairman* ki'n avek son manm, bann manm *Board* ki fer en travay ekstraordiner, dan zot letan ki zot donner pou fer sa lorganizasyon marse.

Nou annan en *CEO* ki'n zwenn lorganizasyon an Septanm lannen pase Mr Elizabeth. Avan ki mwan, mon menm mwan mon arive Mr Elizabeth ti la. E li i sorti dan sekter prive.

E normalman ler ou sorti dan Sekter Prive, ou ariv dan Gouvernman i annan bann diferan metod travay. E pa tou keksoz ki aplikab, pa tou keksoz ki marse. Me nou, nou bezwen *fine-tune as we go along*.

Nou'n erit Mr Speaker, e mon krwar ki si Lopozisyon ti annan en pe, en pe *decency* zot ti a aksepte ki mannyer zot in kit sa lorganizasyon, anpyang. E dan en fason ki pa ti pe fonksyonn parey i devret. Nou, nou pe met bann keksoz e an plas. E mon ava dir ou ki nou'n fer enormeman sikse-enormeman sikse.

I *mean* i pa sikse ki lo papye, ni lo televizyon. I lo sikse ki ler nou pe, nou pe deplase nou vwar;- ki mannyer bann travayer, dan *SFA* in met lespri ansanm depi sa dernyen 10mwan pou zot delivre.

E kekfw la, avek ou permisyon Mr Speaker mon ava aret en pti moman. Mon ava demann *Leader* Lopozisyon, pou aplodi sa bann dimoun pou tou sa travay ki zot in fer dan distrik. Mersi.

MR SPEAKER

Nou pa pou.

MINISTER JEAN-FRANCOIS FERRARI

Ok si pa.

MR SPEAKER

Nou pa pou atann.

MINISTER JEAN-FRANCOIS FERRARI

Non, non! Mon pa ti ankor fini. Mon'n donn li a son moman pou li aplodi.

MR SPEAKER

Minis terminen silvouple.

MINISTER JEAN-FRANCOIS FERRARI

I pa'n aplodi, i pa'n aplodi. I pa'n aplodi alors mon ava, mon ava zis dir sa;-

Mr Speaker, Mr Speaker. *SFA* i en lorganizasyon ki, ki pe ankouraz son bann travayer pou fer *training*, ankouraz son bann travayer pou partisip dan bann, dan bann seminar, dan bann rankont pou devlop, pou devlopman personnel.

Nou fer en kantite sa bann, sa bann keksoz. E nou bann travayer se bann travayer ki annan en kantite pou zot donner e nou valoriz zot travay.

Alors dan 218 - 216 travayer en lorganizasyon *SFA* i annan 216 travayer an se moman. Pli boner sa lannen i ti annan plis ki 220. Dan 216 travayer, si annan 16 travayer, oubyen 14 travayer ki decide pou zot bouze, mon pa krwar ki nou devret fer en sityasyon dramatik ladan.

O kontrer, nou dan sityasyon kot keksoz pe evolue, pe bouze. E mon ti a kontan konmsi, ankouraz nou. Pa- eskiz mon parol Mr Speaker me pa, pa zis rod lipou, pa zis rod bann keksoz ki mal.

Aplodi, ankouraz sa bann dimoun ki pe, ki pe travay. Pa tou keksoz ki 100poursan byen, me selman pa rod zis sa ki mal.

Nou lorganizasyon i en lorganizasyon ki travay en kantite. E ki pe anmenn en kantite larzan dan kof Gouvernman Mr Speaker, zis

pou mwan dir ou. Pour lenformasyon Lasanble.

SFA in donn Gouvernman R25milyon an 2019 *ok*, an 2019. An 2020 50milyon, nou'n double, sa sonm. An 2021 nou'n, nou pou ariv 75milyon *ok*. Pou nou kapab fer antre dan kof Leta bann *license*, bann travay, bann keksoz ki nou fer, fer lefikasite, fer sir ki nou napa gaspiyaz. Sirman sa i montre ki keksoz pe mars deplizanpli byen.

Mwan mon pare pou mwan dir avek sa Lasanble, si i annan bann difikilte, si i annan bann *staff* ki annan bann konplent, laport i ouver, i annan *CEO*, i annan mwan menm mon Minis, i annan Chairman, i annan, i annan, nou annan en sistenm *HR* ki pe, ki pe ekout bann dimoun, i annan bann rankont ozordi menm.

Depi semenn pase avan nou ganny sa kestyon, nou ti'n plan bann rankont avek *management* pou nou, pou nou sey gete ki mannyer nou kapab fer avanse bann rekomandasyon ki zot menm zot, zot pe fer.

So nou pe travay, alors mwan mon ti a pli kontan ki dan en lespri fer nou pei bouz devan annou ankouraz kot i

byen. E annou pa zis rod bann keksoz ki mal. Mersi.

MR SPEAKER

Mersi Minis. Ou annan siplemanter Onorab Pillay ankor?

HON SEBASTIEN PILLAY

Mersi Mr Speaker. Mr Speaker mon pa pou al dan okenn *polemic*, zis mon bezwen adres serten pti komanter ki'n ganny fer.

Premyerman i mon louvraz pou rod leklersisman e lenformasyon. Sa i rol ki pep Seselwa in donn mwan e ki mon pou sey zwe li avek tou, tou mon abilite e tou mon senserite.

Dezyenmman Mr Speaker mon le met, lo rikord ki mon le proteste lafason ki Minis Ferrari pe tret Lasanble. Mon ankor enn fwa pa pe fer li dan kankan me selman, mon bezwen dir poudir. Wi, i kler poudir Manm nou bezwen regard bann keksoz ki nou met devan.

E Minis si i annan lenformasyon i donn nou, si i dir nou i napa lenformasyon i napa, si i dir nou sa i zis alegasyon i dir nou. Be en Minis ...

MR SPEAKER

Ale. Prosed lo ou kestyon. Onorab Pillay.

HON SEBASTIEN PILLAY

En Minis i bezwen kapab dir mwan par egzanp. Si en konpanyen sekirite in annan en *tender*.

MR SPEAKER

.. i kapab

HON SEBASTIEN PILLAY

En Minis i kapab, i bezwen kapab dir ek mwan, par egzanp ...

MR SPEAKER

Onorab Pillay.

HON SEBASTIEN PILLAY

... napa nanryen pou li ankoler, pou li vin rouz dan Lasanble Mr Speaker.

MR SPEAKER

Ase. Wi be selman ase fer leson Minis e prosed lo ou kestyon silvouple.

HON SEBASTIEN PILLAY

Mr Speaker i pa mon lentansyon pou fer leson Minis. I akoz ou ,...

MR SPEAKER

Wi be prose ...

HON SEBASTIEN PILLAY

Mr Speaker avek tou respe,

MR SPEAKER

Back to the question ...

HON SEBASTIEN PILLAY

Ou konnen-ou konnen akoz mon pe al dan sa direksyon? Akoz Minis,

MR SPEAKER

Yes.

HON SEBASTIEN PILLAY

Minis dan sa Lasanble, Minis pa pe dir laverite sa Lasanble! Minis pa pe dir laverite sa Lasanble.

E kestyon ki mon annan pou Minis, *ok*, mon a demann Minis en kestyon final.

MR SPEAKER

Ale kestyon. Wi.

HON SEBASTIEN PILLAY

Kestyon final ki mon annan. Se eski ler *staff* i vin kot ou Minis, ou tret konplent sa bann *staff* avek konfidansyalite?

Ou Minis Ferrari ki'n asize lo sa kote latab, ou'n koz lo konfidansyalite ki ozordi, mon vwar ou vin - *Sorry* pou servi sa term "anbaras ou Gouvernman," pou vin koz- pou vin *mislead* sa Lasanble. Eski ou, ou tret konplent sa bann *staff* avek konfidansyalite? Mersi Mr Speaker.

MR SPEAKER

Mersi. Minis silvouple annou pa al lo sa bann lezot pwen, zis reponn si ou tret sa parey konfidansyalite. E nou a termin lo la. Mersi.

MINISTER JEAN-FRANCOIS FERRARI

Mr Speaker ou konnen Onorab *Leader* Lopozisyon pou dezapwente ler mon pour dir li ki mon tret, tou konversasyon ki mon annan avek mon *staff* avek tou konfidansyalite.

Si i annan lenformasyon, si i annan en sityasyon ki devret ganny mete, devan *SFA* i mon devwar pou mwan met devan. Me, an respektan tou bann lareg konfidansyalite. Mersi bokou.

MR SPEAKER

Mersi Onorab Romain. Nou a pran enn de kestyon siplemanter sorti kot lezot Manm.

HON GEORGE ROMAIN

Mersi Mr Speaker. Bonzour Mr Speaker, bonzour Minis avek ou lekip. Bonzour tou dimoun ki a lekout, bonzour tou bann koleg Onorab.

Minis mon'n asize mon'n ekout ou lo sa size *SFA*. Ou'n dir ki 14 *staff* in kite pandan sa 10mwan. Pour mwan 14 *staff* i

bokou, e pou mwan mon ti annan 2 kestyon pou mwan demann ou Minis, Minis eski ou kapab klarifye si *exit interview* in ganny fer avek sa bann *staff* ki'n kite e ki lakoz prensipal ki ganny donner pou sa bann demisyon?

Mon dezyenm kestyon Mr Speaker, Minis, si wi, baze lo rezilta *exit interview* eski ou kapab dir nou, si in annan okenn mezir ki'n ganny pran pou adres bann problem ki annan ki'n ganny souleve?

E si zot pa'n fer, *exit interview* eski zot pe konsidere pou fer enn dan lavenir? Mersi Mr Speaker.

MR SPEAKER

Mersi Onorab Romain. Minis.

MINISTER JEAN-FRANCOIS FERRARI

Mersi Mr Speaker. Mr Speaker. Mersi Onorab Romain pou ou kestyon. Mon krwar i enportan a sa pwen la, pou mwan donn enn de, enn de detay aköz ou'n, ou'n sizere ki 14 travayer i en kantite travayer.

Alors les mon dir ou, nou'n resevwar 14 demisyon. Ladan i annan ki rezon personnel, e i annan 4 *junior staff* ki dan sa kategori, e i annan 2 *managers* ki dan sa kategori. Bann rezon personnel

ok? Sa i enkli enn *manager* ki ti ganny segonde kot Minister Lapes. *Ok?* I ti pe travay avek mwan, *ok* e li in deside pou li demisyonnen, pou son rezon personnel.

Rezon disipliner, in annan en travayer ki'n ganny demande pou demisyonnen akoz absante dan travay pou plis ki 3 zour. In annan bann ki'n fer bann aktivite en pe *fraudulent*.

In annan, (mon krwar se sa ki Onorab Pillay ti pe fer referans avek) kot lenformasyon ki sipoze antre lo bann data *SFA* pa'n, ki'n ganny manipile. E nou'n ganny laprev ki zot in ganny manipile.

Donk, e sa travayer in bezwen ganny mete devan, devan sityasyon. E se la kot nou'n ganny bann demisyon.

Alor sa mon pe donn zot bann legzanp. Selman mon pa anvi, mon pa krwar i apropiye ozordi, isi pou nou penn en portre ki kapab sali repitasyon sa bann bon travayer, ki pe travay dan lorganizasyon.

I annan en kantite e gran mazorite. Ou ava dir mwan i annan en bon diferans ant 200 ek 14. Donk mazorite nou travayer i onnet e zot travay vremen byen. I annan bann ki'n ale akoz zot in ganny ofer *sport*, labours aletranze. I annan ki

nou'n anvoye, nou annan 3 la nou pe al anvoy lo *training* eksetera.

E donk, les mon a dir ou prezan lo bann prosedir. I annan en Komite Disipliner kot *SFA*, ki ganny konsiste par 7 *managers*. Se zot ki fer bann *hearings*. E se zot ki ekout konplent zot bann koleg.

E ki ekout konplent *management*, e ki ekout konplent *HR*, si in annan en *breach of work ethics*. Donk i annan en prosedir. Tou travayer ki termin zot lanplwa avek *SFA* i en *standard procedure* pou annan en *exit interview*.

E mon kapab dir ou ki tou, ekspekte enn ki mon okouran, ki mon okouran en travayer ki'n refize *attend* en *meeting* pou fer en *exit interview*. Sa se son swa pou li.

Donk travayer i ganny trete dapre Lalwa Lanplwa. Nou aplik tou bann *rules* e *HR* e nou fer sir ki, i annan ekite, i annan lazistis dan tou bann desizyon.

So mon fotespere ou'n kapab, ou'n kapab reasire avek sa repons ki mon'n donn ou. Mersi.

MR SPEAKER

Mersi. Mersi Onorab Romain. Ou pou rod klarifikasyon, akoz

nou bezwen kontinyen avek lezot Manm. Wi Onorab Romain?

(Off-mic)

HON GEORGE ROMAIN

Mersi, mersi Mr Speaker. Mersi Minis pou larepons en pe ase detaye. Me selman Minis pou mwan, mon santi parey sa bann dimoun, parey kekfwa enn de *staff* kekfwa mon'n tann ou ou'n dir in fer, kekfwa in fer en de frod, enn de keksoz.

Alors i annan lenvestigasyon pe ganny fer, mon prezimen. E si sa dimoun i definitivman i *guilty* mon krwar sanksyon i bezwen ganny pran kont li.

Be selman Minis pou mwan lo kote sa kestyon *interview*, *exit interview*. Mon santi sa kekfwa i a benefisyè SFA dan en fason ki si vreman i annan en problem ozordi dan SFA, ler zot fer sa *interview* byensir, mon konnen ou dir kekfwa i pe ganny fer, ki zot a kapab rezourd sa problem. E mwan sa mon ti ava kontan eklersi ankor enn fwa Mr Speaker. Mersi Mr Speaker.

MR SPEAKER

Mersi Onorab.

MINISTER JEAN-FRANCOIS FERRARI

Mersi Onorab.

HON SANDY ARISSOL

Avan ou donn Minis laparol. I annan en problem son mon pa krwar ...

(Off-mic)

MR SPEAKER

E byen. Mon sipoze sa i en problem teknik ki nou *staff* an deor. Madanm Clerk ou kapab pran note sa problem. E si i annan posibilite ki nou bezwen *adjourn* en pti moman, pour en *technical staff attend to* sa, nou a fer li en.

Ou a regarde apre ou a sinyal mwan. Minis ou annan pwen pou adrese lo sa ki Onorab Romain in fer. Annou sey prosede silvouple.

MINISTER JEAN-FRANCOIS FERRARI

Non, non mon ti a zis kontan remersye Onorab Romain pou son lentervansyon. E pour son bann konsey ki'n donn nou. E mon ti a kontan reasir li pou dir bann prosedir i an plas.

SFA i en lorganizasyon piblik, ki bezwen respekte bann regilasyon ki mannyer bann, bann relasyon dan travay i ete.

E mon kapab dir ki, si ti annan bann move pratik, nou ti ava annan bann ka ki'n al kot, kot Lanplwa oubyen kot en Linyon Travayer.

Be nou pa pe gannyen sa kekfwa nou ava gannyen a lavenir, nou ava *deal* avek. Me selman rebran konfyans Onorab ki, nou pe fer nou mye pou nou fer sir ki, tou travayer i ganny trete avek respe, e zot ganny valorize. Mersi.

MR SPEAKER

Mersi. Lo pwen Onorab Arissol. Sa ki pou arive se ki *recording*, i pa pou tro bon. Me selman dan mon leksperyans bann keksoz ki ganny dir dan lasal i antre dan *recording* kantmenm i pa kler. I pa soz, so nou kapab kontinyen. Onorab Bistoquet.

HON ROSIE BISTOQUET

Mersi Mr Speaker. Bonzour Mr Speaker. Bonzour Minis avek ou delegasyon. Bonzour tou Onorab. Mr Speaker avan ler mon komanse, mon ti a kontan swet bonn aniverser enn bann bisantener dan Pointe La Rue. Mrs Aline Adela ki ozordi i fet son 101an le 14 Septanm.

Bonn aniverser madanm Adela.

(APPLAUSE)

HON ROSIE BISTOQUET

Minis vi ki ou'n dir ki ou lamazorite dimoun in ganny *recruit*, 14 an tou, ki'n ganny employe.

Eski Minis i kapab dir nou si sa bann *new recruits* in osi ede vitman pou kontiny loperasyon SFA san problem? Mersi.

MR SPEAKER

Mersi Onorab. Minis.

MINISTER JEAN-FRANCOIS FERRARI

Mersi Onorab. Onorab parey mon'n dir pli boner, SFA i annan en lekip ki ase dinamik e zot parey nou dir zot, *multi-skilled*.

E nou kapab ase fasilman bouz bann travayer *from one* Departman *to, to* en lot. I vre ki'n annan, i annan enn de departman. De ki mon pe mazine la ki *understaffed*, e sa in *understaffed* depi plizyer lannen.

E nou'n travay bokou pou nou kapab *beef li up*, sa de Departman. E nou'n ganny en pe difikilte akoz pa tou, pa tou sa bann *skills* ki nou pe rode ki *available* lo marse. Lo marse lanplwa.

E nou en lorganizasyon parey mon kontan dir ki 100poursan Seselwa. *Is that*

correct, yes. Ki 100poursan Seselwa. Alors nou pe sey rod nou bann zenn kalifye pou fer zot antre.

Antretan nou pe, nou *re deployed internally* e nou, nou fer sir ki nou evite okenn sa bann *disruptions* ki kapab arive. Lo mon kote kot Minister Lapes mon annan bann dimoun ki'n *ex-SFA* ki tre, tre eksperyanse ki zot, zot pa'n zanmen ezite pou zot sot deor, e vin donn en koudmen ler i annan bann travay spesyalize pou fer. E ki sa i dan zot konpetans.

Alors mon pa santi ki, mon pa pe dir ki nou pa, nou parfe, parey mon'n dir pli boner. Me selman mon pa, mon pa krwar ki nou bezwen *worry* bokou. *SFA* i en lorganizasyon ki pe mars zeneralman, ki pe fonksyonn zeneralman dan en fason efikas. Me i annan ankor lespas pou nou, pou nou amelyore. Mersi.

MR SPEAKER

Mersi Minis. Onorab Cosgrow.

HON WALLACE COSGROW

Mersi Mr Speaker. Bonzour Mr Speaker. Bonzour Minis avek ou lekip. Minis tan ki *Chairman Board* pe akonpanyi ou ozordi, dan Lasanble.

Mon ti a kontan konn pozisyon nouvo *Board SFA* an relasyon avek sa sityasyon kot 14 *staff* in *resign*, dan lespri latransparans avek bonn gouvernans.

Eski *Board SFA* pe pran en lenterer spesyal ladan. E eski *Board SFA* pe vreman *dig deep into* sa sityasyon, pou gete ki vreman pe arive mal? Or si i annan keksoz mal ki pe arive?

E osi koman *Chairman Board* i la, mon ti a kontan konnen. Eski i annan par egzanp *Board members* ki pe enterfer direkteman dan loperasyon *SFA*, par egzanp dan bann proze, dan bann diferan keksoz ki *SFA* i fer ki sipoze, louvraz *CEO* avek bann lezot travayer.

E petet ki sa osi pe kapab ede pou fer *staff* fristre e ki zot vwar lenterferans e ki zot pe met zot demisyon. So, mersi bokou Mr Speaker.

MR SPEAKER

Mersi nou a sey lo pwen kestyon. Annou pa al tro lo pwen kestyon en. Annou pa al tro bann rol bann lezot manm *SFA, Board*.

Minis ou le pran laparol? Oubyen oule avan lo *Board? Chairman*, ale. Minis wi.

MINISTER JEAN-FRANCOIS FERRARI

Mr Speaker mon le pran laparol la. Pou mwan proteste, kont bann *statement* ki Onorab in fer. Akoz sa bann *statement* i kapab donn lenpresyon poudir i annan keksoz, ki pa-ki pa legal oubyen bann, bann lenfliyans ki pa normal ki pe arive, bann keksoz, bann manboulouk ki pe arive dan *SFA*.

E sa mon proteste fortman! Fortman e, an realite mon vreman ankoler. Akoz mwan mon anvi ki si, okenn dimoun i annan en laprev okenn keksoz, zot vin, zot anmenn swa kot Lapolis, swa kot i annan. Me zot pa servi Lasanble Nasyonal pou sizere ki annan keksoz ki mal! Sa i-sa i inakseptab Mr Speaker!

MR SPEAKER

Mersi.

MINISTER JEAN-FRANCOIS FERRARI

Donk mon, avek ou permisyon mon ava, mon ava aret la akoz. Mon pa kontan sa, mon pa krwar poudir i fer zistis lo nou lorganizasyon. Mersi.

MR SPEAKER

Mon a fer en pti komanter. Lasanble Nasyonal, i kapab

ganny servi pou li egzamin lezot pwen.

Me selman sa i *Question Time* lo en kestyon spesifik. Alor annou reste lo sa kestyon silvouple. Onorab Cosgrow, ou'n demann en kestyon, mon a les *Board*, *Chairman* eksplik pwen lo si *Board* in enplike lo demisyon sa 14 *staff*.

Board, Mr *Chairman*, *yes sir* ou le klarifye? Wi. Ale wi.

HON WALLACE COSGROW

Mr Speaker wi. Mersi bokou.

MR SPEAKER

Selman ou pa pe al antre dan en deba avek Minis.

HON WALLACE COSGROW

Non-non-non-non!

MR SPEAKER

Al lo ou kestyon.

HON WALLACE COSGROW

Non, wi. Mr Speaker non, mon ti anvi zis klarifye. Mon pa ti pe demande si *Board* in enplike mwan.

MR SPEAKER

Ok. Klarifye ou kestyon.

HON WALLACE COSGROW

Mon ti pe dir si *Board* i annan en, in pran en lenterere spesyal, pou *dig* en pti pe pli *deep*, pli

profon pou vwar si i annan okenn *issues* ki pe arive, ki pe fer bann dimoun *resign*?

Akoz apre tou *Board* i annan sa rol *oversight* lo sa lorganizasyon. Se sa ki mon ti anvi konnen. Apre mon pa ti anvi fer Minis ankoler mwan. Eskiz mwan.

MR SPEAKER

Mersi *Chairman*. *Chairman* lo size demisyon *staff silvouple*.

CHAIRMAN BOARD SFA RADLEY WEBER

Ok Mr Chairman. Mon a sey reponn sa kestyon dan en manner, petet pa vreman fasil. Akoz koman zot konnen sa *Board*, nouvo *Board* in ganny formen an Fevriye sa lannen.

E nou annan 9 Manm *Board*. E nou'n, Minis in sey met bann manm *Board* ki annan en pe leksperyans dan sa biznes. E ladan i annan en manm *Board*, Mr Vidot ki'n la depi en bon pe letan e li osi i responsab pou tyek en pe bann proze.

Lo kestyon sa bann zans ki'n ganny demisyonnen. Nou ti diskite detrwa bann *managers*. Nou pa'n tyek bann non, bann vye bann *staff* ki *junior staff* aköz normalman sa i pas devan Departman konmsi *Human Resources* dan lorganizasyon.

Pou bann *senior managers* sa byensir nou tyeke aköz i depan osi ki zot in fer. Si zot in *involve* dan serten keksoz ki pa legal. Nou'n tyeke, nou'n egzaminen, nou'n fer en resers lo la, avan ler nou pran en desizyon.

An term, *sack* okenn dimoun, nou annan zis enn ki nou'n, *sack*. Akoz i ti *involve* dan en keksoz ki vreman pa legal. Leres i annan bann dimoun ki'n *resign*.

Sa bann ki'n *resign* in vin devan *CEO*, pou ki'n ganny prezante devan *Board* pou nou diskite pou gete pour ki rezon zot in *resign*. E serten, ler nou'n tyeke i annan serten keksoz ki pa byen.

Be selman nou pa'n aksepte son *resignation*, nou'n dir ti a bon i reget ladan. Be selman apre in dir non, i a pe *resign*. Alors se sa ki nou nou'n fer lo kestyon son *Board*.

MR SPEAKER

Sa ou'n terminen. Mersi *Chairman*. Onorab Esparon.

HON REGINA ESPARON

Mersi Mr Speaker. Mr Speaker mon ti ava anvi demann Minis an term *training* pou bann nouvo *recruits* la.

Bann dimoun ki'n fek ganny *recruits* dan limedya eski

i annan? E sa demisyon i dan diferan seksyon, oubyen i dan en sel seksyon? E eski i annan en odit ki'n ganny fer resaman lo *SFA*? Mersi.

MINISTER JEAN-FRANCOIS FERRARI

Mr Speaker.

MR SPEAKER

Nou pe al en pe an deor *scope* sa kestyon silvouple. Minis fer li bref *please*.

MINISTER JEAN-FRANCOIS FERRARI

Lo dernyen bout Onorab mon pa pou kapab reponn akoz, akoz mon pa'n prepare pou mwan anmenn kestyon lo odit. Lo kestyon *training, well* premyerman, lo dezyenm kestyon lo eski i annan depar dan en seksyon spesifik oubyen dan sa-? Non, napa nanryen ki spesifik e i *across the organization*. E i pa non pli spesifik *managers or middle managers*.

I *all across the spectrum*. Setadir *right down from* en *sampler*, sa bann dimoun ki al lo bato ki al *sample* bann kargezon ton. Ziska parey mon'n dir ziska anler o nivo *management*.

So i napa nanryen ekstraordiner. 10 mwan savedir

i fer en travayer par dan 200 travayer. Mon vreman-mon santi e ki sa sityasyon, in ganny monte par- e mon konnen. Mon bezwen proteste. In ganny mete dan zournal *The People*, depi semenn pase sa bann keksoz koumsa.

Ou a krwar konmsi zot pe sey mont en *Mickey* politik. Konmsi mon krwar i pa-i pa *fair* lo sa bann travayer ki pe donn zot kouraz, ki pe travay tre dir.

Alors mwan mon ti kontan dir ou ki nou annan plizyer *Scheme training*. Nou ankouraz nou travayer pou fer *training*. Nou'n pey pour bann *manager* pou ariv lo nivo par anba Doktora la, *Masters*, nou'n peye, nou'n donn zot letan. Nou fleksib avek zot letan travay pou zot kapab fer sa ki zot, sa ki zot bezwen fer.

I pa en, napa nanryen ki parfe, selman mwan mon ava dir zot en keksoz. Ant sa ki, ant sa ki nou'n erite, avek sa bann dimoun ki pe demann sa bann kestyon, ki pe rod problemm ozordi, e sa ki nou annan ozordi i en-i en losean diferans.

I annan en telman *improvement* ki'n ganny fer la e mwan si mon ti lot kote latab kekfw mon ti pou anbarase pou mwan demann sa bann kestyon. Akoz-akoz i annan

bokou, bokou progres ki'n ganny fer.

E nou pou kontinyen fer progres, *mistake* pou kontinyen arive Mr Speaker. Nou a travay lo la pou nou kontinyen *improve*. Mersi.

MR SPEAKER

Mersi Minis. Onorab Georges.

HON BERNARD GEORGES

Mersi Mr, mersi Mr Speaker. Bonzour Minis avek ou delegasyon. Minis mon krwar ki, tenner sa kestasyon bomaten, i si ou permet mwan, vize lo bann dimoun ki lo ou *panel* ozordi. E, osi ou ava permet mwan, mon kestasyon se eski ou annan okenn rezon pou ou annan okenn mefyans, lo swa *Board* swa *CEO*?

E mon kestasyon pli pertinan se eski *Board* ki reprezante la ozordi par *Chairman*, i annan okenn rezon pou zot pa krwar ki *CEO* pe perform son fonksyon dan lafason ki i devret pe fonksyonnen? Si ou ava permet mwan sa kestasyon Mr Speaker.

MR SPEAKER

Si Minis i kapab adres sa an term *staff* demisyonnen, se sa. Minis.

MINISTER JEAN-FRANCOIS FERRARI

Mersi Mr Speaker. Mr Speaker mwan mon'n pas plis ki 30an mon lavi pou mwan, rod en meyer Sesel, kot bann bon pratik i ganny met an plas.

E mwan mon'n viktim bann alegasyon. Se pour sa ki mon pa kontan ler alegasyon i ganny fer lo dimoun.

Alors mwan mon ti a kontan dir avek tou dimoun, si zot annan en sityasyon ki zot pa konfortab avek, si zot annan en laprev okenn keksoz, anmenn devan. Pa bezwen anmenn kot mwan kekfwa zot, zot mazin poudir mwan mon en, mon en politisyen, mon en politisyen, mon pou zwe politik avek.

Anmenn kot *Chairman Board*. Pou lemoman napa personn ki'n anmenn bann fe konkret, *ok*? I annan, ler mon ti antre dan Minister Lapes si, si mon ti'n ekout bann dimoun, mon ti pou'n, mon ti pou pous-mon ti pou'n pous tou travayer.

Enn i dir ou sa enn pa bon, lot i dir ou sa enn pa bon, lot i dir ou sa i koumsa, lot i dir ou- Mon'n sey travay avek tou dimoun *ok*? Pa tou dimoun ki'n reisi pou travay avek mwan. I annan enn de ki'n ale.

Me selman finalman nou annan en tim ki pa perfe parey mon dir ki nou pe avanse.

Mwan mon kapab dir, mon pa enterfer dan *day-to-day running SFA*. Mon les bann travayer fer zot travay, mon napa okenn, okenn laprev ki okenn keksoz mal in ganny fer.

Ler mon'n annan lo serten travayer, mon'n pas avek *CEO*, mon pas avek *Board ok?* Me pou lemoman mon krwar poudir nou pe avans dan en direksyon. I pa fasil, parey mon'n dir pli boner Mr Speaker sanzman i toultan difisil. E sakenn i anmenn son nouvo kalite fason fer e nou bezwen adapte avek.

Alors mon demann avek tou bann travayer kot *SFA*, pour kontinyen travay pou nou avans ver sa lobzektif ki nou anvi pou fer domenn lapes, monte dan Sesel.

Nou annan lespas pou nou fer li. E kekfw nou ava fer li bokou pli byen e bokou pli vit si nou konsantre lo nou travay, plito ki konsantre lo bann alegasyon ki serten in vin spesyalis pou zot fer.

Alors annou konsantre lo nou travay e annou bouz sa pei devan. Mersi.

MR SPEAKER

Mersi. Mon a pran dernyen kestyon Onorab Aglae.

HON EGBERT AGLAE

Mersi Mr Speaker. Bonzour Minis avek ou *panel*. Minis fas a sa, parey ou'n term li sa *SFA* anpyang ki ou ti zwenn. E parey in ganny dir osi dan lepase pei i en kales kase, me selman apre nou vwar nou pe sorti premye dan diferan nivo.

Mon ti a kontan demann ou Minis eski *SFA*, pe desarz son lobligasyon e responsabilite ki annan lokalman e osi avek bann lorganizasyon enternasyonal?

Dezyenmman Minis, fas a sa bann travayer ki'n kite. Eski ou'n pran kont kantite letan ki'n pran e resours pou *train*, (kot Gouvernman in depans larzan) pou *train* sa bann travayer pou ariv koz zot ete.

Eski sa pa pou annan en lenpak direk kot i konsern, sirtou rapor ki Sesel i bezwen soumet avek bann lorganizasyon enternasyonal?

Eski rapor pou vin dan en fason pli kredib, bann lenformasyon i ankor la. Esey donn nou en garanti Minis. Mersi.

MR SPEAKER

Mersi. Mon krwar nou pe *exhaust* konteni sa kestyon. Minis ou a donn ou repons silvouple.

MINISTER JEAN-FRANCOIS FERRARI

Wi. Mon ava donn en lankourazman Onorab pou mwan dir li ki nou annan konfyans ki nou pou kapab delivre lo sa travay.

Sak fwa e mon'n dir pli boner sak fwa ki, en travayer i ale, mon pa kontan mwan, nou, nou pa kontan nou. *CEO* pa kontan, *Chairman Board* pa kontan. Akoz ou, nou ti a kontan gard tou sa ki la e fer zot vin pli meyer.

Me selman lavi i koumsa, lavi, lavi i bouze, lavi i sanze e i annan dimoun, i annan dimoun ki ler mwan mon ti vini zot ti telman per zot ti tranble, zot ti tranble, pa kapab travay tranble ganny konze maladi.

E apre ler zot in dekouver mwan zot in kot mwan dir mwan, Minis nou pa ti konnen ou en dimoun ou aprosab, ou en dimoun ou, nou kapab koz avek ou. Akoz bann alegasyon.

Alors, i annan, i annan en sityasyon ki nou pe, ki nou pe, ki nou'n erite, ki mon santi ki i annan en kantite bon keksoz ladan. Nou, nou pou kontinyen donn *training*, nou kontinyen ankouraz nou travayer rekonpans zot byen.

E mon pa vwar drol ki napa okenn kestyon lo-lo lapey travayer kot *SFA*. Akoz e mon

konnen akoz napa kestyon lo la akoz i, lapey travayer kot *SFA* i zeneralman tre bon. E menm pli bon dan bokou lezot landrwa.

Donk nou *staff welfare* nou vreman fer li otan ki nou kapab. Selman mwan mon'n vin dan sa Minister, pou mwan fer marse en lendistri. E en lendistri i mars lo lefikasite, i mars lo travay dir, i mars lo dedikasyon e-e an konsyans pou nou travay pou nou pei.

Alors, wi, i annan serten keksoz ki mon'n sanze, i annan serten keksoz mon'n met, mon'n anvi vwar dan *SFA*. En *businesslike approach*, run li koman en biznes. Ler en peser i vini, i bezwen son kart peser ou pa kapab dir li ozordi Merkrede ou, ou pa fer ou fer zis dan Zedi, dan Lendi ou pa fer, be akoz.

Sa boug son louvraz zis i dan kannot, i la i bezwen kart peser i bezwen ale. Konmsi annou met nou dan sityasyon sa bann dimoun ki nou, ki nou bann kliyan.

E alors wi mon'n mete presyon, wi mon'n demann avek, avek *CEO* pou met presyon. Wi mon'n demann avek *Board* pour ki *Board* i rod plis lefikasite dan fason ki nou'n travay akoz nou bezwen delivre.

E mon bann zanmi, mon bann, mon bann ansyen koleg

nou pe delivre, ankouraz nou silvouple. Pa bezwen met nou anba, pa bezwen zet nou ater! Ankouraz nou. E nou ava delivre ankor li byen pou nou pei Sesel. Mersi.

MR SPEAKER

Mersi e nou pou termin la avek sa keston. Mon remersye Minis pour son partisipasyon. E mon remersye *Board Chairman*, ki mon krwar premye fwa, an nou resevwar li dan Lasanble an mon prezans, dan mon letan an tou ka.

E Mr Elisabeth *CEO, SFA*. Mersi bokou e bonn zournen. Wi. Mersi Minis.

(MINISTER FERRARI AND HIS DELEGATION WAS EXCUSED FROM THE HOUSE)

MR SPEAKER

Wi Onorab Pillay lo ki pwen?

HON SEBASTIEN PILLAY

Mersi Mr Speaker. Mr Speaker zis mon ti le met devan Lasanble ki, vi ki annan Manm ki bann diferan Manm dan zot distrik i annan bann fasilite *SFA*. Mon konnen La Retraite kot Onorab Romain i annan, e Bel Ombre kot Onorab Arissol i annan e bann Manm i deza bann Manm *FPAC*.

Mon pou met devan bann Manm *FPAC* pou nou konsider, nou ava gete ki Komite i decide, pou nou konsider regard en pti pe de pre, bann diferan eleman ki konsern zisteman sa bann fasilite. E bann lezot keksoz ki konsern *SFA* pour ki Lasanble i ava kapab al regard en pti pe.

Si bann Manm i agree, pou partisip ladan. Pou nou kapab regard en pti pe, kwa ki pe pase, avek *SFA*.

MR SPEAKER

Mersi. Tou mon lankourazman. Nou bezwen, kontinyen Onorab Arissol ou annan drwa fer en pti pwen vitman.

HON SANDY ARISSOL

Wi koman en Manm *FPAC*. Bonzour Mr Speaker, bonzour tou Manm. Nou annan, lo mon kontan ek sa ki Onorab Pillay pe dir koman Chair *FPAC*.

Selman i enportan pou note poudir lo nou *schedule FPAC* nou sitan annan travay, e i annan bann ki nou pa ankor pran.

Par egzanp later *US* ki Lepep pe espere pou nou pas lo la. Mon krwar i ava enportan pou nou...

(APPLAUSE)

HON SANDY ARISSOL

Get byen nou *schedule*, then nou a pran bann lezot keksoz ki'n vin la preski lafen lannen. Selman nou pare pou travay, napa problem. Mersi bokou.

MR SPEAKER

Tre byen. Madanm raporter ou ava apel Minis pou Lasante silvouple, pou nou bann kestyon.

Bonzour Minis Peggy Vidot Minis pour Lasante e delegasyon Dr Jude Gedeon, Komisyoner Lasante Piblik e Dr Danny Louange *CEO Health Care Agency*.

Mersi bokou pou vin dan Lasanble pou pran kestyon bann Manm. E mon konnen poudir zot en bann dimoun, en bann zofisyè ki ase souvan dan Lasanble. Nou a komans avek kestyon 73, Onorab Waven William. Onorab.

HON WAVEN WILLIAM

Mersi Mr Speaker. Bonzour Minis avek ou *panel*. Bonzour tou dimoun ki a lekout.

Mr Speaker kestyon ri *comme* swivan:

Eski Minis pou Lasante i kapab eksplik sa Lasanble lo zefor an plis ki son Minister pou fer an kolaborasyon ek lezot Lazans Gouvernman e sekter prive pou asire ki sitwayen, travayer etranze e viziter i

respekte bann mezir Lasante pou sofgard relansman nou lekonomi?

MR SPEAKER

Mersi Onorab. Minis repons silvouple.

MINISTER PEGGY VIDOT.

Mersi Mr Speaker. Mr Speaker, *Leader* Zafer Gouvernman, *Leader* Lopozisyon, Manm Lasanble Nasyonal, telespektater bonzour.

Mr Speaker *COVID-19* i en problem Nasyonal e zefor pou konbat sa fleo i bezwen osi Nasyonal.

Savedir tou sekter i bezwen montre zot langazman e kontinyen travay ansanm pou reisi dan sa lalit kont *COVID-19*.

Minister Lasante i responsab pou donn swen e tretman e pou diriz sa repoz kan i neser pou aranze fer sir ki *COVID-19* i ganny met anba kontrol.

An se moman sa pe pran en kantite ki nou resours. Nou osi rekonnèt ki prevansyon i kontinyen e i pou toultan primordyal pou nou aret sa pandemi.

Minister in fer bann regilasyon e donn bann gidans neser pou sofgard lasante piblik. In annan en gran travay ki'n ganny fer avek sekter piblik

e prive pou asire ki sa bann gid i ganny enplimante.

Minister Lasante in pran bokou letan pou donn formasyon bann pwen fokal dan tou bann Minister e bann lorganizasyon prive e piblik, pou prepar zot pou zot kapab enplimant zot bann gid lo lasante piblik.

Minister Lasante i toultan kontinyen donn sipor sa bann pwen fokal e sa bann lorganizasyon. In travay avek Minister Tourism e bann lazans dan sa lendistri pou ki letablisman touristik i kapab resevwar tours dan en fason ki sen.

In angaz avek Sekter Lapes sirtou an se ki konsern bann sanzman *crew*, ki sa i ganny fer dan en fason ki mwen riske.

Minister Lasante pe travay etrwatman avek Minister Ledikasyon pou kontinyen donn gidans avek sipor sa Minister, pou fer sir ki a laprantisaz pa ganny arete. I annan en kolaborasyon etrwat avek Departman Lapolis, Defans sa i zis 2 ou 3 legzanp ki mon pe mansyonnen.

Minister Lasante i osi travay avek *SCCI* pou ki bann biznes i kapab re ouver. Nou bezwen rekonnet ki *COVID* i biznes tou dimoun e pa zis pou

Minister Lasante. Alor nou espere ki tou lorganizasyon gouvènmantal, prive e piblik an zeneral, i kontinyen donn zot langazman aktiv pou konbat sa fleo.

Dan sa moman difisil tou lorganizasyon i devret pran plis linisyativ e vin plis inovativ, pou aplik bann mezir prevansyon dan zot landrwa travay pou anpes transmision *COVID-19*.

Lasante piblik i met mezir an plas kan nou bann endikater i akseptab. Nou retir sa bann mezir kan nou vwar poudir i annan e i neser, tout an prenon kont ki nou bezwen toultan fer sir ki abilite sistenm pou reazir i la.

En legzanp resaman kan nou ti ferm *Board* frontyer avek bann pei dan parey *L'Inde, Pakistan, Bangladesh* akoz propagasyon sa varyan *Delta*, nou ti realize poudir pou lendistri kapab kontinyen zot ti bezwen serten travayer ki zot ti napa.

E alor Minister Lasante toudswit in met mezir an plas, ki'n permet en pe sa bann travayer re antre dan pei dan en fason ki sen, dan en fason ki'n anpes transmision par sa group dimoun.

Tou bann sekter i devret refer li zot responsabilite e devwar pou ki zot travayer i

pran zot vaksen. Akoz sa nou realize poudir i en zouti ki kle dan sa konbat kont *COVID-19*.

Zot osi fodre sirveye ki zot gid lasante piblik dan landrwa travay i ganny byen enplimante. Mon ava profite pou remersi tou bann Minister lorganizasyon ki'n travay avek nou e nou swete ki sa kolaborasyon i kontinyen.

Minister Lasante pou kontinyen fer bann diskisyon donn formasyon, donn sipor bann diferan sekter e fer sir zot azour avek bann diferan mezir lasante piblik. Mersi.

MR SPEAKER

Mersi Minis. Wi Onorab William siplemanter.

HON WAVEN WILLIAM

Mersi Mr Speaker. Mr Speaker mon ti ava kontan demann avek Minis par lefe ki ozordi la nou pe koz ki nou'n annan 20mil 900 ka aktiv ki dan pei nou'n dekouver tou dilon 2020 ziska prezan. E ladan i annan apepre en 20mil 200 ekek ki'n geri.

E nou pe koz ozordi environ 100 ekek dimoun in mor. Nou pe koz environ aktiv la 500 an plis ka dan pei. E nou pe koz 50 ka par semenn par distrik.

So mon anvi demann Minis par lefe ki in koz en pti pe

an zeneral lo sityasyon bann mezir bann dyalog bann korperasyon ki pe pran plas. O nivo lokal distrik kwa ki zot pe mazine fer ?

Akoz mon santi poudir sa ledikasyon sa lanfaz bezwen ganny mete o nivo lokal dan distrik, ki kapab kree sa lenpak o nivo nasyonal.

So mon anvi konn en pti pe kwa ki zot pe fer, akoz mon santi poudir ozordi dan kominote i annan bann dimoun ki ankor iresponsab.

E par lefe ki lenformasyon - *well* nou tou nou tann dir poudir bann lenformasyon i prive. Me solman o nivo Lotorite Distrik, nou demande parfwa be kwa ki nou kapab fer an plis pou ede dan sa konba, pou asire ki enn nou lekonomi ki depan lo touris pa ganny afekte? Nou pa oule retourn an aryer. Mersi.

MR SPEAKER

Ale. Mersi Onorab, les Minis reponn *please*.

MINISTER PEGGY VIDOT

Mersi Mr Speaker. Poudir wi Onorab nou pe vwar ou bann sif ki ou'n site i byen. Ki nou pe fer lo nivo distrik, nou fer sir ki toulezour konmela ki nou analiz tou sa bann ka, e vwar

konbyen i annan dan sak distrik.

Sa lenformasyon i ganny anvoye kot bann sant lasante dan sa bann distrik, avek non sa bann dimoun ki pozitiv dan zot distrik.

Lenformasyon lo kantite i osi ganny anvoye kot bann *District Administrators*. E zot osi zot travay avek lasante si bann *staff* lasante i bezwen konnen lekel sa bann dimoun dan distrik, i kapab pran fer en diskisyon avek zot.

So sa bann lenformasyon i ganny anvoye, pou ki nou bann stratezi i pa reste zis o nivo Nasyonal me i vremen konmans desann lo nivo distrik kot nou santi poudir i bezwen.

E kan lo nivo distrik zot santi poudir sa bann mezir bann dimoun ki zot konnen ki merit an karantenn ou si non ki zot konnen i merit dan izolasyon e ki zot pa pe kapab arive fer li. Zot osi demann souvan led avek Lapolis ki osi konnen ki kantite nou annan dan sak distrik.

Alor nou pe esey nou mye, pou anmenn nou servis lo baz distrik aköz nou konnen poudir la i enportan. E si sa bann dimoun dan distrik i konnen lekel ki pozitiv zot pou pli kapab ede. Me mon ti ava kontan ki

Dr Gedeon i azout en pti pe lo la Mr Speaker si i posib.

MR SPEAKER

Mersi, wi dokter.

PUBLIC HEALTH COMMISSIONER DR JUDE GEDEON

Mersi *Minister*. Mersi Onorab. Bonzour tou dimoun. Mon krwar Minis in kouver la gran parti. Me selman zis pou azoute an se moman nou annan nou 547 ka aktiv avan ki nou *update* ozordi. E ladan lamazorite Seselwa.

Pandan sa dernyen 10 zour nou'n ganny nou 25 viziter ki pozitiv, ou ganny enn de enn de par zour. Sa bann aktiv en.

Aprè nou annan 26 bann *public holders*, bann *GOPs holders* a gran mazorite Seselwa 496 i Seselwa.

E ki nou pe fer nou pe fokaliz lo bann *clusters* dan bann landrwa travay, dan bann lakour e nou pe fer sir ki bann dimoun ki an kontak avek sa bann ka pozitiv i ganny teste pli boner ant 5 zour a 7 zour zot fer zot tes.

E byensir a nenport ki moman ki zot annan sentonm nou fer zot al fer en tes pou nou kapab *pick-up* bann *case* boner pou fer entervansyon.

So sa nou vwar i pe marse. Me sa ki pli enportan pou dir se ki responsabilite endividyel napa personn ki pou kapab fer pou ou. E mon krwar mon dakor avek ou Onorab ki i napa ase langazman, en kantite dimoun dan kominote lo baz endividyel, lo baz fanmir kot nou vwar bann rankont i kontinyen pe arive.

Letan nou fer nou bann *contact tracing* nou vwar poudir laplipar ditan en rankont ki'n ganny fer en rankont fanmir ki'n ganny fer, akoz ou vwar menm sinyatir selman zot sorti diferan distrik. La ou pou konnen poudir i annan en rankont fanmir en parti in ganny fer en rankont kot in annan lesanz.

So nou pe demann sa langazman personnel e byensir sipor bann Lotorite Distrik i kle. Se pou sa nou pe partaz bann lenformasyon avek bann Lotorite Distrik. Pa zis dan klinik me selman dan bann *community development* osi tou, pou ed nou dan sa travay, fer sir ki dimoun ki an karantenn i reste an karantenn. E bann ki dan izolasyon i reste an izolasyon. Mersi.

MR SPEAKER

Mersi dokter. Mon ava pran siplemanter Onorab Cosgrow.

HON WALLACE COSGROW

Mersi Mr Speaker. Bonzour Minis, bonzour le de dokter. Minis vaksen i osi o sant bann zefor ki nou pe fer pou sofgard e relans nou lekonomi dayer Minis Finans ti dir dan Lasanble ki Gouvernman in *roll-out* en program vaksen pou nou kapab ouver pei, pou nou kapab relans nou lekonomi.

Me 7 mwan apre nou vwar ki nou ankor annan en kantite restriksyon, nou vwar ki nou ankor annan en kantite ka *COVID*. E nou vwar poudir i annan bann ka lanmor *still* ki'n arive Minis.

Minis si vaksen i o sant, sa bann zefor e nou *still* sa sityasyon eski i annan en problem avek vaksen, ouswa eski i pa pe marse sa stratezi ki nou vwar nou, nou ankor annan sa bann restriksyon? E la nou'n vwar poudir i annan en *low* vaksen *Pfizer* ki'n vini 35 mil si mon pa tronpe.

Eski sa pou re *boost* nou popilasyon kont pou protez nou popilasyon kont *COVID*? Ouswa i annan lezot bi pou donn lezot dimoun?

Akoz pa bliye ki nou annan 65poursan plis dimoun ki'n fini pran zot vaksen.

E mon dir sa Mr Speaker akoz mon anvi met en lot pti

eleman ladan. Mon'n fer li dan mon menm, mon'n al fer mon en *neutralising antibody test* e mon soke mon rezilta i negativ.

Savedir 6 mwan apre ki mon'n pran vaksen tou le de doz napa latras proteksyon dan mon lekor.

So eski vaksen i en problenm li menm, ki ou vwar nou ankor dan sa sityasyon ozordi kot nou pa pe bouze Minis? Mersi.

MR SPEAKER

Mersi-mersi. Minis ou repons silvouple.

MINISTER PEGGY VIDOT

Mersi Mr Speaker. Mr Speaker *COVID-19* i en maladi ki nouvo. I en maladi ki napa menm 2an. I pe evolye sa ki nou ti panse lasyans ti vwar lo sa maladi, ler i ti konmanse, dan lafen 2019 in sanz en kantite. Bann mezir ki tou bann gran lorganizasyon parey *WHO*, parey *CDC* ti met an plas, zot osi zot in sanze anmezir evolisyon maladi.

Ler sa parey en kantite maladi enfeksye tou dimoun ti panse poudir vaksen i en metod ki pou servi, ki pou annan parey ou'n dir en vreman en plas tre for dan anpes maladi.

Alor tou dimoun in taye - bann group in taye pou fer vaksen e en vaksen ki'n devlope

e ki'n ganny si oule pase tre vit dan listwar vaksen.

O debi tou dimoun ti panse poudir vaksen zot ti dir nou pa konnen ki zistans konbyen letan son liminite pou la. Zot ti panse ti annan menm ekrire ki akoz en viris ki resanble parey viris *influenza*, i annan en posibilite ki vaksinasyon pou bezwen fer detanzaot.

Me nou konnen poudir vaksen i marse, i ede pou anpes sa maladi in grav e anpes lanmor.

Alor konman en stratezi, isi Sesel donn vaksen konman nou'n gannyen. E sa i parey dan en kantite pei. E i annan en kantite pei ki ziska prezan zot pa ankor kapab gannyen sa vaksen.

Nou'n osi konnen poudir an vi ki lasyans ti pe fer tou sa ki nou bezwen fer swivi. E nou lo nou kote nou pe fer swivi nou pe teste diferan group dimoun, pou nou parey nou dir fer en test pou regarde ki nivo imilite zot annan a spesifik peryod apre vaksen.

Sa letid i ankor pe kontinyen. E nou vwar parey dan diferan pei poudir i annan en rediksyon dan *antibodies* ki annan dan lekor en dimoun apre ki in pran vaksen. Apre 6 mwan apre 9 mwan.

Letid in montre dan bann diferan pei ki *L’Amerique, Israel* poudir sa i leka avek nenport ki vaksen. Ki lasyans pa ankor kapab dir nou poudir imilite kot en maladi i pa zis par *antibodies*. I osi annan sa ki nou apel *memorable cells*, paret *T cells* ki kapab ganny *kick-in* ler sa lenfeksyon i antre dan lekor en dimoun.

Ziska prezan lasyans pa ankor konnen ki kantite ki sa bann *memorable cells* pou vini pou *kick-in place* ler si sa dimoun i reganny enfekte. Alor i annan en kantite keksoz.

E mon krwar menm dernyen fwa ler mon ti isi pou koz lo *COVID*, mon ti dir poudir sa kondisyon e ankor pe evolue. E ki ankor annan diferan lasyans ki pe vini tou dimoun e ki nou pou bezwen swiv.

Pou nou, nou konnen poudir kantmenm nou’n donn vaksen nou kominote nou popilasyon ki par lao 18an, nou vwar poudir nou bezwen protez bann zanfan ki anba 18an.

Malerezman o debi ler sa vaksen ti konmanse, ti dir annou pa donn manrmay anba 18an pa donn adolesan anba 18an. Apre zot in vwar poudir i posib pa tou vaksen me en serten vaksen.

Konman en entervansyon, konman en stratezi nou panse

poudir nou bezwen osi al an ver sa group ki pa ankor ganny vaksinen.

E menm dan nou letid, dan nou swivi nou vwar poudir zanfan resaman leta nou pe regard nou kantite dimoun ki ganny teste pozitiv par *tranche d’age*, nou vwar poudir nou annan en bon en kantite ; -preske dir i lanmwatye ou 40poursan ki dan sa *age group* anba 19an.

Alor i montre nou poudir nou bezwen vin ek en stratezi si i posib pou protez zot osi. Nou’n ganny sans ganny vaksen *Pfizer* ki’n ganny pase par *WHO* par *CDC* par tou bann gran regilater, konman en vaksen ki kapab donn en adolesan. Alor nou panse poudir i en bon stratezi e se sa ki nou pe fer.

Nou osi realize poudir i annan group dimoun ki pli vilnerab. E lasyans e menm bann lezot pei i dir poudir nou bezwen donn en trwazyenm doz sa bann dimoun si i posib.

E se sa ki nou, nou pe fer pou regarde ki group dimoun ki nou pou donn sa trwazyenm doz e kan. E menm parey ou’n dir si i neserer pou nou donn en trwazyenm doz popilasyon nou pou fer li. Mersi Mr Speaker.

MR SPEAKER

Mersi Minis. Nou pou avans lo prosen kestyon. E sa se Onorab William kestyon 74. Onorab ou kestyon.

HON WAVEN WILLIAM

Mersi Mr Speaker. Kestyon i *comme* swivan:

Eski Minis pou Lasante i kapab eksplik Lasanble lo ki nouvo stratezi zot pe vin avek pou kontrol propagasyon lafyev dennge e ka leptospiroz dan distrik? Mersi.

MR SPEAKER

Mersi Onorab. Minis repons.

MINISTER PEGGY VIDOT

Mersi Mr Speaker. Mersi Onorab pou ou kestyon. Mr Speaker i enportan pou fer resorti ki Minister Lasante i konsern avek tou bann maladi ki anba sirveyans dan Sesel e aletranze.

E sa i enkli dennge ek leptospiroz menm si nou pa pe koz bokou lo sa de size aktyelman pandan sa letan COVID.

I annan diferan sistenm sirveyans an plas atraver bann sant lasante, e nou sistenm laboratwar.

Mr Speaker, sa kestyon i enteresan, akoz dan sa kestyon ennler nou vwar poudir i annan en gran kantite en kantite pwa

ek responsabilite ki mete lo kontrol propagasyon lafyev dennge ek leptospiroz ki sa i met lo Minister Lasante.

Realite sepandan i devret en pe dan le konter. Nenport stratezi ki Minister Lasante pou vin avek pou kontrol propagasyon lafyev dennge ek leptospiroz dan distrik, i pa pou marse e i pa pou ase si nou popilasyon li menm i pa pran son responsabilite an ver sa de maladi.

Tou bann endividi i bezwen zwe zot rol. Bann fanmir i bezwen zwe zot rol. Bann *leader* lo tou nivo nou bezwen zwe nou rol. Nou osi e tou bann lazans prive, piblik zot osi zot annan en gran rol pou zwe anver lanvironnman e anver bann kondisyon ki ankouraz propagasyon, sa bann vekter ki responsab pou sa de maladi.

Se zisteman dan bann maladi parey dennge ek leptospiroz, ki direkteman lye avek fason viv ek lanvironnman ki nou bezwen pran en lapros ki sosyete an antye.

I devret pli for e pli dirab ki posib. Mon kontan remarke ki deza i annan bokou dimoun dan sosyete ki pran zot rol aker e pe fer tou sa ki nesaser.

Mon konnen ki ou osi Onorab ou pe zwe en rol enportan dan sa lalit.

Alor mon mesaz ozordi anver nou tou se, ansanm annou arete kekfwa nou konsantre pa tro lo kisisa an plis ki Minister i kapab pe fer.

Me annou osi demande kisisa an plis ki mwan ek mon fanmir ek mon kominote nou kapab fer pou dan sa demars?

Mr Speaker permet mon aprezan pou vin en pti pe lo bann detay. Tou bann ka sispe a sa de maladi i ganny raporte tou le semenn e osi konfirmasyon laboratwar i ganny fer dan en mazorite ka.

Mr Speaker lepidemi dennge Sesel in konmanse depi lafen lannen 2015. E tou le lannen i annan bann vag kot milye ka sispe i ganny raporte, ziska plis ki 500 ka sispe ti annan an 2020.

An 2021 in annan omwen 120 mil 200 ka sispe dennge ki'n ganny raporte atraver sistenm laboratwar. E parmi plis ki 200 ti teste pozitiv par *rapid test*.

Nou vwar ki pandan 2021 laplipar distrik in raport detrwa ka dennge a leksepsyon Praslin ek La Digue kot selman zis 2 ka ki'n ganny raporte.

Bann distrik dan les e sid Mahé in raport bokou plis ka e

pandan lannen 2021 e in annan ziska prezan 8 aminisyon akoz dennge dan lopital e malerezman en ka mortalite.

Mr Speaker leptospiroz si mon kapab eksplike i en maladi ki ganny koze par en bakteri ki apele leptospira. Leptospiroz i en maladi ki konman en pe konmans par i konman en pe partou dan lemonn. E Sesel i enn bann pei ki pli ganny afekte.

Sa bakteri i ganny trouve prensipalman dan lera. I pli fasil pou atrap li si ou annan en blesir lo ou lapo e ou vin an kontak avek sirfas parey later. Parey vezetasyon kot i annan sa bakteri ki lera in mete.

Mr Speaker an 2021 plis ki 819 ka sispe leptospiroz ti raporte e teste par *rapid test*. Parmi i annan 16 ki'n teste pozitiv e i annan en ka lanmor.

Tou dimoun ki sispe ki ganny sispekte ganny leptospiroz, i ganny trete imedyatman avek antibyotik sa i en stratezi ki'n marse byen e prodwir bon rezilta.

Me nou annan stratezi pou nou kontrol leptospiroz avek dennge. Pou plan stratezi pou en dimoun ganny dennge i bezwen annan en moustik ki enfekte avek sa viris. Pou sa moustik propaze i bezwen annan delo en pe partou.

E nou konnen poudir en moustik dan son serk lavi i pran apepre 7 a 10 zour pou konplete.

Alor pli bon metod pou kontrol moustik e lera, set an servan en metod ki entegral ki'n ganny rekomande par *WHO*.

Savedir nou servi tou bann metod rezonnab pou efektifman redwir lapopilasyon moustik ek lera, dan nenport landrwa partikilye e *pest control management* i konbinezon bann lapros biolojik, kiltirel e kemikal pou kontrol bann pest.

Kemikal i dernyen opsyon ki ganny servi. Lakle pou kontrol bann moustik ek lera se vreman lapropte.

Nou annan bann lentegrasyon metod ki nou servi i enkli ledikasyon bann manm piblik i enkli vizit kot bann lakour, lendikasyon dan lakour.

Vwar bann landrwa kot i annan posibilite pou fer popilasyon moustik ek lera grandi. Edik dimoun lo la. E si i annan lenfestasyon nou annan lezot metod ki nou servi si lenfestasyon pa tro serye, nou diskit avek sa bann dimoun, nou donn zot konsey. Si sa pa marse nou donn zot en notis, nou kontinyen sirveye.

E si sa i vreman pa marse, nou toultan annan en rekour

pou anmenn zot Ankour. Me sa i dernyen opsyon.

Nou osi ranforsi nou konsey pou dimoun depoz byen zot salte dan bin, e fer sir ki tou Lazans ki tir salte i fer li anba regilasyon.

Nou travay avek Lotorite Distrik atraver bann zofisye Lasante Piblik. Nou popilasyon moustik ek lera i osi ganny kontrole par bann metod kemikal, tel ki *fogging* pou kontrol dennge e *baiting* pou kontrol lera.

Si i annan lakour kot i annan dimoun ki'n ganny dennge e ki nou vwar i annan en popilasyon moustik ki ase eleve konman en Lasante Piblik nou fer *fogging* dan omwen en 300 met otour zot lakour.

Dan ka kot i annan leptospiroz sa osi i ganny fer. Nou ganny nou pase nou fer sa bann kalite diskisyon avek bann lafanmir.

E pou fini koman Minister Lasante nou apresye rekonnet nou rol pou gid sa bann program sansibilizasyon atraver diferan medya.

Sa pe ganny ranforsi pou fer dimoun pli konsyan zot responsabilite personel e endividyel pou anpese ki sa maladi i propaze. Nou anvi ki dimoun i rekonnet sa pou sa ki sakenn de nou i fer nou par pou

anpes sa de maladi atraver kontrol sa moustik avek lera. Mersi Mr Speaker.

MR SPEAKER

Mersi Minis. Onorab ou annan siplemanter?

HON WAVEN WILLIAM

Mersi Mr Speaker. Mr Speaker mon anvi demann avek Minis, par lefe ki fason fer i *you have to lead by example* konman fasiliter, mon anvi demann Minis sirtou ler pe koz lo nivo kominoter, Mr Speaker permet mwan akoz mon bezwen ava kapab etabli baz.

MR SPEAKER

Wi selman fer li bref silvouple Onorab. Nou letan pe terminen.

HON WAVEN WILLIAM

Wi. Minis mon kapab netway kot mon byen prop. Me i annan bann rezyon ki *no man's land* ki pou Gouvernman la ou pe koz lafore, later lagrikiltir.

Me mwan mon ti ava demande ki dan lavenir si i ava annan en pli bon kolaborasyon, akoz ler ou dan sa rezidansyel ou kapab gard li prop.

Me i annan bann *no man's land* i annan bann regilasyon, i annan bann kondisyon mon santi poudir i mank en travay

kolaborasyon ki merit ganny entansifye e mwan mon *welcome en meeting* dan distrik dan lavenir pou sa. Mersi.

MR SPEAKER

Mersi Onorab. Minis ou ti a kontan adres sa.

MINISTER PEGGY VIDOT

Mersi Mr Speaker. Toutafe dakor poudir nou bezwen annan kolaborasyon a tou nivo, akoz i annan serten landrwa parey Onorab in dir ki bezwen ganny adrese.

Me konman Komisyoner Lasante Dr Gedeon ti ava kapab dir en parol lo la.

MR SPEAKER

Mersi. Wi dokter.

PUBLIC HEALTH COMMISSIONER DR JUDE GEDEON

Mersi *Minister*. Mersi Onorab i vre ki dan kominote nou annan en kantite landrwa kot dimoun i zet salte lo bann propriyete piblik.

Be i dimoun kominote ki pe fer sa. I tir salte kot son lakour olye al met kot bin oubyen al met en lot landrwa kot i zet salte i met dan lapay.

Letan nou fer nou *survey* apre ki nou vwar bann ka denge, nou vwar poudir

lamazorite ka bann dimoun in atrap sa maladi otour lakour, atraver bann resipyan ki tenir delo.

E en legzersis ki nou kontinyen demann bann fanmir pou fer *at least* de fwa par semenn, fer letour lakaz, tir tou bann resipyan ki pe tenir delo.

E zis sa aksyon li tousel i ase pou redwir bann ka dennge. Nou depann lo bann dimoun ki netway dan bann distrik, bann kontrakter pou netway dan bann landrwa bann *no man's land* parey nou dir.

I pa bann boursay ki fer moustik. I plito bann plastik bann bwat bann boutey ki nou zet dan lapay. Be i reste en *challenge* Onorab. Mersi.

MR SPEAKER

Mersi dokter. Nou pou termin la pou sa kestyon. E nou pou rebran travay 11:05 pou lezot kestyon pou Minister Lasante. Mersi bokou. Minis ek ou delegasyon nou demann zot en pti *adjourn*.

(BREAK)

MR SPEAKER

Mersi tou dimoun. Nou ava kontinyen avek kestyon e nou al lo nimer 75 Onorab Egbert Aglae.

HON EGBERT AGLAE

Mersi Mr Speaker. Bonzour Minis ek le de dokter. Eski Minis i kapab dir ek sa Lasanble konbyen madanm ansent ki'n teste pozitiv pou *COVID-19* ziska prezan? Ki bann mezir efektiv ouswa swivi ki zot fer panda e apre lansentman? Mersi.

MR SPEAKER

Mersi Onorab. Minis repons.

MINISTER PEGGY VIDOT

Mersi Mr Speaker. Mersi onorer pou ou kestyon. Ziska prezan Zanvye ziska Out 2021 in annan 129 madanm ansent ki'n teste pozitiv pou *COVID-19*.

E ki mezir ki nou pran? Parey *WHO* in ankouraze. Nou osi prezan nou pe ankouraz tou madanm ki avan zot ansent si zot kapab pran zot vaksen zot pran, e menm pandan lansentman zot kapab pran zot vaksen.

Tou madanm ki pe annan en dat - dizon ki pe vin lopital pou vin fer swa pou ganny baba ki'n planifye ou si non pou vin fer sezaryenn, zot kapab fer zot tes *PCR* 72er avan zot antre lopital.

E si napa sa letan nou fer en tes ase vit, avan ler ki zot antre dan *ward* e ziska ki nou ganny rezilta sa tes zot pa

ganny melanze avek lezot pasyan.

Dan sa ki konsern bann mezir pou bann madanm ki fek konman ansent, savedir dan sa premye trimes. Si zot teste pozitiv nou donn zot menm ledikasyon ki tou lezot dimoun, pou dir zot ki zot fodre fer.

E an plis akoz zot ansent nou fer sir ki zot byen konpran poudir si okenn sentonm i ganny evolye, i arive ki zot fodre fer. Si sentonm i minim ki sa ki zot fer, si zot sentonm i en pe pli konman zot sentonm i sanze ki zot pran kontak avek sistenm e ki fodre zot fer.

Ler in ariv dan sa dezyenm trimes, savedir ant 13 semenn a 26 semenn, i ankor menm parey si zot teste pozitiv ankor nou pran zot nou diskite nou dir zot ki sa ki zot fodre fer. E ki sa ki zot pa fodre pa fodre fer.

E si zot sistenm kantmenm i konmans vin en pe pli grav, nou fer sir ki toultan nou met zot nou an al met zot dan lopital. E si nou vwar poudir sa maladi pe kontinyen vin pli grav i arive ki nou bezwen ennler pran sa desizyon pou esey sov lavi sa manman.

E alor si nou vwar fodre nou termin sa lansentman, nou bezwen fer li, akoz nou realize poudir menm lasyans i montre poudir annan de ler avek

lansentman maladi i kapab vin avanse.

E sa alor nou fer li. E si parey 26 semenn si nou vwar sa pti baba i annan en sans viv, nou pou toultan fer nou mye pou nou kapab sey sov li.

Dan trwazyenm trimes savedir depi 26 semenn ziske ler nou dir *term* ; - savedir kan madanm pe al aret pou li ganny son baba, si sa madanm in ariv sa zistans i desizyon i ganny fer lo sa ka par ka. I pa en regilasyon ki aplik pou tou dimoun. Akoz sak en dimoun i maladi i evolye diferaman.

E si en madanm ki son lansentman in ariv 37 semenn, e ki in teste pozitiv dan sa letan, lentervansyon pou ganny pran pou li kapab ganny son pti baba. Swa par fason ki nou fer li gannyen ou si non si fodre fer en sezaryenn nou fer li.

Ler en lansentman in ariv sa staz, nou realize poudir souvan 37 semenn en pti baba i vyab, e alor i toultan i pli fasil pou fer sa lansentman terminen par en *induction*.

Aprè lansentman nou swiv sa pasyan, nou swiv li parey si i ganny *COVID* apre ki in ganny son pti baba, nou swiv li parey nenport ki lezot maladi.

E si i annan sentonm ki vin pli grav nou demann li pou li al dan bann swiv menm laliny

ki lezot. E si in ganny sentonm in ganny COVID, ki son sentonm i kontinyen nou fe sir ankor ki toudswit i al kot dokter pou sa. Mersi.

MR SPEAKER

Mersi. Siplemanter Onorab.

HON EGBERT AGLAE

Mersi Minis pou ou larepons. Minis premyerman si ou annan sa lenformasyon avek ou eski ou ti kapab petet dir nou dan sa 129 ki ou'n nonmen konbyen ladan petet ki ou'n bezwen vwar Lasante pran en desizyon pou entervenir parey ou'n dir pou *terminate* okenn *pregnancy* a en staz?

E dezyenmman, eski Minister pe kit li azour pou konpran en pe an vi ki sa viris i nivo, lenpak lo sa baba li menm dan bann prosedir ki i pe sirtou *fetal fetus* to ler in matir menm.

Eski zot pe gete si i annan okenn lenpak pangar ki a lavenir nou vwar bann baba ki annan serten diformite dan devlopman? Mersi.

MR SPEAKER

Mersi Onorab. Minis.

MINISTER PEGGY VIDOT

Mersi Onorab. Bon pou dir ou mon ava les dokter donn ou

bann sif kantite ki nou'n bezwen entervenir Dr Louange.

Me pou dir ou si nou pe fer swivi son norm ki nou annan i pti gin. E nou isi nou pa ankor konmans okenn letid. Me mon konnen i annan landrwa parey *L'Angleterre*, kot zot pe fer sa letid lo bann zanfan kekfwa ki paran in teste pozitiv pandan lansentman.

Me konman tou sa i nouvo, sa maladi i pa tro lontan i avek nou, serten sa bann kalite letid, parey ou pou apresye i lonterm, i *longitudinal*.

Me ziska prezan napa nanryen dan lasyans ki montre poudir i annan en gran lefe lenvers lo bann zanfan, ki zot paran in ganny COVID pandan lansentman.

Me nou pe swiv tou sa, e nou annan nou lo nou *database* sa bann paran ki teste pozitiv ki faz dan zot lansentman ki zot in pozitiv. Alor si nou pou bezwen pe fer swivi pli pe lo sa bann zanfan i pou fasil pou nou fer li.

Nou apresye poudir i kapab i en keksoz ki merit ganny etidye me nou konnen poudir pe ganny fer dan lezot pei kot zot annan bokou plis fasilite syantis ki in reisi. Mersi mon ava demann Dr Louange si i kapab donn nou bann sif silvouple.

MR SPEAKER

Mersi Minis. Dr Louange.

CEO DR DANNY LOUANGE

Mersi Mr Speaker. Mersi Minis. Bonzour Mr Speaker. Bonzour bann Onorab e bann dimoun a lekout.

Pou lo kote bann sif, mon pou konmans avek bann pasyan, akoz nou pe tenir nou pe pran tou bann *statistics* lo bann madanm ansent, akoz nou oule *monitor* tre pre.

E dan nou rikord i annan apepre 5 pasyan ki'n bezwen ganny admit dan izolasyon.

Kot nou sant izolasyon akoz zot annan sentonm ki zot ti pou bezwen tretman dan sa sant.

E parmi sa 5 nou'n annan nou 2 ki dan nou rikord ki'n bezwen fer entervansyon pou kapab pou sey sov lavi sa manman e menm lavi sa baba. Mersi Onorab.

MR SPEAKER

Mersi. Mon ava pran kestyon Onorab Audrey Vidot.

HON AUDREY VIDOT

Mersi Mr Speaker. Bonzour Minis ek ou delegasyon, tou Manm Onorab e tou dimoun ki a lekout.

Minis mon kestyon i dan sa 129 ka ki'n teste pozitiv,

konbyen manman ki'n perdi zot lavi? Si in annan eski in annan bann lezot maladi osi ki'n kapab okazyonn en pti pe lefe pou fer sa manman ek son baba perdi zot lavi?

E dezyenmman, i annan bann petet bann manman ansent ki annan bann lezot maladi kronik parey asma. Eski i dan prosesis konsiltasyon parey letan zot in konnen sa manman in teste pozitiv avek *COVID*, eski in annan bann sipor psikolojik osi ki zot pe donneren avek sa bann manman?

Prenon kont ki parfwa avek presyon avek lenkyetid pou zot lasante, lasante zot baba, sa i ti pou ed zot kapab *throughout* zot prosesis lansentman.

E zis pou fer resorti, akoz in ariv en ka dan mon distrik kot letan en manman ti teste pozitiv. I ti ganny pa mal difikilte pou li ganny lasistans, pou li kapab sorti kot son lakour pou ganny en fasilite karantenn pou kapab annan son tretman.

So si zot pe fer le mye posibil pou evite ki bann sityasyon parey, espesyalman letan nou konnen si sa manman i swa i en manman anba laz, oubyen menm en zenn ki petet i mank en serten

leksperyans ki bezwen sipor.
Mersi.

MR SPEAKER

Mersi Onorab. Minis.

MINISTER PEGGY VIDOT

Mersi Onorab pou ou kestyon.
Wi Onorab bann ki nou'n
annan dan sa 129 ki'n teste
pozitiv, i on bezwen eksprimen
ki nou sagren, ki i annan de ki
nou pa'n kapab sove.

Ou demann mon si zot ti
annan lezot kondisyon? Wi dan
tou le de ka ti annan serten
kondisyon ki'n agrav zot
lenfeksyon avek *COVID*.

Wi parey ou dir bann
dimoun ki annan kondisyon e
ki annan i vwar zot dan
lansentman, i bann group ki
nou dir fodre nou vey pli pre
posib.

Ou'n fer resorti en ka kot
ou'n santi poudir sa pa'n leka.
E nou ti ava kontan regarde,
akoz i nou Polisi kot i annan en
dimoun ki ansent ki i teste
pozitiv ek *COVID*, e ki annan
lezot kondisyon medikal ki nou
vey li tre pre e laplipar ditan
dan en sant izolasyon.

E sa i nou standar ki
nou'n mete. Me si ou'n dir mon
i annan en ka nou ava verifeye lo
sa ka. Mersi.

MR SPEAKER

Mersi Minis. Nou ava pas lo
kestyon swivan, e sa se kestyon
76 Onorab Egbert Aglae.

HON EGBERT AGLAE

Mersi Mr Speaker. Eski Minis i
kapab eksplik sa Lasanble ki
bann kad travayer lasante ki an
se moman pe resevwar en
COVID allowance, konbyen sa
pe kout pei ziska prezan?
Mersi.

MR SPEAKER

Mersi Onorab. Minis.

MINISTER PEGGY VIDOT

Mersi Onorab pou ou kestyon.
Depi ki Sesel in rikord son bann
premye ka nou'n bezwen rod
dimoun pou fer bann travay en
pe pli pros avek dimoun ki'n
ganny teste pozitiv pou *COVID*.

E depi *Juin 2020* in annan
en sistenm *allowance* ki'n
ganny met an plas pou diferan
group travayer lasante.

Bann diferan tip
allowance ki pe ganny donnen i
annan sa ki zot ti'n apel *risk
allowance*, sa set en *allowance*
ki ti ganny entrodwir pou motiv
dimoun pou al travay lo
frontline.

Savedir bann ki ekspoze
en pe plis avek dimoun *COVID*.
E i annan 3 nivo risk ki a sa
moman zot ti deside annan, enn
ki en pe *low risk* kot *allowance*

ti R1500, enn ki *moderate risk* kot *allowance* 2500 ek enn kot zot ti'n plas li konman *high risk* ki *allowance* i en R5000.

I annan osi *responsibility allowance* ki ti ganny donnen, pou bann dimoun ki ti pe travay plis ki ti bezwen pran plis responsabilite pandan sa letan, akoz sete en nivo maladi en pandemi, ti dan en *health emergency*.

Alor ti annan en kantite keksoz ki ti bezwen ganny etabli e ti annan en group dimoun ti pe ganny en *allowance* R5000 pou sa. E ti annan osi dimoun ki ti bezwen fer *on-call* parey nou annan sa group ki pe reponn telefonn pou dimoun ki bezwen led *one-for-one*. E diferan lezot an *call* ankor ki dimoun ti bezwen ganny en *on-call allowance*.

E tou sa ti ganny groupe dan sa bann laspe risk. Sa *allowance* ti ganny donnen pou en serten pou sa bann dimoun letan zot ki zot pe fer sa bann kalite travay.

E ler zot ti sorti dan sa kalite travay, sa *allowance* ti ganny retire. An *Janvier* kan nou ti antre dan *community transmission*, savedir bokou plis dimoun ti vwar zot lekor dan bokou plis *low risk*.

Alor en desizyon ti ganny pran ki tou sa bann dimoun ki

pe travay ek pasyan akoz nou pa ti konnen lekel ki ti pe antre avek posibilite enfekte. Tou sa bann dimoun ti ganny en *allowance* pou *COVID*.

Dan Minister ziska prezan, ki group dimoun ki'n ganny peye sa *allowance*? Nou annan dokter, nou annan dantis, nou annan ners, nou annan dimoun ki travay dan sekretarya ki pe fer bann *on-call*, travayer lakaz mor, travayer lab kot i donn disan, nou annan bann *porters*, nou annan bann travayer kot dantis, travayer psikolog lezot travayer dantis, travayer fizyo, reabilitasyon, nitrisyonnis, travayer netwayaz ki anmenn bann salte kot en zenerater.

Travayer ki'n dan lasante mantal, drayver swa drayver ki lanbilans lezot drayver. Travayer ki pe nou resepsyon ki pe enteraksyon avek diferan malad. Travayer *X-Ray*, e lezot dimoun ki ti pe travay sa letan ti annan en bann dimoun ki ti lo en *Scheme* ki pe ede.

Konbyen in koute? Ziska Desanm 2020, nou'n pey *allowance* en sonm R5milyon 731mil 603 pou *allowance*. Depi *Juin* 2020 ziska Desanm 2020.

Depi Zanvye 2021 ziska Out nou'n pey R18milyon 436 mil 811 *allowance*. Sa an tou i

fer en total R24milyon 168 mil 422 *allowance* ki'n ganny peye pou bann diferan group travayer.

Ou'n demann mwan lekel ki ankor pe gannyen? Malerezman prezan depi *Juin* bann dimoun ki'n pe ganny *allowance*, i bann dimoun ki vremen kot i annan risk eleve. E sa bann dimoun kilo *frontline* e parey dan bann sant izolasyon, parey dan bann sant karantenn parey bann dimoun ki bezwen al sers sa bann dimoun ki'n fini teste ki annan sa maladi.

So group in desann, bann dimoun ki ankor *on-call* ki pe fer *one-for-one*, sa, sa bann group.

Me lamazorite, akoz en nou annan en sistenm ki'n etabli kot dimoun i al dan bann sant lafyev pou nou ganny teste e alor nou'n retir en pe sa bann kalite dimoun ki vin ki.

An menm tan in annan lezot evolasyon par egzanp nou annan en serten en lot *push* proteksyon vaksen.

So an *Juin* nou'n aret sa gran kantite *COVID allowance* ki ti pe donner. Mersi Mr Speaker.

MR SPEAKER

Mersi Minis. Wi ou annan ankor kestyon Onorab Aglae?

HON EGBERT AGLAE

Mr Speaker mersi. Mon siplemanter pou kestyon 76. Minis mon ti ava kontan petet ou eklersi mwan, mon'n ekout ou atantivman.

An vi ki zot pe vwar poudir zot kapab fer serten rediksyon *in terms of donn allowance*. I annan bann travayer ki sirtou ki travay avek dan klinik.

Eski ou pe dir mon poudir i annan sa distenksyon menm si i dan *fever centre*, i pou kalifye pou en *allowance*. Me sa ki dan klinik li pa pou neseserman pe ganny en *allowance* baze lo *risk assessment* ki zot pe met devan, eski sa i korek? Mersi.

MR SPEAKER

Mersi Onorab. Minis.

MINISTER PEGGY VIDOT

Wi Onorab. Bann dimoun ki pe travay ki pli pre ki zot risk i pli eleve zot pe ganny *allowance* pou kontinyen.

E si nou ava dir poudir osi dan saler travayer i annan eleman risk ki'n mete pou lamazorite travayer dan Lasante. Me pou sa *special allowance* pou *risk* pou *COVID*, an vi ki nou'n vwar poudir *risk* pa osi eleve parey ti ete letan ti annan bokou plis ka dan

kominote, sa bann dimoun pa pe gannyen *allowance* depi *Juin*.

MR SPEAKER

Mersi Minis. En kestyon siplemanter lezot Manm Onorab John Hoareau.

HON JOHN HOAREAU

Mersi Mr Speaker. Bonzour Minis ek ou lekip. Bonzour tou dimoun a lekout. Mon kestyon Minis se, eski i annan okenn *backlog* dan peyman bann *allowance*? E si i annan akoz? E si osi kapab dir nou kan pou ganny regle si i annan?

Dezyenmman Minis mon ti kava kontan si ou ti ava dir nou, si i annan okenn larzan dan *COVID Fund* ki pe ganny servi pou pey sa bann *allowance*? Mersi.

MR SPEAKER

Mersi Onorab. Minis wi.

MINISTER PEGGY VIDOT

Mersi Mr Speaker. Mersi Onorab pou ou kestyon. Onorab si i annan *backlog* mon konpran i pou minim. E i posib akoz annan de ler i annan *staff* ki transfer *from one area to another*. E kekfw sa pa ankor antre dan sistenm i posib i annan me i pou minim.

According to sa ki mon konnen *from financial controller*.

Kote larzan i sorti pou pey bann *allowance*? Mon ava les *HCA CEO* konmant lo la. Mersi.

MR SPEAKER

Mersi Minis. *CEO* wi.

CEO DR DANNY LOUANGE

Mersi Mr Speaker. Mersi Minis. Mersi Onorab pou ou kestyon. Tou bann *COVID allowance* ki nou'n peye i sorti dan nou *recurrent Budget*.

Savedir i sorti dan nou dan *Budget Health Care Agency* pou *wages and salaries*. Mersi Onorab pou ou kestyon.

MR SPEAKER

Mersi. Mon ava pran ankor en kestyon siplemanter Onorab Labonte.

HON ANDY LABONTE

Mersi Mr Speaker. Bonzour Minis avek *panel*. Minis zis en pti leklersisman lo kestyon ki Onorab Hoareau in demande i pa'n tro kler.

Eski dan sa 24 milyon 168 mil 422 i konfirman poudir tou bann travayer Lasante ki'n *involve* avek *COVID* in fini ganny peye zot *allowance*?

Aprè en lot pti leklersisman, eski sa bann travayer endirekteman, pe

travay avek *COVID* parey bann ki dan *screening point*, zot osi enkli ladan bann dimoun ki pe ganny sa *COVID allowance*, e lezot osi? Mersi.

MR SPEAKER

Mersi Onorab. Minis.

MINISTER PEGGY VIDOT

Mersi Onorab. Onorab mon pa pou kapab konfirman a sa moman la, ki tou dimoun ki in sipoze ganny sa *allowance* in fini ganny peye son *allowance* parey mon dir mon konpran, akoz sa i *from payroll* zot dir lamazorite.

Me i posib parey si i annan en dimoun ki ti pe travay dan en *unit* in ganny transfer *family hospital*, mwan pase e ki li son sistenm pa ankor antre e ki sa i kapab pa ankor ganny peye.

Alor pou dir ou ki tou, mon pa pe kapab konfirm sa. Me sa ki mon kapab konfirman lamazorite eski i annan enn de ka ki pa ankor fer li.

Letan ki nou'n aret *COVID allowance* an *Juin*, wi i zis bann dimoun ki pe *deal* avek pasyan *COVID* osinon bann dimoun parey dan *fever centres* bann landrwa koumsa ki pe ganny sa *allowance*. Mersi.

MR SPEAKER

Mersi.

HON ANDY LABONTE

Minister zis petet en pti leklersisman petet en rekomandasyon, petet bann dimoun ki kot *screening point* akoz zot osi zot a risk, akoz zot ganny kontak avek bann dimoun, petet si nou pa ti kapab konsider sa bann dimoun? Mersi.

MR SPEAKER

Mersi Onorab pou reponn ou pwen. Minis.

MINISTER PEGGY VIDOT

Mersi Onorab pou ou rekomandasyon. Parey ou vwar depans ki nou'n annan pou sa, in bokou e pou nou kapab fer li fodre nou *access* plis Bidze. Mersi.

MR SPEAKER

Mersi. Nou ava pas lo prosen kestyon ki pou Onorab Phillip Arissol 77. Onorab.

HON PHILLIP ARISSOL

Mersi Mr Speaker. Bonzour tou dimoun. Bonzour Minis avek ou delegasyon. Mon kestyon i lir koumsa ;-

Vi ki i pe aktyelman pran apepre enn lan pou ki en paran ek son zanfan i vwar spesyalis pou konnen si sa zanfan i otistik. Eski Minis i kapab dir

Lasanble ki kantite zanfan i annan lo sa lalis?

(2) Akoz ki i pran tou sa letan pou en zanfan vwar spesyalis? E eski Minis i kapab dir Lasanble enn fwa ki en zanfan i ganny trouve ki i otistik ki i arive apre? Mersi.

MR SPEAKER

Mersi. Minis ou repons silvouple.

MINISTER PEGGY VIDOT

Mersi Mr Speaker. Mersi Onorab pou ou kestasyon. Lo lalis aktyel 2021, i annan 94 zanfan ki pe espere pou konplet zot evalyasyon pou otizm.

Ladan i annan 72 e 22 fiy. Enn bann konponan enportan sa evalyasyon ki sa lekip disiplinier i servi, se en tes striktire e skandalize zot konportman ki annan pou fer avek enteraksyon sosyal e fason zwe sa zanfan i ganny obzerve.

Sa tes i permet obzerv konportman asosye avek otizm i ganny fer par 3 profesyonnel alafwa, an prezans en paran.

Enn sa bann profesyonnel i performans sa evalyasyon avek sa zanfan e de lezot zot, zot pran not pou nou annan en ganny en ariv lo en obzervasyon ek evalyasyon obzektif.

Fodre kont pou ki rezon COVID, sa servis pou fer

evalyasyon lo sa bann zanfan in osi ganny afekte.

E lafason ki COVID ti'n afekte evalyasyon, i enportan pou nou ganny note. Sa metod evalyasyon ki ganny servi par bann profesyonnel, i en tes ki enkli bokou enteraksyon avek sa zanfan. I en tes kot bann profesyonnel i bezwen zwe touse asiz avek sa zanfan e donn zanfan zouzou e diferan keksoz.

E sa tes an mwayenn i pran 1 erdtan. Alor sa i okazyonn posibilite annan COVID transmision.

Akoz pandan dan sa bann test ou pa pe kapab met en mask akoz ou bezwen sa zanfan i bezwen regard ou figir, i ou pa pe kapab met en *face shield* akoz ankor i bezwen ou bezwen annan sa enteraksyon ase pre ek zanfan.

Aktyelman i annan 6 profesyonnel ki *train* pou fer sa evalyasyon. E sakenn i sorti dan diferan Departman Lasante osi byen ki Minister Ledikasyon.

Kordinasyon i nesaser pou ki zot kapab zwenn pou fer sa bann tes nesaser e fer sa evalyasyon.

Akoz ki sa bann tes pe pran letan parey ou'n demande pou vwar spesyalis?

I pa pran lan pou ganny en apwentman. Me tes in ganny rekile sa bann evalyasyon in ganny rekile an tan *COVID*.

Tou nouvo ka ki ganny sispe ete konman en ka otizm i ganny fer kot pedyat ki travay La Rivière Anglaise ek kot sa bann evalyasyon i ganny fer.

Apwentman i ganny donneren pou sa pedyat kapab ganny plis letan pou vwar sa zanfan.

Sa spesyalis i vwar pa zis zanfan pou otizm - i vwar tou zanfan ki annan problemn parey problemn devlopman, problemn kot i pa koze, problemn diferan nivo problemn dan zanfan.

Alor i pa zis pou otizm, aköz nou napa en spesyalis zis pou otizm.

Apré sa premye vizit sa spesyalis i fer le neserer i refer sa zanfan avek bokou lezot profesyonnel. Par egzanp bann *speech therapist*, bann spesyalis ki fer lenteraksyon avek zanfan, psikolog, nitrisyonnis, dantis e tou sa.

En seri evalyasyon ki bezwen ganny fer ek sa zanfan enkli kot tes pou zorey, pou regarde si sa zanfan i atann byen. E sa i pran en pe letan pou sa zanfan kapab vwar tou sa bann spesyalis, avan ler i

retourneren pou vin fer sa bann aktivite avek sa group ki fer sa *assessment*.

Resours imen i en kontrent aköz ou napa bokou dimoun ki spesyalize dan sa domenn. E konman tes i pran lontan e i zis i pa zis en tes, i pa zis en obzervasyon. I en seri obzervasyon, alor avan ler ou ariv lo en desizyon pou dir sa zanfan i otizm, plizyer tes kapab ganny fer plizyer lapwentman i kapab ganny donneren.

E pou sa rezon kekfwa en dimoun i ava dir pran lan pou ou ganny en diagnosis. E sa i posib, aköz sa kantite tes ki bezwen ganny fer.

E tou resaman osi travayer ki travay en pe dan sa spesyalizasyon, zot osi zot in bezwen vwar zot ganny anvoye pou travay dan lezot landrwa, aköz nou dan sa pandemi e zot servis ti bezwen ganny vwar.

Parey mon dir enn nou bann gran defi, se ki nou napa sifizaman dimoun spesyalize pou fer bann tes ki neserer. Mersi Mr Speaker.

MR SPEAKER

Mersi Minis. Onorab ou annan siplemanter?

HON PHILLIP ARISSOL

Wi Mr Speaker. Eski Minis i kapab dir Lasanble ki kantite

sesyon terapi ki en zanfan i bezwen apre ki in ganny dekouver ki i otistik? E konbyen sa i koute?

Ki kantite sesyon i bezwen e konbyen en sesyon i koute? Epi, ki Minister Lasante pe fer pou ankouraz bann zenn pran letid dan sa size partikilye? Mersi.

MR SPEAKER

Mersi Onorab. Minis.

MINISTER PEGGY VIDOT

Mersi Mr Speaker. Mersi Onorab pou ou kestyon. Otizm, Onorab i pa en kondisyon ki tou zanfan otizm i egzers menm kalite karakteristik ou si non menm kalite sentonm.

I baze lo en *spectrum*. Alor i pa en ka, i kapab bezwen, dizon 6 terapi, diferan terapiz, en lot ka i kapab bezwen zis 2. Alor mon pa pe kapab vreman reponn ou kestyon pou dir ki kantite sesyon en zanfan i bezwen.

En zanfan i bezwen kekfwa *speech therapist*, i bezwen psikolog, i bezwen enteraksyon nitrisyonnel, i bezwen en terapi avek dantis. I bezwen en kantite.

E alor i pou varye lo ka par ka. Akoz i varye lo ka par ka, mon pa pe kapab osi donn ou en kou pou sak, pou son tes.

Me parey ou'n dir, mon ti a kontan pran lapel wi, pou demann dimoun pou plis etidyan antre dan Servis Lasante, fer en letid dan Lasante akoz i annan en kantite bezwen dan diferan spesyalizasyon.

Alor wi, nou pe eseye avek nou lekol Lasante pou kontinyen atir dimoun avek nivo akademik pou vin fer sa bann letid.

MR SPEAKER

Mersi Minis. Onorab Norbert Loizeau.

HON NORBERT LOIZEAU

Mersi Mr Speaker, bonzour Minis ek ou delegasyon. Mr Speaker mon anvi demann Minis, vi ki sa bann, vi ki sa bann tes i ganny fer prensipalman isi *Mahe*.

Dernyen fwa ti annan 1 ka nou ti pe dil avek ansanm avek Onorab Woodcock, en fiy Praslin. Nou ti pe sey fer fason pou ed li akoz i ti pe ganny en pe difikilte, i annan en zanfan otizm.

Eski, vi ki sa i fer *Mahe*, e i kout bann, eskiz wan bann Onorab Praslin, mon pa Onorab Praslin me selman mon pou adres sa.

Vi ki i kout zot bokou sa bann paran pou kit zot piti ek en dimoun, pou desann Mahe.

E parfwa zot vini zot asize Mahe mon rapel, Onorab Woodcock a demanti mwan, i desann, i ganny randevou pou desann, nanryen pa arive. I bezwen degaze taye ale al pran avyon retourn Praslin.

Zot re dir li retournen Lendi ankor, ki zot pe fer konmsi pou sa servis ariv lo bann zil? Konmsi a soulaz en pe sa bann, sirtou sa bann zenn manman ki annan sa bann zanfan ki annan sa bann ka parey. Mersi.

MR SPEAKER

Mersi Onorab. Minis wi.

MINISTER PEGGY VIDOT

Mersi Onorab pou ou kestyon. Wi, parey tou servis spesyalize, nou pe regarde ki sa ki nou kapab fer sir ki i ariv lo Praslin avek La Digue.

Akoz nou'n realize poudir sa i en mank, i en demann ki nou bezwen arive fer. Me parey mon'n eksplike, nou napa bokou resours imen dan sa domenn.

Alor letan ou pe retir zot pou anvoy zot lo en zil, ou pou bezwen fer sir ki ou annan sifizaman dimoun laba pou ou

pe fer, pou ou, pou zot servi zot letan byen.

Me sa ki nou kapab fer, se fer sir si en dimoun Praslin i ganny en *appointment* pou vin isi, ki i ganny en priyorite pou pase, Praslin ou La Digue. Konmsa ki sa leksperyans ki ou fek dir i pa arive.

Akoz si zot in deplase zot in arive, omwen donn zot sa priyorite, fer zot *assessment* boner, koumsa zot pa bezwen retournen san vwar personn. Sa toudswit i kapab ganny fer si i pa pe fer. Mersi.

MR SPEAKER

Mersi Minis. Onorab Audrey Vidot.

HON AUDREY VIDOT

Mersi Mr Speaker. Minis ou'n dir poudir resours imen i en kontrent. Eski Minister Lasante pe prioritize son bann *human resource*, resours imen ki i santi poudir i pou enportan pou li annan pou zisteman adres sa konsern ki'n ganny leve atraver kestyon Onorab Arissol?

E nou konnen Gouvernman pe enplimant reform. E eski ou kapab asire ki reform pa pou tous en pti pe lo sa bout laspe imen ki tous dan bezwen nou bann spesyalis kot Minister Lasante?

Aprè dernyerman, Minis letan Onorab in demande ki i arive apre. Petet nou santi ki parfwa i annan en mank lyezon ant Ledikasyon avek Lasante, Minister Lasante.

Zisteman pou regard dan bezwen ek konsern sa bann paran ki annan zot zanfan ki'n *diagnose autistic*.

Akoz zot mank en bon pe gidans an term pou zot devlopman personnel sa zanfan, pou asire ki i pa ganny reste an aryer menm si in ganny *diagnose autistic*.

Akoz i annan bokou zot sa bann zanfan parey ou'n dir, i annan bann bezwen spesyal, me zot annan, me i annan bokou zot ki vreman entelizan e zot kapab avans devan. Mersi.

MR SPEAKER

Mersi Onorab. Minis.

MINISTER PEGGY VIDOT

Mersi Onorab. Pou reponn ou kestyon resours imen, i enn parey ou'n osi ou'n dir, i enn ki annan en gran defi. I annan en kantite spesyalis ki nou bezwen dan Lasante.

An se moman en bon pe sa bann spesyalis pe ganny pran dan bann lezot pei, aköz nou pa ankor ganny ase, pou nou dimoun pou nou menm, pou fer

en formasyon dan sa bann *areas*.

Me wi nou'n idantifye nou bann landrwa kot nou pou bezwen pe *channel* nou bann travayer Lasante pou fer spesyalizasyon.

E an term ki kalite swen sa bann dimoun i gannyen, nou realize parey nou'n dir, diferan ka i annan diferan bezwen. Nou travay ase etrwatman avek Minister Ledikasyon.

Enn bann profesyonnel ki fer bann tes pou dyagnostike, i en dimoun from Minister Ledikasyon.

E alor bezwen sak zanfan i ganny vwar e zot ganny refer avek sa bann spesyalis ki nou bezwen. Si i *speech*, si i dantis, si i psikolog, sa i ganny fer. Koman i ganny fer, i sa kestyon prezan ki nou pou bezwen pe vwar.

E si nou bezwen annan plis kolaborasyon ant Minister Lasante avek Minister Ledikasyon, mon asir ou poudir nou pou regarde ki sa i ganny fer e ki bezwen sa bann zanfan i ganny met dan en fason ki esansyel.

E wi, alor dan nou reform, nou kapab dir poudir regard resours imen i en keksoz tre i primordyal i kle. Mersi.

MR SPEAKER

Mersi. Minis nou a pas lo prosen kestyon. Nimero 78, Onorab Gervais Henrie.

HON GERVAIS HENRIE

Mersi Mr Speaker. Bonzour tou dimoun. Kestyon 78 i lir koumsa.

Swivan deklarasyon Minister Lasante ki an 2017 ti annan 340mil konsiltasyon dokter par an, eski Minis pour Lasante i kapab dir nou Lasanble, kwa ki pe fer ziska la pou adres sa sityasyon e ki progre in annan pandan sa dernyen 4 an? Mersi.

MR SPEAKER

Mersi Onorab. Minis.

MINISTER PEGGY VIDOT

Mersi Mr Speaker. Mersi Onorab. Mr Speaker bann sif pou konsiltasyon dokter pa'n neserman sanz bokou dan sa kad dernyen lannen.

Mr Speaker 340mil konsiltasyon dokter par an i pa neserman en sityasyon ki alarman. I vre ki kan sa i ganny analize i paret ki sak dimoun Sesel pe vizit dokter 3 a 4 fwa par an.

E si tou dimoun i vizit dokter zis aköz zot annan en maladi, sa i dan li menm li i paret en pe bokou.

Si la mazorite sa 340mil konsiltasyon ti pou bann rezon prevansyon kot nou ti annan sa, zot ti vizite pou zot ganny en *health promotion* aktivite.

Then nou ava dir poudir sa dan li menm i kapab ganny vwar koman en bon keksoz. Alors i enportan pou vwar rezon deryer sa bann konsiltasyon. Dimoun i vizit dokter pou diferan rezon.

Mon ti a kontan kekfwat kategoriz zot dan bann gran group. Group ki annan en maladi ki ase egi, ki zot bezwen en lasistans imedya parey en latou, en lafyev, en lekor fermal, en problem leptospiroz e keksoz koumsa.

Nou annan osi sa group ki vizit dokter, aköz zot pa en program prevansyon, en program promosyon lasante parey bann zanfan ki ganny vwar pou bann tes devlopman parey bann madanm ansent ki bezwen vin vwar dokter pou fer sir zot lansentman i deroul byen parey bann diferan group ki ganny teste, ki ganny en kalite, regard zot nivo lasante.

E osi pou bann dimoun ki annan serten kondisyon kronik kot zot bezwen ganny swivi tre pre. Alor si ou pe regard dan tou sa bann group, ou pe vwar poudir i annan zis en group ki

bezwen pe vini akòz zot annan en maladi ki egi.

Lezot i plis pou promosyon lasante. E sa 340mil dimoun dan konsiltasyon in ganny pran dan tou sa bann Sant Lasante lo Mahe, Praslin ek La Digue, enkli Silhouette. E sa osi in ganny fer dan bann dan Twa Zonn kot nou annan servis dokter spesyalize.

I osi annan bann vizit ki ganny fer pou diferan rezon ki pa neserman toultan grav.

Parfwa nou vwar ki i annan vizit ki repete. En dimoun kekfwa in al kot dokter ozordi pou en kondisyon e i pa satisfè avèk sa ki in vwar, in gannyen kot sa dokter, i ale, i al, kekfwa menm zour i al kot en lot dokter dan en lot distrik.

Ou si non, i posib in al war dokter, i pa ankor ganny en letan pou son medikaman kapab travay e li dan son lenkyetid i ale i al fer en lot konsiltasyon. E tou sa i *add* kantite konsiltasyon ki kapab gannyen.

Nou annan osi, vwar ki i annan dimoun ki tou le mwan bezwen pe al kot dokter pou zot swivi e swa pou zot ganny en lot preskripsyon, ou si non pou fer serten tes ki zot bezwen fer pou fer sir ki zot lasante i reste lo en nivo ki gard zot dan en leta bonn sante.

Nou annan en popilasyon ki dimoun i viv bokou pli lontan ki oparavan. E nou tou nou konnen ki parfwa letan laz i antre, i annan de kondisyon ki vin pli komen e alor sa bann dimoun osi i al kot dokter en pe plis.

E tou sa i *add* lo kantite konsiltasyon ki i annan. Dan bann letid ki nou'n fer nou'n osi realize poudir isi nou annan en gran nonm dimoun ki annan bokou faktor risk pou bann maladi ki nou apel *non-communicable diseases*.

Zis enn de sif par egzanp. Letan nou regard dan nou *database*, nou annan nou 18 mil dimoun ki annan tansyon eleve, ki bezwen tretman, ki bezwen war dokter souvan, regilyerman.

Nou annan 5500 dimoun ki annan dyabet, ankor ki bezwen war dokter regilyerman. Alor si zis ou pe regard sa, sa sonm, ou pe mazine poudir sa bann dimoun i bezwen war dokter, swa tou le mwan, swa tou le 3 mwan, i fer ki sa sif i monte.

Me pou nou, nou regard li koman en bon keksoz. Akòz nou pa pou oule ki sa dimoun ki annan sa kondisyon i pa pe ganny swivi. E alor ler sif i o nou bezwen detaye pou regarde ki sa ki pe vini.

An menm tan nou realize poudir kekfwa i annan dimoun ki servi servis lasante, kekfwa en pe en fason ki pa toultan ganny aksepte pou en keksoz, e zot pa pe vin pou en keksoz, zot pe vin pou en keksoz spesifik.

E si zot pa ganny sa keksoz spesifik parey nou dir, zot *shop around* ziske ler zot gannyen. Dizon zot ti pe vini, zot oule en *sick leave* e zot pa'n gannyen, zot pou al kot en lot dimoun, ziskan ler kekfwa ki zot vwar poudir zot pe gannyen.

An term ki stratezi ki nou pe met an plas? Nou bezwen frer sir ki nou stratezi i adres prevansyon.

Si nou gard dimoun an bonn sante, nou pou pe war ki dimoun i ava annan en nivo lasante, ki pa neserman bezwen anmenn zot pou al rod en konsiltasyon kirativ, me i a plito pran en konsiltasyon prevantif.

Alor Minister Lasante in toultan annan koman lobzektif primordyal, pou antreprann bann aktivite pou kominike e pou donn otan lenformasyon lo lasante, pou endividyel, pou group, pou popilasyon.

Lenformasyon pou popilasyon i en aktivite kontinyel ki toultan i ganny fer. E i ganny fer dan diferan

landrwa e par diferan group travayer Lasante.

Nou bezwen, sa ki nou pe met lanfaz lo la, se amelyor kalite swen ki nou donnen dan Servis Lasante.

Nou bezwen arive kapab fer nou bann dyagnostik ase boner, pou nou kapab arive anmenn en tretman, anmenn en keksoz, en fason pou ed dimoun *manage* zot lasante.

Nou realize osi poudir i annan baryer ennler an kominikasyon ant dokter avek pasyan. E nou pe fer nou mye pou nou kapab met plis dokter Seselwa, sirtou dan bann Sant Lasante kot i annan plis dimoun ki frekante.

E nou kontan pou dir ki sa lannen nou pe kapab *sponsor* 4 dokter Seselwa pou zot fer zot spesyalizasyon dan servis *Family Health*.

Ki sa spesyalizasyon ki nou bezwen dan sa bann sant. E nou panse sa pou ed nou pou amelyor sa servis e redwir sa kantite konsiltasyon ki pa neser, ki repete aköz dimoun pa'n ganny swen ki zot in bezwen annan.

Nou realize ki nou annan kantmenm en pti pe labi lo nou servis. E alor pou nou, nou pe regarde ki mannyer nou kapab fer sa desann.

Nou konnen poudir i annan en group, ki zot annan en serten *lifestyle* ki pa neserman promot Lasante, e pou zot nou pou bezwen vreman travay, ase en pe bokou plis avek zot pou fer sir ki zot nivo lasante i amelyore.

Me alor, letan nou regarde 340mil konsiltasyon dokter, i vedir ki nou popilasyon i annan akse. I napa lobstak, zot kapab ariv kot en dokter. E sa dan li menm li letan ou pe regarde, nou kapab vwar li koman en plis pou nou sistenm Lasante e pou nou popilasyon.

Akoz zot konnen zot bezwen servi Lasante. Sepandan Minister Lasante ti a kontan dir bann dokter, ti a kontan si bann dokter ti elev kalite sa 340mil konsiltasyon.

Nou demande ki bann dimoun, bann dokter i profit loportinite sa bann konsiltasyon pou tou bann tes depistaz ki fodre.

Ki bann dokter e lezot profesyonnel Lasante otour sa bann konsiltasyon i servi sa loportinite, sa bann konsiltasyon pou asire, ki tansyon, dyabet e lezot maladi kronik i byen kontrole.

Ki sa bann dokter i osi servi loportinite sa bann konsiltasyon pou mye konpran sa sitwayen ki devan li.

Akoz sa sitwayen i la, ki son sityasyon sosyal, mantal, fizik, ki pe vreman annwiy li e anpes li fonksyon a laoter ki i ti kapab fonksyonnen dan son lasante.

Si nou regarde tou pei dan lemonn pe travay for lebra kase, pou zot nobou ariv lo kouvertir sanniter iniversel *or universal health coverage*, parey nou konnen.

E isi Sesel nou sanse ki nou'n byen avanse dan sa demars. Me nou bezwen met kalite dan kantite. E se ver sa direksyon ki mwan personnelman mon ti a kontan diriz Minister Lasante.

Nou bezwen fer sir ki nou annan kalite dan lakantite. Nou swete ki dan fitir ki nou a kapab servi pli mwayen teknolozi avanse, pou pasyan e kliyan i a kapab enterakte avek dokter ek travayer Lasante.

Nou a servi teknolozi parey te le *medicine* ki ava ed nou pou kefwadiminyen sa konsiltasyon ki dokter i a kapab fer en tele konsiltasyon avek dimoun, ki pa bezwen toultan deplase.

E fer serten preskripsyon *online* avek nou sistenm *health information*. Ki dimoun i annan sa konsiltasyon, al dan son distrik, pa deplase pou vin

anvil, ou si nou vin Mont Fleuri pou vwar dokter.

E ki plis dimoun i a kapab ganny bon lenformasyon kredib atraver bann diferan rezo sosyal, parey *WhatsApp*, *Facebook*, en keksoz ki nou kapab ed zot pou mentenir zot lasante.

E ki fer dimoun i ava kapab annan en sistenm, viv en lavi ki pli an bonn sante. Mersi Mr Speaker.

MR SPEAKER

Mersi Minis. Onorab Henrie ou annan siplemanter.

HON GERVAIS HENRIE

Mersi Mr Speaker. Mon ti a kontan remersye Minis pou sa lesplikasyon detaye ki'n rekonfort nou lo sa sityasyon 240mil konsiltasyon.

Me mon anvi demann sa 2 kestyon swivan, Minis in dir nou ki nou kapab regard sa koman en plus pou pei.

Donk dan sa, baze lo sa *breakdown* ki ou'n donn nou, mon ti a kontan konnen si in osi annan en legzersis ouswa si Minister i kapab konsider sa bann legzersis swivan, pou nou kapab ganny sa bann lenformasyon e amelyor kalite servis ki nou pe donner.

Par egzanp *doctor to patient ratio* baze lo sa sif. Kou

konsiltasyon, swa lakantite letan ki en pasyan i pran pou li avan i ganny konsiltasyon dokter.

E osi petet en *survey* avek bann kliyan, pou kapab analiz ki kalite servis ki Minister Lasante pe donner. Sa i mon premye kestyon. Eski in annan en legzersis otour sa bann pwen.

Dezyenmman, Minis in avoue ki i kapab annan en serten kantite dan sa 340 mil ki rod *sick leave*. E zisteman, eski in annan en legzersis dan Minister pou vwar lakantite *sick leave* ki Minister i donner - dizon *annually*, e pou vwar si la i annan en mankman kek par. Swa labi par pasyan, ouswa menm par dokter ki pe zis pa serye. Akoz i annan en lot reperkisyon kot i afekte prodiktivite dan pei. Mersi.

MR SPEAKER

Mersi Onorab. Minis ou kapab adres sa bann pwen.

MINISTER PEGGY VIDOT

Mersi Onorab pou ou bann kestyon. Onorab mon ava pran sa enn dernyen an premye.

An se moman i annan en legzersis ki fer dan bann *Health Centers* selman, pa tro dan Twa Zonn ou si non dan Lopital. Kot

bann dokter ler zot war pasyan, zot rikorde konbyen letan zot *spend* ek sa pasyan, ki, si zot donn en preskripsyon e si zot donn en *sick leave*.

E a sa i en keksoz ki *ongoing*. Me nou konnen poudir i pa fer osi byen tout a lafwa. Nou panse selman ki avek nou *health information system*, sa i ava bokou pli fasil pou nou annan sa kalite donnen.

Akoz tou sa ki zot pou fer pou en pasyan i pou antre dan sistenm. E pou nou i a fasil pou nou vwar lekel dokter ki pe donn *sick leave*, konbyen *sick leave* dan en zour i ganny donnen, konbyen, pou ki kalite rezon;- si sa *sick leave* i zistifye ou si non, non.

So alor nou panse poudir sa i ava posib ler nou ganny sa. Nou lanfaz ki nou pe mete lo Lasante, se vreman pou nou amelyor la kalite servis.

Pou nou konnen ki mannyer nou pou amelyore, nou bezwen annan, konnen kote ki mal. E rezon - enn ou kestyon, se eski nou pe fer en *survey* pou regarde satisfaksyon pasyan avek servis?

Nou pa ankor fer, me i dan nou stratezi pou nou fer li dan lannen ki vini. Nou apresye pou, nou ti a kontan zot apresye

kekfw ki dan sa dernyen 1an edmi servis Lasante in vwar li anba en presyon pou *manage* sa *COVID*, alor en kantite keksoz ki ti pou kapab ganny fer in ganny met *on-hold*.

Me sa definitivman i enn. Ou'n demann mwan *ratio* dokter tou popilasyon, tou, zafer dokter, *CEO* i ava reponn sa. Ankor *cost*, *cost* nou pa ankor kapab *at the moment* donnen.

Me nou annan en - ler nou pou annan sa *health information system* i pou fasil pou nou kapab konnen ki *cost per* konsiltasyon, lo nivo distrik, lo nivo rezyon, lo nivo lopital.

So sa pou ed nou. E kekfw kan sistenm in etabli ou ava demann mwan sa kestyon mon ava annan repons. Mersi. Mon ava demann *CEO* pou zis donn nou sif pou *ratio*.

MR SPEAKER

Mersi. *CEO* ou a donn nou sa detay vitman silvouple.

CEO DR DANNY LOUANGE

Mersi Mr Speaker, mersi Minis, mersi Onorab pou ou kestyon. Pou zis reponn li an bref.

Wi nou pe *monitor* tou nou bann vizit konsiltasyon dokter, konsiltasyon ners e tou nou bann servis ki nou pe donnen

dan tou bann sant fasilite ki nou annan dan *Health Care Agency*.

E menm lo kote Polisi, lo kote Minister Lasante osi o e *monitor* ki pe ganny fer dan diferan fasilite.

E enn bann edikater kle i *doctors consultation*, e sa pe ganny *monitor* toulezan. E menm konpar avek nou annan en *target* ki dan nou *National Health Strategic Plan*.

E *so far* nou pe *maintain*, nou *meet* sa *target* ki ti apepre, la letan nou'n dernyen ki nou'n fer, nou'n *assess* i 2019. Ki ti 4 mil, 4 vizit *per capita*.

E sa osi i konparab avek ki *WHO* pe demande *international standards*. E i en pti pe pli ba ki avek *OECD*. So an bref nou pe *monitor* sa bann endikater. Mersi Onorab pou ou kestyon.

MR SPEAKER

Mersi *CEO*. Nou a pas lo prosen kestyon, 79, Onorab Gervais Henrie.

HON GERVAIS HENRIE

Mersi Mr Speaker. Kestyon 79 i lir koumsa. Swivan publikasyon en rapor an 2018 ki ti montre ki omwen 50 pousan zanfan Seselwa aze ant 8 a 10 i obez, eski Minis pour Lasante i kapab dir nou Lasanble ki bann mezir

lentervansyon bann lotorite konsernen in vin avek?

Ki program ki aktyelman an mars e ki rezilta i pe anmennen? Mersi.

MR SPEAKER

Mersi Onorab. Minis.

MINISTER PEGGY VIDOT

Mersi Mr Speaker, mersi Onorab pou kestyon. Pou komanse Onorab, si ou ti ava permet mon pou fer en pti klarifikasyon lo sa statistik, ki baze lo en letid ki ti ganny fer dan zis 176 zanfan dan P4 2018.

Nou statistik Nasyonal dan program *screening* dan bann lekòl i montre ki an - e sa i pli konpreansiv akòz i pran bokou plis zanfan, ki an 2018 ti annan 32 pousan bann fiy e 25 pousan bann garson ki ti swa *overweight*, swa obez. Pa neserman ki tou i ti obez.

Minister Lasante i bezwen travay an partenarya avek diferan lotorite e *stakeholders* pou redwir to lobezi dan Sesel e sirtou dan zanfan.

Obezite i en maladi ki annan en kantite lakoz. Alor i en kondisyon ki bezwen kolaborasyon plizyer lezot Minister, plizyer lezot lazans e lorganizasyon dan sekter piblik, osi byen ki dan sekter prive.

Pou arive adres sa problemm lobezi, stratezi i bezwen adres akse avek manze ki nourisan e a en pri abordab. Akse ek prodwir lokal e akse avek bann striktir pou siport aktivite fizik.

Minister Lasante in met an plas diferan program. I annan en lenplimantasyon lo en Polisi pou nitrisyon dan lekòl e gidans ki pou permet ki kalite manze i ganny vann dan kantin lekòl.

Depi plizyer lannen Minister Lasante pe travay avek Minister Ledikasyon pou asire ki bann zanfan i ganny byen edike lo lenportans manz byen e manze an bonn sante.

Premye Polisi Nasyonal pou sa nitrisyon dan lekòl ti sorti an 2008 e sa ti adres diferan keksoz lo nitrisyon.

Sa Polisi ti ganny ranforsi avek revizyon en piblikasyon, ki ti donn en gid pou ankòr dan kantin lekòl pou asire ki zot ti met azour tou bann nouvo levidans syantifik lo bann faktè ki ti pe kontribye dan sa, dan lobezi global.

Sa i enkli rapor ki sorti dan bann sours kredib parey kot Lorganizasyon Mondyal pou Lasante ki'n montre levidans ant lyen konsonmasyon labwason dou ki en gran faktè ki pe kontribye dan sa lobezi.

E osi byen ki konsonmasyon bann lavyann rouz e *processed*. Ki byen lye avek kanser, sirtou kanser kolonn.

Depi lannen pase Minister Lasante pe travay avek Minister Ledikasyon, pou reviz sa Polisi Nasyonal pou nitrisyon dan lekòl. E anv i ki nou realize poudir sa Polisi i deza date 13an e sa travay i ankòr pe kontinyen.

I annan kantite ki ganny fer, i annan ledikasyon nitrisyon dan lekòl. E sa i fer par Minister Ledikasyon, Minister Lasante. E sa souvan i ganny fer dan, ansanm avek dan PSE, Ledikasyon Fizik e Sosyal.

Nou fer sir avek Minister Ledikasyon ki i annan lakse ek delo pou zanfan dan lekòl. Akoz sa pou redwir lakantite labwason dou ki zanfan i bwat. Nou fer ledikasyon nitrisyon lo nivo Nasyonal.

Sa dan tou fason depi ki plis ki 2 deseni sa bann ledikasyon i kontinyen. Minister Lasante i osi travay avek Minister Finans pou met en *sugar tax* ankòr, pou dekouraze ki keksoz dou i ganny konsonmen.

Akoz nou realize pou dir sa i en gran, i en gran pa ki ankouraz lobezi. Me nou

realize poudir plis i bezwen ganny fer.

Sirtou dan domenn regilasyon, dan domenn Polisi, pou fer sir ki nou annan en Polisi Nitrisyon Nasyonal e sa pe ganny travay lo la.

In ganny retar akòz en pe COVID, me nou panse ki dek ki sityasyon i amelyore nou pou kapab re pran sa travay.

Nou bezwen ankouraze, e nou pe travay avek tou partner pou fer sir ki aktivite fizik i ganny ankouraze dan lekòl par Konsey Nasyonal pou Spor osi byen ki dan kominote.

E nou bezwen nou tou, tou dimoun ki annan zanfan, fer sir ki nou enkilke dan zanfan sa nesesite pou zot aktiv, pou zot zwe, e pou fer keksoz fizik omwe zis asiz e zwe avek *games* lo *phone* ou si non lo televizyon.

Nou annan konsiltasyon ki nou fer, nou annan nitrisyonnis, nou napa bokou, nou annan zis 2 a se moman ki donn sa servis pou zanfan pou ede, ler zanfan in arive ki i *overweight* e i obez, ki zot kapab asize ansanm ek paran travay lo en meni ki pou ed zot redwir zot kantite, pou zot manz an pli bonn sante.

E alor mon santi Onorab, ki sa bann kalite aktivite i ava ede. Me i responsabilite tou

dimoun, sirtou bann paran, pou fer sir ki nou ankouraz nou zanfan e ki nou donn zot sa kalite nitrisyon ki zot bezwen.

E nou bezwen fer sir poudir sa bann kalite nitrisyon ki zanfan i bezwen, i a la porte dimoun e ki dimoun i annan plis lenformasyon pou zot fer sa kalite swa ki zot bezwen fer. Mersi.

MR SPEAKER

Mersi Minis. Siplemanter Onorab Henrie.

HON GERVAIS HENRIE

Wi. Mersi Mr Speaker. Mon ava annan 1 kestyon siplemanter e 2 pti sizesyon.

Par lefe ki sa rapor ler ti sorti zot ti dir ki zanfan ki obez i gard sa risk ki dan adilt, zot osi vin obez e devlop bann maladi parey dyabet, kardyovaskiler.

Donk demen nou pa anvi en popilasyon ki pa an bonn sante. An vi ki Bidze pe vin devan nou, mon anvi konnen ki konponan bidzeter, Minister Lasante in mete dan Bidze pou asire i annan sa resours, pou fer sir ki nou annan bann program pou evit sa bann katastrof lasante a lonterm.

E la kot mon 2 sizesyon i vini, par egzanp Minis in koz

bokou lo bann program ki annan dan lekòl.

Zanfan i tande kekfwa dan lekòl atraver *PSE*. Me paran li i pa kot lekòl, e letan mon regar televizyon, mon pa war bann program atraver *health promotion*, pou ankouraz bann adilt pou get konsernen avek sa bann size. Mon pa war ase si i annan.

E dezyenman en lot sizesyon,. Mon krwar dan Polisi Lakaz Sesel ozordi, i merit annan plis pouse par Minister Lasante ki kot tou *Housing Estate* i annan en pti *playground* pou bann manmay kapab taye.

Akoz dan mon distrik sa i manke, nou pa kapab zi sfer flat ki zanfan pa kapab sirkile deza ladan. E zot napa en landrwa pou de foule. Mersi.

MR SPEAKER

Mersi Onorab. Minis wi.

MINISTER PEGGY VIDOT

Mersi Onorab. Wi mon toutafe dakor avek ou, ki nou Bidze i merit annan bokou plis lo bann, lo fakter prevansyon. E i pa le ka. i toultan nou vwar ki swen dan Lopital akòz i pli koute.

E swen kirativ i ganny bokou plis sa porsyon Bidze ki bann program prevantif. I en

keksoz ki nou pe revwar dan *Health Care Agency* dan *Public Health* pou nou fer sir ki sa i le ka.

Me nou osi konnen poudir tou nivo nou bezwen entegre sa bann kalite lenformasyon. E pou sanmenm sa letan nou pe dir sa bann konsiltasyon ki dimoun i fer.

Ler sa dimoun i vini ki dokter i pe teste son pwa, ou si non, menm i pa pe teste i pe vwar poudir i en pti byen *padded*.

I pe kapab koz lo nitrisyon avek li. E fer sir ki tou kous, a sak loportinite kot i annan nesosite pou koz lo sa bann kalite keksoz ki sa konversasyon i ganny fer.

Nou realize poudir wi, nou bezwen pli vizib dan bann program prevansyon, dan bann program *health promotion*. Servi bann resours ki nou annan a nou dispozisyon pou fer plis program.

E sa nou pe regarde. E dan mon lentervansyon pli boner, mon ti dir poudir pou nou kapab arive annan en program ki byen, nou bezwen regard diferan Polisi.

E bann Polisi parey ou pe dir, annan plis plas pou zanfan zwe, fer sir ki i byen.

E ler nou travay etrwatman par egzantp avek

IECD, kot zot, enn zot bann standar se ki zanfan i bezwen annan en serten nonm minit, erdtan ki zot pe fer aktivite fizik e pou nou se sa, nou travay avek tou group pou nou kapab fer li.

E la par egzant pou bann *Petite Enfance* nou vwar poudir i deza entegre dan ou bann standar. E dan lekol nou pe fer sir poudir sa i enkli letan nou pe fer bann *PSE* sesyon.

Akoz souvan zot demann Lasante pou fer li. Me Polisi parey ou'n dir, fer sir ki bann plas kot dimoun i bezwen fer en aktivite fizik i enportan. E sa se sa ki Lasante i pou toultan ankouraze e pous for. Mersi.

MR SPEAKER

Mersi Minis pou sa repons. Nou bezwen avans lo prosen kestyon e sa i Kestyon Irzan sorti kot Onorab Churchill Gill.

HON CHURCHILL GILL

Mersi Mr Speaker, bonzour Minis avek delegasyon, bonzour tou Manm. Kestyon i lir koumsa;-

Minis an relasyon avek ou dernyen vizit ki ou ti fer kot Lopital Baie Sainte Anne Praslin kot bokou keksoz pertinan ti ganny fer sorti atraver vizit e en *meeting* ki ti

swiv lo sityasyon e leta Lopital Baie Sainte Anne.

Eski Minis i kapab enform Lasanble pou benefis zabitan Praslin kwa ki ou Minister in kapab adrese? Kwa ki pa ankor ganny adrese e kan ou Minister i ekspekte adres sa bann *issues* ki pa ankor ganny adrese? Mersi.

MR SPEAKER

Mersi Onorab. Minis.

MINISTER PEGGY VIDOT

Mersi Mr Speaker. Mersi Onorab pou ou kestyon. Mr Speaker mon dernyen vizit kot Lopital Baie Sainte Anne ti Vandredi le 13 Out 2021.

Mon kontan dir poudir dan sa vizit mon ti ganny akonpanyen par avek Onorab Gill, Onorab Woodcock e Onorab Porice.

Ti donn mwan en sans pou osi annan dyalog avek zot pou vwar bann problem lasante ki zot koman bann Manm elekte pou sa 2 distrik Praslin ti kapab anmenn devan, pou nou kapab amelyor servis ki nou pe donner lo sa zil.

Pandan sa vizit mon ti ganny loportinite ansanm avek sa 3 Onorab pou vizit tou bann servis e rankontre *staff* kot Lopital Baie Sainte Anne.

Plizyer keksoz ti ganny fer resorti, problemn ki ti annan, swa avek lenfrastriktir, swa avek *management*, swa avek lezot laspe donn swen lasante lo Praslin.

Pou reponn ou kestyon Onorab, nou ti, sa ki nou'n kapab adrese ziska prezan, se sistenm nimerik kot resepsyon pou fer lanrezistremman kliyan ek pasyan parey nou pe komans fer Mahe dan nou premye pa pou nou *roll out* nou *health information system*.

DICT in retabli koneksyon *internet* e in met en *computer* pou travayer lo resepsyon kapab fer sa bann anrezistremman. Nou bann travayer in ganny formasyon lo ki manner zot pou fer antre sa bann lenformasyon.

E sa in form parti sa premye pa faz dan *health information system*. Proze repenn Lopital, adres problemn koule e sanz plafon.

Pou sa kontrakter pou sa proze i deza lo sit e pe fer preparasyon pou komans travay Lendi prosen le 20 Septanm.

Sa kontrakter i responsab pou adres problemn koule, adres problemn bann plafon ki pe desann, kot in ganny afekte, tret tou sa bann *fungus* ki i

annan lo bann diferan miray ek lo plafon.

Repenn tou sirfas miray, anndan, deor Lopital. Sa louvraz i ekspekte pou pran, e menm bann lafnet, bann laport e bann *skirting* ki nou vwar ti pe sorti, ti bezwen ganny ranplase.

Tou sa pou ganny fer. E i pou pran apre sa 8 mwan pou konplete. Me nou panse ki apre sa i a konplete, Lopital *Baie Sainte Anne* i ava ganny en bon *facelift*.

Nou pe rekomans klinik spesyalize ki ti en problemn. E nou realize poudir, pandan letan *COVID* en pe sa bann spesyalis pa ti pe kapab al Praslin e ki La Digue eksepte bann *gynae* ki ti bezwen pe ale.

E se pou sa rezon nou'n rekomans, nou'n vwar nou kapab rekomanse. E Minister in etidyan bann kantite dimoun ki bezwen ganny vwar.

Enn bann problemn sete ki dimoun ti santi poudir zot pa ti pe kapab ganny, tou dimoun ganny vwar aköz dokter pa ti pe reste ase lontan.

Nou'n etidye lalis, nou'n vwar kot i pou bezwen kas group Praslin avek La Digue. Fer spesyalis al La Digue pou bann pasyan La Digue.

Koumsa i a donn plis letan pou bann dimoun Praslin e plis letan pou bann dimoun La

Digue osi ki zot pa pe esper en gran kantite letan. Nou'n fer li e klinik pe rekomanse.

Biro Lasante Piblik ki ti bezwen ganny sanze, al dan en lot *building* in ganny fer. Alor ki prezan problem *pharmacy* ki tro ptipti, ki tro sere, i ava ganny rezourd, akoz zot, zot a kapab bouz dan sa lot landrwa kot *pharmacy* ti ete.

Retar peyman bann kontrakter Praslin in bann *providers*, i pe ganny rezourd, en kantite peyman in ganny fer, e nou'n set en standar ki tou peyman i bezwen ganny fer dan l mwan.

Alor *financial controller* i lo la, i pe travay lo la. Kominikasyon ek sipor ki staff ti pe demande, nou'n revwar, in ranforsi.

E se pou sa ki nou pou fer sir ki keksoz de baz i toultan annan Praslin ki zot pa manke, zot annan en sistenm ki an plas, ki kapab travay avek. *Maintenance* lo *sewage treatment plan*, de nouvo *submersible pumps* in ganny aste pou sa *STP* laba e nou'n ganny lasistans avek enzenyer *PUC* pou fer son lenstalasyon.

Sa i ava rezourd sa bann problem ki nou ti pe gannyen avek *STP*. E an menm tan *PUC* pe organize pou fer *preventive maintenance*

lo sa zenerater Baie Sainte Anne.

Mr Speaker bann *issues* ki ziska prezan dan sa dernyen mwan nou pa'n kapab rezourd, se fer rezilta *CT Scan* kapab ariv Praslin pli vit.

Me dan nou sistenm nimerik ki nou pe devlope, apartir lafen dimwan Septanm, komansman Oktob, dek ki nou pe ganny *computer* dan bann lasal konsiltasyon bann dokter, sa i pou posib.

Dokter i a kapab log on e vwar rezilta *X-ray*, *CT Scan*, rapor ki pasyan in fer. Nou *ultrasound* lo Praslin, nou ankor annan en gran *waiting list* ki nou pe fer fason pou redwir.

E zot pe rekomans fer le 22 Septanm. *Staff* pou *uniform*, in fini ganny plase mezir. E nou santi nou konnen poudir disi mwan prosen zot ava ganny nouvo liniform parey zot ti pe demande.

Landrwa kot servis laboratwar, i pa ankor kapab ganny adrese. Akoz nou bezwen fer renovasyon lo sa vye lakwizin pou nou kapab fer laboratwar bouz laba.

E koman sa pa ti dan nou *scope of work* pou sa kontra ki nou'n donn sa kontrakter, nou pou revwar e regarde si sa i kapab ganny fer an menm tan

ki zot lo sit, e sa i ava ganny adrese.

Praslin, Grand Anse Praslin parey nou ti diskite, *quotation* ki nou'n gannyen i tro bokou pou fer sa bann kalite laranzman avek sa vye *building*.

E sa in ganny anvoye pou kan nou ava ganny Bidze pou nou kapab adrese.

Servis psikolog e *occupational therapy* ki ava adres, ede pou adres pasyan ki annan otizm lo Praslin, sa pe ganny, in ganny konsidere pou entrodwir e nou pa ankor kapab fer li.

Alor nou reste konfidan ki sa bann moman pou arive enn ler kot sa bann keksoz ki nou pa ankor kapab fer, nou pou fer li. E, me sa ki nou'n kapab rezourd dan sa dernyen mwan, nou'n fer. Mersi bokou.

MR SPEAKER

Mersi Minis. Wi Onorab Gill ou kapab met siplemanter.

HON CHURCHILL GILL

Mersi Mr Speaker. Mersi Minis pou ou bann klarifikasyon lo bann keksoz ki'n kapab adrese. Mon ti annan 3 keksoz ki mon bezwen met devan ou Minis.

Parey nou'n kapab konstate dan nou vizit, se ki tou sa bann keksoz ki sa kontrakter

pe al fer i kler ki ti mankman en program *maintenance*.

E sa in fer ki sa bann keksoz in deteryore, in deteryore ziska ler nou'n kapab vizit li, nou'n vwar kantite defayans i annan.

Alors menm si nou pe met en kontrakter lo la ki byen, me selman mon krwar Minister osi i bezwen met en program *preventive maintenance* anfers pou ki i asire ki ler sa travay i ganny fini fer, i ava annan swivi.

Ki asire ki bann pasyan ki vin servi Lopital Baie Sainte Anne, Lopital i ava dan en leta ki zot kapab ganny zot tretman. Sa i enn.

Apre dezyenm, en keksoz ki pa'n ganny mansyonnen, se *laundry*. Parey nou konnen i annan tou sa bann *linen* ki devret ganny lave.

E sa pa'n ganny mansyonnen dan program, lo kote kontrakter bann travay ki annan pou fer. Si ou kapab donn nou en lide lo kote *laundry* kwa ki pou ganny fer.

Apre en lot keksoz se bann lekipman, dan nou vizit osi nou'n vwar en bon pe lekipman in *obsolete*.

Me selman zot pe okip bann lespas, aprezan sa pou ganny permisyon pou zot *write-off*, sa i en keksoz ki pe pran en

kantite letan. E dan sa *process* sa bann lespas i ganny okipe.

Ki petet ti kapab ganny servi pou en lot keksoz. Sa osi petet si ou kapab donn nou en nide, kwa ki pe mazin fer pou nou kapab adres sa.

Apré mon lot konsern lo la Minis, se ki sa ki nou'n dekouver dan ou vizit, i osi montre ki menm Minister i ganny en gro Bidze, me selman depans ki ganny depanse pou Praslin, i kler poudir sa i tre minim.

Se sa ki ozordi nou vwar nou bezwen al adres tou sa bann problem. Alors mon ekspekte dan Bidze 2022, sa i ganny pran an kont ki ler Bidze i vin devan nou pou diskite, nou a war poudir serten alokasyon in ganny klerman definir, konmkwa sa pou ganny depanse lo Praslin.

E sa i ava asire ki leta Lopital i ava reste lo en standar. Pou tou bann pasyan ki bezwen vin deservi Lopital, zot ava konfortab pou zot kapab ganny trete. E menm bann ki pe reste dan Lopital pou serten maladi zot ava konfortab. Mersi.

MR SPEAKER

Mersi Onorab Gill pou ou bann kestyon. Minis.

MINISTER PEGGY VIDOT

Mersi Onorab. Onorab lo kestyon *maintenance of building*. Sa i enn bann gran defi Minister Lasante.

Nou annan en kantite *building*, nou annan en kantite Sant Lasante dan bann distrik. Nou annan en Lopital, Seychelles *Hospital*.

Nou annan tou sa bann fasilite nou annan en gran defi, akoz larzan ki ou bezwen pou fer sa kalite *maintenance* i pa'n ganny *allocate* pou sa bann zafer.

Ki fer parey ou dir, Lopital *Praslin*, Lopital Baie Sainte Anne in annan en kantite lannen kot travay ki ti'n merit fer pou anpes li vin dan sa sityasyon ki ti ate, pa'n ganny fer.

I menm keksoz ki nou pe vwar kot diferan *Health Centers*. E kekfw i enn bann pwen feb ki nou annan, kot nou pa met fizikman, nou fer en *building*, me nou pa met sifizaman larzan pou nou fer sa kalite *maintenance* ki bezwen pou nou mentenir li, lo sa nivo ki i merit ete.

Alor i komans deteryore en pti bout, i deteryore en lot bout e apre ler pou aranze kou i bokou. Me nou'n pran, mon'n pran not, i en keksoz ki nou pe regarde ki mannyer nou kapab adrese.

Laundry wi, i pa en keksoz ki kekfwa mon'n mansyonnen. Me i en keksoz ki pe ganny adrese, parey nou pe dir nou bezwen regard zot bezwen an term kantite *linen* ki annan pou fer *laundry*, ki kalite masin ki pli, ki zot pli bezwen.

E sa i pa ankor ganny adrese i ankor pe ganny etidye. Pou *write-off* bann lekipman, wi i en prosedir ki ase long, me selman i pe ganny fer.

E ankor mon konpran ki nou annan en pe retar akoz bann dimoun ki bezwen pe al Praslin pou al regarde, pou donn nou permisyon pa'n kapab fer li pandan sa letan *COVID*.

Me i pe ganny adrese. Si nou kapab met plis Bidze Praslin, avek par sityasyon kot nou annan program *based budgeting*, nou pa pe kapab dir sa i pou Praslin, sa i pou La Digue, sa i pou Anse Royale.

Me selman i, sa ki nou pe vwar, se ki nou bezwen fer sa bann program lo menm nivo dan tou landrwa.

E alor mon lekspektasyon se ki definitivman Praslin son program Lasante, bann diferan program ki i annan, i pou annan li lo menm nivo ki nou pe annan lo Mahe, lo *La Digue*.

E mon panse sa sete en pe ou bann konsern ki mon'n note. Mersi.

MR SPEAKER

Mersi Minis. *Ok*, vi ki nou lo Lopital Praslin ki servi tou Praslin, mon a permet Onorab Woodcock *extend* en pti gin sa siplemanter, si ou kapab al direkteman silvouple.

HON WAVEL WOODCOCK

Ok, mersi Mr Speaker. Minis mon apresye travay ki ou Minister pe fer pou adres en pe sa bann *issue* kot sa Lopital ki annefe i bann problem ki ou'n erite.

I pa fer premye fwa ki sa bann *issue* i mont dan Lasanble, Sizyenm Lasanble mon ti annan en Mosyon, Onorab Gill osi a plizyer repriz in adres sa bann *issue* ki annan kot sa Lopital.

Mon apresye dan sa kourt letan ki ou'n la, ou'n antre ou pe sey ed en pe avek sa bann size.

Mon kestyon ki mon pe demande, a pepre konbyen larzan ki par lefe ki sa, i napa en *proper maintenance plan* pou sa Lopital.

Konbyen larzan ki pou kout ou Minister aktyelman la, pou ou fer en renovasyon

konplet lo sa Lopital, ki enkli sa laboratwar?

Ki ozordi aneefe i pe ganny, laboratwar i aktyelman en *store* ki zot in fer en nespes *makeshift* avek pou vin laboratwar.

Konbyen apepre ou bezwen pou ou fer, konmsi en travay adekwat, konplet, pou *over* en *complete refurbishment of sa lopital*?

Mon ti a kontan parey La Digue in ganny li en '*State of Villa Hospital*', menm si ou ti fer en petisyon an regardan lopital. mon ti a kontan ki nou kapab ganny sa bann keksoz ki nou bezwen en fwa pou tou.

mon konnen i pa pou vin deswit, me selman in *the long term*, konbyen apepre larzan zot bezwen pou nou kapab fer sa *complete refurbishment* lo sa lopital? mersi bokou.

MR SPEAKER

Ok Onorab. Nou'n konpran ou kestyon, mersi. Minis.

MINISTER PEGGY VIDOT

Mersi Onorab pou ou kestyon. Onorab pou reponn ou kestyon, mon pou bezwen en, mon pou bezwen lasistans enzenyer ek lezot dimoun ki pou vini pou donn nou en bon *scope of work after which* nou ti a kapab fer en *costing* pou nou

konnen ki kantite nou bezwen pou nou fer en *complete refurbishment*.

Pou le moman parey mon'n dir, nou pe adres bann problem ki nou vwar la. E nou espere ki sa i ava kapab tenir nou pou en pe letan. Me nou pa pe aret la.

Nou angaze pou nou fer sir ki nou bann batiman i ganny mentenir dan en serten fason, ki nou pa arive apre annan gran kou pou fer, pou fer gran travay *renovation*.

Malere mon pa kapab promet ou en lopital parey La Digue, me i dan plan pou regarde ki mannyer nou kapab amelyor diferan striktir, lenfrastriktir ki nou annan dan Minister. Mersi.

MR SPEAKER

Mersi. Bon nou pou pas lo Kestyon *Without Notice*, sorti kot Onorab Sophola. Mon a zis fer en pti remark ki dan rapor in kapab ganny en pti pe mal reprezantasyon.

Kestyon ki Onorab Sophola i oule poze dan son kestyon ki mon konpran, i lo lezot vaksen ki bann zanfan i gannyen, pa lo vaksen *COVID*.

Sa mon krwar in ganny en pti pe mal enterprete dan en rapor lo Nouvel. Onorab

Sophola ou kapab poz ou kestyon.

HON NOLINE SOPHOLA

Mersi Mr Speaker. Bonn apre midi ek tou delegasyon, ek tou dimoun ki a lekout. Mon kestyon i *comme* swivan;-

Minis i annan plizyer pti baba ki pa'n ankor ganny zot vaksen pandan letan *COVID*. Minis ki plan oubyen stratezi ki ou Minister pe vin avek pou asire ki sa bann zanfan i ganny tou zot bann doz apropiye? Mersi Mr Speaker.

MR SPEAKER

Mersi Onorab. Minis.

MINISTER PEGGY VIDOT

Mersi Mr Speaker. Mersi Onorab pou ou kestyon. Mr Speaker, vaksen i en metod prevansyon pou maladi enfektyez.

Mon Minister i met gran zefor pou ki tou baba e tou zanfan i ganny kouver avek vaksen dapre *schedule* ki'n spesifye pou Sesel.

Depi ki pandemik *COVID-19* in komanse, nou pa'n annan okenn enteripsyon dan program vaksinasyon rutin pou bann baba ek bann zanfan.

Tou vaksinasyon rutin in ganny fer dan tou Sant Lasante dapre *schedule* normal.

Ners pou vaksen dan Sant Lasante in fer swivi avek bann paran, paran bann zanfan ek pti baba ki pa'n vin pou zot apwentman vaksen pou diferan rezon.

Nou realize poudir dan sa letan, in annan souvan dimoun kekfwa ki'n swa dan karantenn, swa dan izolasyon e kekfwa ki pa'n kapab toultan swiv zot apwentman.

Nou realize osi i posibil i annan dimoun ki pa'n vini pou lot kalite rezon. I annan dimoun ki pa tro kontan sorti, akoz zot per zot a ganny lenfeksyon.

So in annan en serten pti gin dekalaz, me ki ou a vwar letan mon donn statistik i pa grav. Nou'n toultan annan en bon to vaksinasyon dan zanfan dan Sesel.

Nou ganny bokou korperasyon avek bann paran, e sa nou a ti a kontan remerisi. Akoz i gard Sesel koman enn sa bann pei kot to vaksinasyon i tre o.

Pa zis dan nou rezyon, me osi dan lemonn. Poursantaz vaksen ki'n ganny donner an 2020 ek 2021 konpare avek 2019 i pandan sa pandemik, i konmsa;

Nou annan en vaksen ki nou donner ler pti baba i ne, i *BCG* pou tiberkiloz. An 2019

nou ti ganny 100poursan kouver.

2020 nou'n annan 99. E pou sa premye *quarter* dan 2020 ankor i 100poursan. 3 mwan bann zanfan i pran en seri vaksen ki an tou i 1, 2, i 6 vaksen e 2019 ti 100poursan, 2020 i 97, an premye *quarter* 2021 i 99.7.

4 mwan zot ganny en lot vaksen, ankor i 100poursan pou 19, 100poursan pou 20 e 99.7 pou premye kar sa lannen.

4 mwan zot ganny en lot vaksen, ankor to se 99 an 2019, 98 an 2020, 98.6 pou sa premye trimes 2021.

5 mwan i annan ankor 6 vaksen, 98 an 2019, 97 an 2020, 93 an premye *quarter* sa lannen.

Lafyev Zonn 12 mwan e ankor 100 poursan 2019;- 96 an 2020 e pou sa premye trimes i 90.

15 mwan nou donn larouzol, larouzol alman avek malmouton. 100 poursan 2019, 97 poursan 2020, i 92 pou lannen, pou sa premye trimes.

mwan ankor en lot vaksen, 3 vaksen. 95.8 an 2019, 91 an 2020, 90 an 2000 premye trimes '21.

Konpare pou bann poursantaz an 2019 avek la, i napa en gran diferans. E parey

mon'n eksplike, souvandfwa nou ganny en pe paran i vin en pti pe retar, si en zanfan i annan en latou, si i annan en lafyev, zot pa pe anmennen, alor nou bezwen *reschedule*.

E i en pe parey dan bann lannen presede. E la mazorite letan nou kapab arive zwenn zot avan lannen fini, pou fer sir ki zot vaksen i ganny pran.

Alor Mr Speaker, avek plezir mon kapab anonse ki pou Minister nou santi poudir dan la gran par, nou azour avek program vaksinyon.

E bann paran ki pa ankor anmenn zot zanfan, nou ti ava demann zot pou anmennen e nou a fer sir ki tou zanfan i ganny sa proteksyon vaksen parey nou toultan dir. Mersi.

MR SPEAKER

Wi Onorab Sophola ou annan en siplemanter?

HON NOLINE SOPHOLA

Wi Mr Speaker. Mersi Minis pou ou leksplikasyon. Minis mon kontan ki in fer resorti tou bann vaksen ki bann zanfan i sipoze gannyen. Me selman mwan mon pou met lanfaz lo zis pour paran, petet sirtou bann ki'n les mwan okouran i annan sa bann problem konpran byen ki pe pase.

Minis par egzantp i annan sa polyo ki ou'n fek nonmen i donn dan 6 doz. Me sa polyo en zantfan in ganny son trwazyenm doz 5 mwan, i ti ganny sa le 30 senkyenm mwan 2020. E la sa zantfan i dan laz preski 22, 23 mwan i pa ankor ganny naryen tou sa letan, 18 mwan i pa ankor gannyen.

Parey i annan sa *DPT* ki li i osi sa 18mwan pa ankor gannyen, i annan sa *NMR first dose* ki 15 mwan ki i pa ankor gannyen. Me selman parey un dir kote sa *misunderstanding* in vini nou pa konnen.

Me selman mwan mon'n ganny dir ki klinik ti dir zot pa bezwen desanm ek zantfan aköz *COVID*. Me mon krwar in napa sa swivi.

Minis mon kestryon swivi i; eski sa *immunization schedule* pou ganny respekte prezan? E bann zantfan ki pa'n ganny sa bann doz vaksen, zot in fini zot laz, sey eksplik nou ki mannyer sa pou marse? Ki paran i devret fer? E osi ki reperkisyon ki pou annan lo lasante sa bann zantfan la? Mersi.

MR SPEAKER

Mersi Onorab. Wi Minis.

MINISTER PEGGY VIDOT

Mersi Onorab pou sa leksplikasyon. Me vaksinasyon

i enn sa bann program kot nou toultan apel, telefonnen, rod sa dimoun ki pa ankor vini.

E mon asire si i pa ankor ganny fer pour sa ka ki ou'n mansyonnen, kot in mank son vaksen 15mwan ek son vaksen 18mwan, sa pou ganny fer. E *Health care Agency CEO* i la i ava revwar tou bann.

Akoz i fasil pou nou aköz tou keksoz i lo *database*. E ou konn egzaktaman lekel paran, kote ki pa ankor anmenn son zantfan ki nou kapab apele. Nou kapab asir ou poudir sa i pou ganny fer.

Si pou annan lefe lenvers lo sa zantfan an term son vaksinasyon? I non. I pou kapab re gannyen e souvan sa i arive, en zantfan petet i pa kapab vin pran son vaksen letan i annan 15mwan, me i kapab pran li pli tar.

I plis en keksoz ki nou pa anvi donn en vaksen ler sa zantfan kekfwa son sistenm pa ankor ase devlope pou li kapab ganny sa vaksen, e sa i en pe pli boner *rather* ki pli tar.

So lo sa pwen nou kapab asir ou poudir nou pou fer nou mye pou fer *catch up*. Partou kot nou annan 90 nou pou fer nou mye pou fer ariv 100. E sa enn ka or 2 ka ki ou'n mansyonnen nou pou kapab

arrive zwenn li pou fer sir ki vaksinyasyon i a konplet. Mersi.

MR SPEAKER

Mersi Minis. Bon, ou annan ankor klarifikasyon Onorab? Ale.

HON NOLINE SOPHOLA

Mr Speaker zis pou Minis tre vit.

MR SPEAKER

Ale vitman silvouple.

HON NOLINE SOPHOLA

Minis vedir la ki mesaz ki ou anvii anvoy pou sa bann paran tre for, bann ki vreman pa ankor vini pou zot sorti pou vini, pou ki nou pa war zanfan i ariv 3an, 4an ki apre zot pe bezwen retourn ankor?

MR SPEAKER

Mersi. Ale Minis, donn li en repons silvouple.

MINISTER PEGGY VIDOT

Onorab mwan mon ti ava dir ek sa bann paran, pa ezite kontakte zot *Health Center* pou dir ki zot zanfan pa ankor pran zot vaksen e toudswit zot ava ganny zot apwentman pou zot kapab fer li.

E mesaz osi ki mon pou anvoye pou nou bann travayer lasante ki donn vaksen dan

Health Center regard ankor zot *database* tou bann dimoun ki ti ganny vaksen aler ki ti sipoze gannyen, fer sa lapel e fer sir ki nou kouver tou nou zanfan avek vaksinyasyon. Mersi.

MR SPEAKER

Mersi pou sa mesaz Minis. Minis ek ou delegasyon mersi pou zot partisipasyon sa long sesyon, nou apresye ki zot in kouver plizyer size ki ti konsern nou Manm e nou popilasyon.

Mon a dir zot mersi bokou e bonn apre midi e bonn fen lazournen.

Pou nou bann Manm nou a rebran travay 2er edmi e mon krwar nou pou al lo Mosyon. Mersi. Nou ava *adjourn*.

(BREAK)

MR DEPUTY SPEAKER

Bonn apre midi tou Mann Onorab e bonn apre midi bann ki pe swiv nou atraver medya.

Bon nou pou kontiny travay Lasanble pou sa Mardi, e apre zot nou pou al pas lo bann Mosyon pou la apre midi. E premye Mosyon mon *call* lo Onorab Regina Esparon.

HON REGINA ESPARON

Mersi Mr Speaker. Bonn apre midi tou dimoun a lekout. Mr Speaker Mosyon ki mon pe met

devan sa Lasanble pou aprouvasyon ozordi i lir koumsa;

Sa Lasanble i demande ki Gouvernman i komans en demars pou fer ki bann prodwir lizyenn pou bann fiy e madanm i vin pli afordab, e ki i angaz li lo en program pou asire ki bann fiy e madanm ki napa le mwayen pou aste i resevwar sa bann prodwi gratwitman.

Mr Speaker o komansman kreasyon, bondye ti kre zonm e apre i ti realize ki zonm pa pou kapab viv tousel e alor i ti kre fanm koman son konpany. Zonm koman en mal ti ganny donnen organ maskilen, e fanm ti annan organ feminen. E sa 2 organ ti diferan e sakenn ti annan son diferans ek fonksyon avek bi ede dan prosesis reproduksyon.

Par lanatir dan devlopman bann fiy pou vin madanm, zot bezwen war zot reg tou le mwan. E bokou dimoun pa alez pou koz lo la, e sa pa pou anpes nou abord sa size ki ganny konsidere koman en tabou.

E an mezir ki en fiy i grandi i realize ki war son reg tou le mwan pa en swa, me en keksoz ki i pa kapab anpese e ki i bezwen pas atraver sa letap ki form par son devlopman.

Parey nou ti pou dir an Angle *period is not a choice*, me

en keksoz natirel ki nou pa kapab anpes arive. Me ki nou kapab konsider li koman en bon keksoz ki arive anver son devlopman pou prepar sa fiy e son organ feminen pou pas atraver sa letap pou vin adilt. E pli tar pou konsevwar e ede pou fer grandi popilasyon.

Sa letap ki mazorite fiy ek madanm i pas atraver tou le mwan i dir 4 a 5 zour an mwayenn. E zot bezwen bann proteksyon izyenik, pour ki zot respe konfortab e kontinyen dan zot bann aktivite normal.

Mr Speaker sa bann prodwi izyenik i pa zis en komodite ki ganny servi me i en nesesite debaz. Mon soulinyen i pa en swa me en nesesite pou laplipar bann madanm e fiy otour lemonn e isi osi dan Sesel.

I osi enportan pou fer resorti ki sa Mosyon pe tous en size ki konsern plis ki lanmwatye popilasyon Sesel. Parski statistik in prouve ki isi Sesel popilasyon madanm i bokou plis ki popilasyon bann msye.

Sa bann prodwi i vin dan diferan laform e diferan grander, i annan diferan mark e son *quality* i varye e i kout diferan pri. Se pour sa ki parfwa letan bann madanm i anvoy bann msye aste zot pa konnen

ki mark ki bon, ki kalite ki bon alor zot anbarase.

E parfwa bann fiy e madanm ki pa travay e napa sa mwayen i rankontre bokou lobstak e lenkonvenyans dan zot lavi tou le mwan, ler zot napa sa larzan pou aste sa bann prodwi.

E sa i osi kapab anmenn en lefe mantal e psikolozik lo zot pandan sa letan. I annan etidyan ki pa kapab al lekol pangar son lenz i a sal e lezot a riy li.

I annan ki al kot Dokter ki rod konze e mon konn omwen 2 a 3 fiy ki tou le mwan apepre menm letan zot pa al lekol e dir ki zot ganny latet fermal. Rezon se ki napa ase prodwir sanniter pou servi diran sa 4 a 5 zour ki zot war zot reg. Sirtou pou anmenn ek zot kot lekol.

Dan lakour zot servi bann sifon e flannel e la mon war son lenpak lo zot ledikasyon.

Mr Speaker en pake pad i annan 10 oubyen 12 ladan, i kout environ R25 son dernyen grad e si oule sa kalite ki pli bon i pour kout ou environ R50 en pake.

An mwayenn pou annan en mwan en fiy laz 10 a 15 an i servi li apepre 2 a 4 pake pad par mwan parfwa menm 5. Ki pou kout li environ R100 ou R120 par mwan. Sa i pou bann

low quality grade e pour 1an i pour kout li environ R1200 pou en dimoun e sa i en zanfan lekol.

Dan ka kot en lakour en manman i annan li 2 a 3 fiy adolesan e li menm i ankor dan laz reproduksyon la i pou bezwen R500 a R600 par mwan, pou ganny sa bann prodwi de baz. Ki pou kout environ R6000 a R7000 par lannen.

E si oule bann grad ki en pe pli bon sa ki pli konfortab i pour kout ou sa zanfan R200 par mwan, R200 a R250 par mwan ki pour fer 2400 a 2500 environ par an pou en zanfan. E dan ka kot sa fanmir i annan 2 ou 3 zot la son sonm i double e i pou menm triple pou ariv par lao R7200 par mwan.

E en letid fer par *Ladies Circle Seychelles* in trouve ki 56poursan fiy en madanm i depans environ R200 par mwan tan ka 12.3poursan i depans R350 e data in prouve ki 40.4poursan i depans environ R2000 a R2500 dan en lannen par endividi.

Mr Speaker dan en *flow* normal en servyet lizyenn i sipoze *last* ou pou 2 a 3 erdtan. Sa i akoz si ou kit li plis letan ki sa ou vin enkonfortab e par lefe ki ou kit li pli lontan i anmenn lezot problemm parey

lanflanmasyon dan lazam e osi i kapab donn ou lenfeksyon lirin e lanflanmasyon dan ou blad e lezot problem medikal.

Me avek sa pri ki i koute parfwa i pa posib pou tou fiy oubyen madanm sanz zot pad souvan parey i sipoze. Sa i fer ki zot risk i bokou pou sa bann tel maladi. Dan preparasyon sa Mosyon mon ti fer li mon devwar pou koz ek *management* en lekòl e osi detrwa fiy serten lekòl.

Management i fer mwan konpran i parfwa si en fiy i ganny son reg letan i dan lekòl ki i pa'n prevwar zot ed li ek enn. Me selman zot napa en stok pou donn li pou servi diran son letan reg.

Bann fiy i fer mwan konpran ki parfwa ler zot napa zot servi bann papye twalet e menm bann vye sifon e en fiy i dir mon ki ler i napa sa pad i met en morso sifon. E i napa swa i zet dan twalet i *flush* li, akoz i kanmi pou zet dan bin pangar en lot son dalon a antre e war e i pour kanmi.

En lot i dir mwan ki ler napa i deroul trwa kar papye twalet lo roulo i servi, e si i annan en lot roulo ki pa ankor dekaste i pran i kasyet dan son tete pou li gannyen pli tar, pangar ler i a retournen pou

sanze i ava fini. Lezot i kanmi pou koz lo sa size.

I annan ki pret ek kanmarad oubyen miss parfwa i ede kot i kapab.

Mr Speaker bann fiy i osi fer resorti bann *stigma* ki zot pas ladan ler zot dan zot reg, sirtou ler zot napa ase prodwi sanniter pou kit zot konfortab e prop, kot zot war zot pe mars ek en tas disan deryer zot ler i deborde lo zot sez.

E parfwa ki zot pe mars avek en lenz tase lezot zanfan ki swa fiy e garson i sikann zot e sa i anbarasan. E zot santi zot ganny imilye.

Parfwa i annan Mis osi ki lapros pa bon anver sa bann zanfan. Zot fer resorti e zot santi zot kanmi e menm ganny regarde koman kosonnyen, Ella ti dir mwan.

Mr Speaker se pour sa ki sa Mosyon ki mon'n anmennen pe demande ki bann fiy i ganny li gratwitman e la mon pe mazin sa enn ki pli dan difikilte e napa mwayen pou aste.

Me an menm tan nou pa devret fer sa, nou pa devret pe diskriminen pou dir zis sa enn ki pa kapab *afford*, ki kapab gannyen me ki nou met li a dispozisyon pou tou zenn fiy.

E Mr Speaker la mon pe mazin en servis ki ganny ofer kot lekòl *either* kot *counsellor* e

an menm tan sa fiy a ganny en posibilite pou ganny en *counselling*. En servis kapab ganny ofer pou tou fiy e sa bann ki santi zot kapab *afford* zot ava annan swa pou aste sa ki pou zot.

Les dir Gouvernman i ofer bann mark parey *Always*, ban mark ki pli popiler. Li sa fiy ki kapab *afford* i dir be mwan mon pa kontan, mwan mon pli kontan met *Vania*, *Softex* akoz i pli abzorbe plis e son risk pou deborde i pli mwens.

Li i ava annan sa swa pou servi sa ki pou li, me solman i ava asire ki toultan i annan lot kalite a son dispozisyon.

Mr Speaker parey mon'n dir pli boner sa bann prodwi i vin dan diferan mark e ozordi mark pli popiler i *Always*, *Softex* *Kotex* e *Vania* ki li i vin dan bann pake 5, pake 10, pake 12 e osi gro pake 20 a 24. A diferan pri.

I annan ki *plain*, i annan ki annan *wings*, i annan ki *double ply*, e sak kalite i annan son pi ki vin avek.

E ziska prezan Mr Speaker i bon note ki tou sa bann prodwi bezwen ganny enporte akoz pei pa ankor kapab prodwi sa bann keksoz isi lokalman. En keksoz ki nou ti a swete ki a lavenir ti a kapab ganny fer.

Parey nou war lizin ki pe prodwi *toilet paper*, papye *kitchen towel*, kot bann materyo brit i ganny enporte e sa bann keksoz i ganny prodwi par labaz sa bann materyo brit.

E dan sa refleksyon, mon pe osi lans en lapel avek okenn lakonpanyen ou dimoun ki petet ti ava anvi lans zot en tel biznes, pou prodwi bann prodwi lizyenn pou komans mazin lo la.

Akoz Mr Speaker sa i en biznes ki si ou etabli ou, ou standar i garanti, akoz tou dilon lannen i pou annan demann. E si sa i leka i ti pou ede ki nou annan isi lokalman bann bon prodwi sanniter pou bann madanm. E sa ti pou koup lo kou lenportasyon. Tousala avek bi fer li vin pli afordab e pli rezonnab.

Mr Speaker sa i en propozisyon e en lapel ki mon pe fer ek kominote bines. Dezyenman parti sa Mosyon pe demande ki bann madanm ki pa kapab *afford* i osi ganny sa bann prodwi gratwitman.

Akoz en tel demann? Ozordi nou bezwen realize ki avek sityasyon *COVID* kot pri lavi in ogmante, e kot i annan fanmir ki war zot pe depan lo lasistans sosyal. Pou sa bann kategori Gouvernman i devret gete atraver lasistans sosyal si zot pa osi kapab ganny akse

pou bann prodwi sanniter gratwitman.

Pli boner nou'n met lanfaz lo zanfan lekol. Mr Speaker ozordi bokou pei pe viz ver ofer sa bann prodwi lo en baz gratwit dan lekol. Lo nivo enternasyonal bokou pei in realize ki lefe sa sityasyon i annan lo bann dimoun ki pli pov.

E zot bezwen swazir lo kwa ki zot depans zot larzan lo la, ant prodwi sanniter oubyen prodwi manze. Akoz tou lede i neseseite de baz.

E se pour sa ki bann gran pei parey serten Leta Lanmerik, *Canada L'Inde, Australie, Colombia, Malaysie, Irlande, La Jamaïque, Lebanon*, e osi *Nigeria e Uganda* zot parmi bann pei ki'n retir *tax* lo sa bann prodwi.

E *L'Angleterre* resaman Gouvernman pe revwar ki mannyer pou revwar sa taks 15poursan VAT lo bann prodwi sanniter pou bann madanm e fiy ki pa ti posib letan zot ti ankor dan Linyon Eropeen.

Scotland, Monica Lennon en Manm Parlman *Scotland - Scottish* in debat lo sa size a plizyer repriz e anmenn en lager asarnen kot sa ki nou apel '*Period Poverty*' depi 2016.

E an Novanm 2020 *Bill* pour ki bann prodwi sanniter

pou bann madanm ek fiy in vin gratwit ti ganny aksepte par en mazorite dan Parlman kot tou Manm in donn zot sipor.

E Mr Speaker isi Sesel napa GST lo ban prodwi sanniter pou bann madanm. Me selman mon'n ganny fer konpran ki ler marsan i aste ek sa *supplier* i met 15poursan lo *wholesale price*.

E an retour li sa marsan ki pe vann an detay i osi azout 15poursan *profit margin* lo son *retail price*. Ki fer ki ler sa prodwi i ariv kot sa madanm, si i les dir enn sa pake pad ti kout R30, ler i antre dan pei sa *wholesaler* i met 15poursan lo sa R30 i fer li vin R34.50 e prezan li sa *retailer* ler i met son 15poursan lo sa i fer sa R34.50 i pou tonm environ R39.77.

E deza nou vwar ki *from supplier* ziske ler i ariv kot sa resipyan in deza annan preski R10 ki'n ganny azoute lo la. E se la ki nou bezwen ansanm gete ki mannyer nou redwir sa kou pou fer li vin pli afordab. San ki nou pas sa *tax* lo sa fiy ki ankor pe lekol oubyen lo sa madanm ki pa travay.

Ki li parey mon'n dir o komansman son *period* i pa en swa me i en keksoz ki in erite akoz i en zanfan feminen. Mr Speaker ler mon ti pe travay lo sa Mosyon mon ti ganny dir

poudir i en size sansib. En size ki anmenn bokou *stigma* otour li, en size ki pa gou diskite.

Me malgre sa mon santi ki sa Mosyon i zistifye pou bann madanm e bann zenn fiy akoz s e selman zot ki santi sa douler e lanbarasman ler i ariv sa letan tou le mwan.

Akoz si ozordi nou koman reprezantan Lepep nou kanmi pou koz lo keksoz ki afekte en kous nou popilasyon, nou pa pou pe fer zistis.

Mr Speaker i kler ki dousman, dousman nou realize ki ozordi dan Sesel i annan plizyer lorganizasyon i pe travay pou promouvwar lentere bann madanm e zenn fiy.

Nou annan *ASFF*, nou annan *WASO*, e parmi nou annan *Ladies Circle* ki asosye avek *Round Table Seychelles e Club 41 Seychelles*.

Anba Chairmanship Mis Joana Pouponneau ki enn son *founding member*. E enn zot proze set egzaktaman pou konsyantiz Gouvernman pou fer ki prodwi sanniter bann madanm e zenn fiy i vin pli afordab e menm ki zot kapab ganny li gratwitman.

Mr Speaker *Ladies Circle Seychelles* i en brans *international*. Ki zot lobzektif se pour rod fason pou pledwaye pou bann problem ki afekte

bann madanm. Dan bann lannen resan in annan en lager enternasyonal pou fer ki tou dimoun i annan akse avek bann prodwi sanniter.

Bon lizyenn ki en bezwen *basic* pou tou dimoun. Depi bann lannen 2015 bokou pei pe revwar *tax* lo bann prodwi sanniter ki esansyel. Ozordi dan lemonn i annan plizyer pei ki pe viz dan sa direksyon parey nou Mosyon pe demande.

Mr Speaker mon ti temwannyen kot *Zimbabwe* an 2017 ti pas en *model law* dan plenyer *SADC-PF* e fer pledwaye pou ki prodwir sanniter pou en zenn fiy i ganny donnen gratwitman. E madanm Clerk ti laba avek mon dan sa miting.

Dan sa lespri pou permet ki sa ban fiy pa mank lekol letan zot dan sa letan, kot zot pe war zot reg. Ti annan bokou temwannyez donnen par sa bann fiy. Lot difikilte ki zot gannyen pou akse sa bann prodwi e si ti annan, *full pri* pa ti afordab pou zot aste.

Kenya Mr Speaker en lot pei Lafrik ki an Zen 2017 Gouvernman ti amann son *Education Act* pou fer ki tou zanfan fiy ki war son reg i ganny akse ek prodwi sanniter gratwitman, en lamannman ki Parlman ti aprouve.

Mr Speaker dan sa menm loptik, nou osi kapab regarde ki manner bann madanm ki fek akouse i osi resevwar sa bann prodwi gratwitman letan ki zot maternite. Parski parfwa sa bann prodwi pou *heavy flow* napa lo marse nasyonal e toultan ou war en dimoun pe gete si enn ki pe *travel* pa kapab fer li en pti faver pou rod en pti pake pou li.

E si i annan son pti i byen ser. Alor dan sa menm lespri petet sa osi i kapab al lo latab diskisyon a lavenir Mr Speaker. E pou konklir mon kapab dir poudir Gouvernman pou bezwen antre an partenarya ek sekte prive, pou gete ki manner zot kapab redwir pri sa bann komodite de baz pou benefis bann fiy e bann madanm.

Komans angaz li lo en diskisyon ek bann NGOs e lorganizasyon saritab parey Caritas e lezot pou komans ofer sa bann prodwi gratwitman.

Mr Speaker i enportan pou fer resorti ki nou pe demann sa poi bann ki dan bezwen, bann ki pa kapab *afford*.

Esperon ki sa msye laba Anse Royale ki ti *call* mwan bomaten i konpran poudir i annan dimoun ki dan bezwen. E si li i kapab *afford* pou donn

son fiy ek son madanm zot prodwi i *ok*, mon tir sapo ek li.

Me sa enn ki pe *struggle* eski nou kit li ater? Annou pa *focus* zis lo en endividi, mazin sa fanmir ki annan 2 a 3 fiy parey mon'n fer resorti. La mon mazin manman Emma ek Sophie ki li i pe esper epou en tel linisyativ ganny arive.

Mr Speaker avek sa mon remet sa Mosyon devan Lasanble pou aprouvasyon. *I beg to move.*

(APPLAUSE)

MR DEPUTY SPEAKER

Mersi pou ou prezantasyon Onorab. Okenn Manm ki pou segonn sa Mosyon? Onorab Samynadin in endik mwan donk mon ava pran deryer pou nou rikord pou segonnman.

HON KELLY SAMYNADIN

Mersi Mr Speaker. Mr Speaker i en plezir pou mwan koman en madanm parlmanter pou mwan segonn sa Mosyon de lapar bann zenn fiy ek madanm Seselwa ozordi. E mon ti ava voudre fer en pri lentervansyon.

MR DEPUTY SPEAKER

Oule osi entervenir lo sa Mosyon. *The floor is yours* Onorab.

HON KELLY SAMYNADIN

Mr Speaker. En madanm i komans ganny son reg oubyen son *period* plizoumwen dan son staz ladolesans e sa i form parti en sit mansyel ki i pou dezormen bezwen eksperyanse ou dilon son lavi ziska ki i ariv son staz menopoz.

Sa i en parti esansyel dan lavi en madanm, an vi ki sa i form parti son sistenm reproduktif e i prensipalman prepar son lekor pou n lansentman evantyel a lavenir. An rezilta sa Mr Speaker i annan en *residue* ki sorti *from* anndan matris en madanm an pasan par son *cervix* e an deor son lekor par son *vagin*.

Se pour sa rezon ki i en nesessite pou bann madanm itiliz bann prodwi, ki pou gard zot prop, an konfor e pli enportan dan en bon kondisyon izyenik.

Dan sa ka Mr Speaker eski i normal pou en kou ganny atase avek bann prodwi lizyenn ki an retour pe permet en madanm zwir e konfor en letap dan son lavi ki totalman natirel?

Koman en madanm parلمانter ki vreman konsernen anver byennet bann madanm dan distrik Au Cap e dan Sesel an zeneral, mon santi ki i mon devwar e responsabilite

pou anmenn mon kontribisyon dan sa deba akoz se nou bann madanm ki depans plis konsiderableman fas a bann msye kot lasante e lizyenn i konsernen.

Mon rekonnnet zefor ki lasosyasyon the *Ladies Circle Seychelles* dirize par zot Prezidan Manmzel Joana Pouponneau pe fer pou ede promouvwar byennet e Lasante bann madanm dan Sesel.

Sa i enkli aport sipor e fer sansibilizasyon pou bann madanm ki pe viv avek kanser e osi dan tou lezot domenn ki enkli lasante reproduktif.

Tou resaman sa lasosyasyon ti lans en mouvman apele '*The Bleeding Ladies*' koman zot pwen depar dan sa demars. Zot ti komans par en petisyon lanse le 8 Mars zour Lazournen Enternasyonal pou bann Madanm, en konpany inisyé par *Ladies Circle International* avek bi pour elimin stigmatizasyon anver bann madanm fas a zot reg dan en sel lavwa ver en sel batay.

Mr Speaker i annan plizyer rezon akoz ki Gouvernman e tou bann *stakeholders* konsernen, i bezwen travay anver aprovizyonnman bann prodwi sanniter pli abordab, oubyen

gratwit pou bann madanm e bann zenn fiy.

Premyerman an prenon kont plizyer defi ki'n leve an rezilta sa kriz ekonomik ki nou pe fer fas avek swivan pandemik *COVID-19*, i enportan pou note ki pa tou dimoun ki pe sibir son lenpak dan menm fason.

E la nou mazin nou bann ser ki petet zot reveni mansyel pa permet zot pou fer 2 bout zwenn. Konsekaman bokou fanmir in bezwen fer serten sakrifis vizavi zot depans e fer serten koupir kot in neserer. Malerezman kot bann prodwi sanniter i konsernen napa koupir, aköz sa i en bezwen esansyel e inevitab.

Dezyenman Mr Speaker pou antre dan en relasyon seksyel i en swa, kapot osi byen ki bann lezot mezir kontraseptiv aksesib pou naryen dan bann fasilite lasante, ofer par Gouvernman. Me aköz ki en madanm ki bezwen pas dan en staz pirman natirel tou le mwan dan son lavi, i bezwen depanse pou li kapab mentenir sa. Sirtou kan nou pe koz lo lizyenn.

Dan en mezir pour ki bann Manm i prezerv zot Lasante reprodiktiv, mon panse ki sa i ava enn bann mezir prevansyon kont bann *unwanted*

pregnancies an vi ki son aksesibilite pou gratwit pou pli abordab. Alor pou en fason pou bann madanm asire ki zot mentenir en nivo lasante ki ae alaoter.

Mazin byen ki en pake servyet sanniter abordab i pli responsab ki en pake *pampers* ser pou en lansentman ki nou pa'n planifye. Mr Speaker mon oule felisit *Ladies Circle Seychelles* pou komans sa deba. E mon pe demann tou bann partener konsernen parey nou bann parlmanter nou pe apiy zot, pou zot osi fer zot par.

Mon konnen ki sa petisyon ki ozordi in reisir arive ganny sipor anviron 700 sinyatir, i pa'n ariv zis kot Lasanble Nasyonal me osi kot Minister Lasante Minister Ledikasyon, *State House*, *CEPS* e *SNYC*. Avek en lavwa for e inifye nou pou kapab fer sa demars en sikse.

Mr Speaker malgre ki sa size konversasyon i tous prensipalman bann madanm bann msye osi pa ganny eparnye. Aköz se zot madanm, zot fiy, ser, kouzin, zanmi ki pas atraver sa staz lavi endispansab, an vi ki sa i parey mon deza dir en letap inevitab an sa ki konsern zot lasante reprodiktiv.

Mwan avek mon bann koleg Manm *Caucus* Madanm Lasanble Nasyonal mon asire e mon konvenki ki nou pou ganny sipor inanim tou nou bann koleg msye anver sa Mosyon.

I enportan ki nou tou nou angaz nou kolektivman e realize ki lasosyete pa pou sanze si nou menm nou pa angaz nou lekor dan sa konversasyon, form parti sa mouvman e fer sa demars vin en realite. Lasante reproduktiv en madanm i pa en bezwen me en nesesite.

Annou komet nou lekor pou asire ki nou ban zenn fiy, madanm, manman, e fitir manman i ganny sa sans pou zwir sifizaman sipor anver zot lasante reproduktiv.

Philanthropist Sheryl Sandberg i dir, *“we need woman at all levels including the top to change the dynamic, reshape the conversation to make sure women’s voices are heard and heeded, not overlooked and ignored.”* Avek sa Mr Speaker mon pe konfirm mon sipor anver sa Mosyon. Mersi.

(APPLAUSE)

MR DEPUTY SPEAKER

Mersi Onorab. Mon aprezan envit Onorab Vidot pou pran laparol.

HON AUDREY VIDOT

Mersi Mr Speaker. Mr Speaker i en langazman kolektif ki nou bann madanm parlmanter in ti'n dakor depi sizyenm Lasanble osi byen ki sa enn setyenm ozordi, pou aport tou sipor pou nou bann zenn fiy ek fanm Seselwa e ki zot pa ganny kit deryer pou bann size tel parey devlopman imen sosyal e ekonomik.

E se lo sa pwen ki mon pou aport mon sipor total pou sa Mosyon. Sa Mosyon i annan son lenportans, espesyalman dan en letan kot pei pe fer fas avek en kriz ekonomik e bokou bann komodite debaz pri in triple. E bokou nou bann dimoun pe fer fas avek bann difikilte finansyel pou fer de bout zwenn.

E i responsabilite bann dirizan pei ki nou kit regar espesyalman pou bann Seselwa ki pli vilnerab dan nou kous sosyete e fer tou zefor pou bann dimoun kapab fer fas avek sa kou lavi Sesel ozordi.

Mosyon anmennen par *Chairman Women’s Caucus* dan Lasanble e osi Manm Elekte pou distrik Glacis i tous pou

bann zenn fiy e madanm Seselwa.

Otan ki nou bann zenn fiy ek madanm Seselwa i a risk ek bann baryer parey lapovrete, *bullying* ki Onorab in fer resorti i nou responsabilite pou nou valoriz zot lenportans e asire ki a tou moman ki dignite e drwa imen nou bann madanm e zenn fiy, i ganny proteze e respekte.

Mr Speaker sak zanfan i spesyal e zot bezwen nou lanmour, swen e respe. Nou bezwen pe kontinyen siport nou bann zenn fiy ek madanm Seselwa, espesyalman ki fizikman e mantalman dezavantaze atraver bann tel program.

E zisteman ozordi sa Mosyon pe tous bann tel program, pou Gouvernman konsider pou bann prodwi lizyenn pou bann zenn fiy ek bann madanm vin pli afordab dan bann moman pli difisil parey ozordi.

En tel program pou asire ki okenn zenn fiy ki zon paran pe ganny difikilte dan sa moman problem finansyel, zot ganny tou sipor e pa ganny kit deryer. E pou bann ki pe deza pe fer bann demars, bann depans an plis pou bann rezon lasante, zot vwar zot atraver serten program pe osi benefisyé.

Sa program i kapab ganny konsidere dan plizyer fason;- tel koman parey mon koleg in fer resorti ganny entrodwi atraver lekol e osi byen atraver en servis *Family Planning*. Pou ankouraz nou bann zenn fiy e nou bann madanm servi pli byen sa bann servis pou ed zot dan bann devlopman personnel e fizik. Atraver petet atraver sistenm koupon.

Mr Speaker en gran poursantaz nou bann madanm Seselwa ki konn pri e valer sa prodwi i aparet lo son lalis konmisyon tou le mwan. Apard i nou bann msye ki vremen, vremen apresye valer e bezwen son madanm oubyen zon zenn fiy.

E osi byen ki nou bann papa tousel ki osi i pe sey zwe son rol kot lakour e pe fer tou pou koste ansanm, pou kapab asire ki zot zenn fiy i pa ganny kit deryer e i ganny son bezwen neser.

Nou konsyan ki Gouvernman in komans enplimant son bann program reform, me nou swete ki sa bann demann pou komans en tel demars pa vin koman en baryer. Me fer en bon letid. En bon letid ki pa pran bokou letan pou komans enplimante pour ki

nou bann zenn fiy ek madam i kapab benefisyé.

Mon de koleg in koz fortman lo lenportans aköz i enportan annan en tel program e mon pou ranforsi lo sa pwen ki nou pe koz lo lapar bann ki nou santi i dan bezwen. Bann ki nou konnen poudir i bezwen sa sipor adisyonnèl, pou li kapab regard son byennet.

Mr Speaker mon pou termin mon lentervansyon koman Vis-Chairman *Caucus* Madanm nou Lasanble. Mon pou demann mon bann koleg zonn pou aport zot kontribisyon anver sa Mosyon.

E siport nou bann koleg Onorab, espesyalman Onorab Esparon ki'n anmenn sa Mosyon e pour bann ki montre sa sipor par zot lentervansyon mon sif zot mersi davans. Mersi Mr Speaker.

(APPLAUSE)

MR DEPUTY SPEAKER

Mersi Onorab Vidot mon ava envit Onorab Doyace Porice pou fer son prezantasyon.

HON DOYACE PORICE

Mersi Deputy. Menm si i annan bokou ki'n ganny dir me atraver sa ki pou mwan i bezwen annan keksoz ladan.

Sa Mosyon anmennen par *Chairman Caucus* bann madanm, mon santi ki nou bann madanm ek bann fiy nou toultan pas dan en bann sityasyon kot i met plis det lo nou dan sa lavi difisil.

Nou det i plis ki pou bann zonn ek garson. Aköz mon dir sa set aköz nou annan en maladi an plis ki nou vwar tou le mwan e sa nou reg. Parfwa nou menm ganny plis ki en mwan.

E la Mr Deputy Speaker i annan nou ki kapab *afford sanitary pads* e i annan ki pa kapab. Apard sa i annan lezot ankor ki bann fiy ek madanm i servi.

Mr Deputy Speaker i nan bann paran ki annan 2 ou 3 zanfan dan son lakour e sa i kout bokou. E i pa bon marse. Ou bezwen mars an de pou rod sa ki pli bon marse, nou parfwa i kout nou vremen ser aköz pa tou ki son kalite *stuff* i bon.

Lontan nou bann paran ti servi pi servyet kot apre zot lave e sa ti kout zot pli bon marse. Zot pa ti bezwen aste pad tou le mwan. Me nou bann zenn konmela pa konn sa e sa zot pa pou enterese pou servi pti servyet sirtou kot i konsern pou lave.

Alor avek sa Mosyon mon santi ki sa i pou anmenn en

amelyorasyon lavi pou nou bann madanm e fiy ki pa kapab *afford* pou aste, sirtou bann det ki lekol kot zot a ganny lasistans kot zot lekol. Me kantmenm pli tar i a vini. proverb i dir plito tar ki zanmen.

Avek sa de pti mo mon pare pou siport sa Mosyon. Mersi.

(APPLAUSE)

MR DEPUTY SPEAKER

Mersi Onorab Porice. Mon ava envit Onorab Lemiel pou pran laparol.

HON SYLVANNE LEMIEL

Mersi Mr Speaker. Bonn apre midi tou dimoun. Mr Speaker Mosyon pe demande ki Gouvernman i konmans en demars, pour ki bann prodwi lizyenn pou bann madanm e fiy i vin pli abordab. E osi pou annan en program pour ki bann ki napa mwayen resevwar sa bann prodwi gratwitman.

Mr Speaker akse e abordabilite prodwi lizyenn, i en size mazer sirtou dan bann pei pov. Atraver resers ki *UNICEF* ti fer i ti dekouver ki *Kenya* 7poursan madanm e fiy i servi papye zournal pou mannye zot period ou reg.

6poursan i servi *reusable pads* e 46poursan i servi *disposable pads*. An *Uganda* bokou fiy i mank lekol tou le mwan akoz zot pa kapab *afford* sa bann prodwi. Pou 2 an zot ti fer en *trial experiment* kot zot ti donn bann *reusable pads* bann zenn fiy pou vwar si nivo prezans dan lekol ti ogmante.

Rezilta ti montre ki nivo prezans ti ogmante par 17poursan. I vre ki dan Sesel nou napa statistik lo sa size e nou pa konn poursantaz egzakt lo ki kantite madanm e fiy ki pa kapab *afford* sa bann prodwi, me nou annan statistik lo lapovrete dan nou pei.

E sa 2 i kapab ganny marye ansanm, akoz i ou pov finansyerman ou pa pou kapab *afford* sa bann prodwi. Bann prodwi lizyenn i ganny servi par bokou madanm e fiy. Sa i fer ki i en prodwi esansyel, me malerezman konsonmater i ankor pe pey sa bann prodwi ase ser.

Son konsonmater la se bann madanm avek bann fiy. Konmela bann fiy pe pas atraver piberte a en tre zenn az. Sa i anmenn plis presyon finansyel dan lakour e osi lo bann fanmir ki annan zis fiy. Sa i vedir plis depans.

Konsern lo pri sa bann tel prodwi pa zis Sesel i annan

bokou pei kot pri sa bann prodwi i ser, e serten madanm pa kapab *afford* pou aste.

L'Angleterre par egzanp in tir *tax* lo prodwi sanniter, ki fer ki i kout pli bonmarse e nepli ganny konsidere koman en prodwi *luxury*, parey ler ti annan *tax* lo la.

Bokou lezot pei pe osi fer. Bokou lezot pei pe osi fer sa pa, pour ki sa bann prodwi i vin pli abordab, oubyen aksesib e sa i tre ankourazan.

New Zealand Premye Minis Jacinda Ardern, in promet pou donn prodwi *period* pou bann etidyan pou sa prosen 3an. *Scotland* in met an plas en linisyativ egzanpler en linisyativ egzanpler.

An Novanm lannen pase, Lotorite *Scottish* ti pas en Lalwa lo *sanitary wears*. Enkli *pads* e *tampax free*, pou tou bann ki bezwen.

An 2019, *Sud Afrique* in annan en Polisi pou tir *tax* lo prodwi lizyenn bann madanm e fiy. Sa i zis enn de legzanp ki mon'n donner. E mon asire i annan ankor lezot pei ki pe swa redwir pri, oubyen donn pou nanryen bann prodwi lizyenn pou bann madanm e fiy.

Me la ozordi, atraver sa Mosyon, nou pe komans koz lo sa size enportan pour ki Gouvernman Sesel i fer sa pa,

pou osi fer sa bann prodwi pli abordab.

Si nou swiv bann, si nou swiv byen aktyalite, nou'n vwar ki i deza annan en asosyasyon *Ladies Circle Seychelles*, ki pe pouse pour ki sa i arive. Mon panse, ki avek sa Mosyon i a osi ede. I a osi ed zot dan zot demars.

Mr Speaker sa Mosyon li menm i pa en Mosyon ki annan bokou deba e bokou kontansyon lo la. Alors pou mwan konklir, mwan koman en madanm, mon pou siport sa Mosyon.

Aprè tou napa en madanm ou fiy, aprè tou napa en madanm ou fiy ki'n swazir pou ganny *period* tou le mwan. I en keksoz ki nou pa kapab kontrole e nou napa swa. Nou vwar bann garson i ganny konndonm pou nanryen dan bann klinik.

Mon konnen sa i pou zot prop proteksyon, e menm pou protez sa fiy ki pe annan relasyon avek. Alors aköz ki nou bezwen pey en ta larzan pou keksoz ki nou napa swa?

Si konndonm i *free*, alors aköz prodwi lizyenn bann madanm, pa kapab *free* oubyen pli bonmarse? Mersi Mr Speaker.

(APPLAUSE)

MR DEPUTY SPEAKER

Mersi Onorab Lemiel. Aprezan mon ava envit Onorab De Letourdie pou fer son entervansyon.

HON JANY LETOURDIE

Mersi Mr Speaker. Bonn apre midi tou dimoun. Mr Speaker i en fenomenn natirel ki bann feminen i ganny sa ki nou apel son regle oubyen son peryod, tou le mwan depi en serten laz ziska en serten laz.

Alors Mr Speaker, mon panse ki sirman provizyon dan Bidze sak endividi e sak Lakour i bezwen ganny fer pou bezwen asiste sa bann servyet sanniter ki mannyer nou anvi dir li, pad oubyen tanpon, selon swa sak dimoun tou le mwan.

Me an dizan sa Mr Speaker, mon pa inyore ki i napa serten dimoun, serten madanm oubyen zenn fiy, ki pa kapab *afford* pou ganny sa bann prodwi. Akoz petet zot kout ase ser.

Nou konnen ki i annan plizyer lorganizasyon Mr Speaker enternasyonal, ki nou koman bann MNAs nou'n al asiste e nou konnen poudir sa bann lorganizasyon zot met bokou lanfaz sirtou avek bann group vilnerab pou fer sir ki zot

kapab ganny akse avek, avek sa bann prodwi sanniter.

E la sa bann keksoz ki zot met lanfaz lo la, sa bann tel group, petet i konsern sa bann group ki reste lo semen, sa fiy avek zenn fiy ki reste lo semen ki napa lakour, bann ki'n ganny afekte ek bann dezas natirel parey dife, lafamin, linondasyon.

Mr Speaker parfwa dan nou bann diskisyon, nou koman bann MNAs ki sorti Sesel, parfwa annandler nou en pe ezite, nou en pe anbarase petet pou nou koz lo sityasyon Sesel.

Akoz nou realize parfwa ki sa bann problem ki zot, zot annan, i pa neseserman ki i parey avek pou nou. Me selman parey mon'n dir Mr Speaker, nou konnen poudir, nou konpran poudir i annan endividi, madanm, zenn fiy ki zot vremen pa kapab *afford*.

Mr Speaker mwan mon panse, mwan mon kontribisyon se ki dan bann landrwa piblik parey bann twalet, bann landrwa kot i prodwi bann servis piblik.

Nou konnen poudir papye twalet, parfwa ler nou al dan bann twalet piblik, menm dan bann lofis, menm dan bann lotel bann landrwa kot dimoun

i kapab ganny akse, nou vwar poudir i annan papye twalet.

E taler mon'n tann en dimoun pe dir fer aksesib en pe konndonm osi. Petet en fason pour nou komanse, pou nou fer sa sansibilizasyon pou nou vremen kekfwa konpran, konnen ki kantite dimoun petet.

Si nou ti kapab petet met serten sa bann prodwi dan sa bann landrwa piblik kot sa bann dimoun zot kapab vini pou zot vin pran dan en fason, (ki mannyer nou dir sa)? ki tou dimoun pa pe vwar li pe pran, en fason tre diskre si oule, sa i en fason.

Me apre Mr Speaker mon vwar lekol i en landrwa kot petet la koman nou konnen lekol pe fer son lotonomi. E petet dan zot diskisyon la i en fason pou zot kapab rod zot bann *sponsors*, rod zot bann donasyon pou zot kapab annan zot stok, akoz lekol bann *teacher* ek bann zofisye la kot lekol.

Zot pli byen plase pou zot konnen lekol sa bann zenn fiy ki pli napa, ki pli vilnerab e ki pli bezwen. Sa mon vwar li en fason kot nou ti a kapab komanse, tout an prenon kont, ki i kapab annan labi osi.

E sa nou bezwen fer sir kiv nou fer li dan en fason byen Mr Speaker.

Mr Speaker i vre ki *pad* oubyen tanpon, i annan en pti pri parey nou pe dir. Me selman mwan mon'n fer en pti resers osi, pou mwan vwar en pe bann pri ki i annan la pou lemoman la lo marse. Avek bann *brand*, bann mark parey nou dir.

E mwan mon'n ganny sa bann lenformasyon swivan. Mon pa pou nonm bann non magazen, akoz pangar a dir mon pe fer piblisite pour serten magazen.

Me selman nou kapab ganny, mon'n vwar bann *brand Kotex* ki annan 12 en pake i vann R12 i annan 12 ladan. Bann *brand Kotex* ki annan 23 dan en pake i vann R27.50, apre i annan *Softex* avek *wings*, R11 pake 10. *Softex* avek *wings* R16 pake 12. Lalis i long Mr Speaker e sa nou kapab vwar li en pti pe partou si nou fer resers.

Me selman an dizon sa, prezan ki mon pe dir vi ki nou pe demann pou aport soutyen avek bann ki pa kapab *afford*, petet la, nou a fer lapel osi an an atandan ki Onorab Esparon ti pe dir si en dimoun ti a vin *forward* pou li kapab lans dan sa biznes fer sa bann prodwi.

An atandan ki sa i pa ankor arive petet mon ti ava demann avek marsan enn ou 2 zot ki annan vremen Sesel a ker, pou zot gard zot pri afordab byen ba kot si Gouvernman pou met en koudmen ladan, *whoever* ki pou met en koudmen pou nou kapab fer sa bann prodwi afordab.

Alors la i en landrwa ki mon krwar zot ti a kapab vremen ede pou donn en koudmen. E vwala Mr Speaker mon kontribisyon pou sa size ki wi mon krwar ki i annan dimoun ki vremen bezwen pou zot ganny asiste e alors zefor i bezwen ganny fer dan sa direksyon. Mersi bokou.

APPLAUSE)

MR DEPUTY SPEAKER

Mersi Onorab De Letourdie. Mon pou aprezan envit Onorab Noline Sophola pou fer son prezantasyon silvouple.

HON NOLINE SOPHOLA

Mersi Mr Speaker. Bonn apre midi tou dimoun ki a lekout. Mr Speaker dan sa mon ki pe kontinyelman evolye e ranpli avek sirpriz, i fer ki bokou desizyon i bezwen ganny pran pou zwenn avek lekspektasyon

imen ou pou ede amelyor lasante e lavi nou popilasyon.

Mr Speaker nou pep i sanse, kot souvandfwa nou war nou kou keksoz pe arive lo medya sosyal. Parfwa nou menm regarde aköz nou pa ti zanmen krwar ki en zour nou pou eksperyanse.

Me la tou sa ki lemonn pe fer fas avek Sesel pa eksepsyon. Nou pe santi sa vibrasyon sanzman avek larive *COVID*, e personn pa konnen ki pe vini apre. Mr Speaker sa Mosyon i en *wakeup call* pou nou tou, san eksepsyon, zonn koman fanm, zenn koman vye.

Akoz nou tou nou annan en rol koman edikater, pou zwe dan sa demars ki sa Mosyon pe demande. Mr Speaker *menstrual cycle* oubyen reg, peryod parey bokou dimoun i konnen i normal dan lavi en zenn fiy, en zenn madanm.

Me i domaz ki nou isi Sesel sa i ankor en size tabou. Serten kours nou popilasyon i per pou koz lo la menm avek nou prop zanfand. I annan osi serten edikater ki santi zot enkonfortab pou koz lo sa size. Sa i posib pou fer avek nou kiltir, mank ledikasyon lo s asize ou krwayans relizye.

Mr Speaker si gran prodwi izyenik i ganny servi pandan sa letan ki nou apel reg, i annan

serten benefis parey redwir risk, ganny problemm lirin, kanser servikal e plizyer ankor. Ki souvan bann zenn fiy, zenn madanm i fer fas avek. I pou osi ede tir presyon lo Minister Lasante e pei an zeneral pou tret bann tel problemm lasante feminen.

Mr Speaker dan sizyenm Lasanble mon ti en Manm lo Komite *HIV/AIDS* e mon ti ganny loportinite pou asiste enn de fwa sesyon travay aletranze.

E bokou deba ti ganny fer lo akse avek prodwi izyenik pou bann zenn fiy e bann madanm. Leksperyans parfwa ki tromatize, ler ou aprann lafason ki bann zenn fiy, zenn madanm i pas ladan pou protez zot akoz en mank prodwi izyenik apropiye.

Parfwa bann zenn fiy zot bezwen abandonn zot letid, zot lanplwa, ganny problemm lasante e zot psikolozikman ganny afekte. E souvandfwa vin manman byen zenn ou pran bann desizyon ki annan move lenpak lo zot lavenir.

Aprè ki mon ti'n ekout bann prezantasyon mon konklizyon i ki nou isi Sesel nou vreman byen, nou pa kapab konpare lo sa size.

Mr Speaker isi Sesel nou bann zenn fiy e madanm i

sanse. Akoz mazorite zot, zot ganny akse avek prodwi izyenik e zot rarman bezwen vwar zot pe absan lekol ou landrwa travay pou 2 ou 3 zour ou plis tou le mwan, parey lezot zenn fiy dan serten pei aletranze.

Mr Speaker mon tann bokou koze lo kou lavi, me souvandfwa nou pe met lanfaz lo nouritir prodwi pti baba ou materyo konstriksyon. Me nou pa'n tro mazine ki prodwi izyenik parey pad, *tampax* pou bann madanm ou zenn fiy, i osi enportan dan nou lavi tou le zour.

Mr Speaker loter Mosyon pe demande ki prodwi lizyenn pou bann fiy e madanm i vin pli afordab. Mon dir sirtou la ki lasosyete pe eksperyans bann nouvo defi, sa demann in vin dan en tre bon moman, kot tou marsandiz in monte e pe kontinyelman monte malgre ki deviz etranzer pe desann.

Mr Speaker zis pou donn rezilta en pti resers ki mon'n fer yer lo 2 lartik; en prodwi izyenik mark *Vania* en pake 12 i kout R72 dan en laboutik ordiner. E kot *STC retail* i kout R40. Diferans pri i R32.

En lot ankor mark *Kotex* menm pake laboutik ordiner i R40, e kot *STC* i R30. Mr Speaker sa i montre nou lenportans pou annan *STC*

retail dan bann distrik. Sa pou ede soulev bann fardo lo nou ban konsonmater e lo Gouvernman.

Sirtou dan sa letan finansyel e difisil ki nou ladan. Mr Speaker en bon dirizan pa devret zanmen abandonn son zanfan. Parey loter Mosyon in demann sa langazman pou annan en program pou asire ki bann fiy e bann madanm ki napa le mwayen pou aste bann prodwi lizyenn i resevwar sa bann prodwi gratwitman i en nide tre, tre pozitiv.

Mwan tan ki mon bann ser Seselwa i benefisye, mon pou siporte pou fer sa demann vin en realite. Mr Speaker mon krwar ki nou tou avek bonn volonte, nou kapab komans en travay lo sa size pandan ki Gouvernman pe fer analiz lo sa demann.

Mr Speaker mon pou met 3 sizesyon devan; mon sizere ki en pti *survey* i kapab ganny fer dan tou distrik pou idantifye lanpler sa problemn.

Dezyenmman, annou komans dan bann letablisman skoler kot bann tanpon sanniter, sanniter gratwit i ganny mete dan en landrwa apropiye an ka dirzans.

Mon pe dir sa par leksperyans akoz lekol La Digue nou ti fer e ti mars tre byen.

Nou kapab osi servi menm metod parey avek *condom* kot i ganny met dan bann klinik. E sa ki bezwen i kapab ganny akse avek gratwitman. Me bann madanm ou zenn fiy i touzour annan sa opsyon pou aste sa ki dan zot swa.

Mr Speaker pou terminen mon oule met lanfaz lo lenportans pou sofgard dignite nou ban zenn fiy e madanm pli vilnerab dan nou lasosyete. Si sa demars i ganny byen organize, nou pou annan nou en lasosyete byen balanse, e an bonn sante. Mersi Mr Speaker.

(APPLAUSE)

MR DEPUTY SPEAKER

Mersi Onorab. Mon pou donn laparol Onorab Aglae.

HON EGBERT AGLAE

Mersi Mr Speaker. Mon pou aport mon soutyen an sipor sa Mosyon ki mon krwar i annan son relevans. Menm si i annan serten deor petet ki krwar poudir nou pa pe koz lo en size ase enportan.

Me selman Mr Speaker, ler nou pe get li dan konteks. Annou pa get li zis dan konteks Sesel. Me dan en konteks en rasinen. Sa i bann madanm, bann femel. Ki lasyans i fer ki

tou le mwan zot bezwen pas atraver en *cycle* kot zot bezwen vwar zot reg. E osi i annan bann kondisyon ki serten madanm i kapab pas atraver, ki i fer ki i kapab vwar li plizyer fwa dan en mwan aköz serten kondisyon lasante.

Mr Speaker, letan mon ti lo SADC ti annan bokou bann group lo nivo Lafrik, ki ti pe *advocate* lo lapar bann madanm pou zot kapab premyerman ganny akse avek bann prodwi lizyenn madanm.

E dezyenmman pou zot kapab osi gard en pe zot dinyite pou zot dan sa moman letan ki souvandfwa si zot pa kapab *afford* ouswa napa enn sa bann mezir sanitasyon, zot bezwen reste anfermen, aköz i annan en stigmatizasyon ki atase avek.

Mr Speaker, nou lo kote Sesel nou pa ladan nou, nou pa dan sa nivo. Me selman nou pa kapab les nou ganny antrennen ouswa dan en fason koman Parlmanter ki pas Lalwa, ki pas Bidze, vwar poudir i annan serten nou bann fiy ki bezwen - parey loter Mosyon ti koz lo la, servi bann lezot mwayen ki dan sa monn modern ki nou pe viv ladan, pou mwan i pa tro, tro akseptab.

Mr Speaker, Sid Afrik i annan li en *framework* ki apel

en *Sanitary Dignity Framework*. E ladan li, in vin an fors depi 2019 ki donn Gouvernman li menm li pou kree bann Polisi pou kapab ede rezourd sa problem *affordability* sirtou avek bann zenes e sirtou bann adolesan ki ankor pe lekol.

Ki zot paran pa pe kapab *afford* pou kapab donn zot sa prodwi li menm. Ouswa i annan paran ki annan li 4, 5, 6 fiy ki vwar li difisil pou li kapab *maintain* ki zot annan sa form sanitasyon.

E sa osi i fer bann provizyon ki atase anba sa *framework* osi, pou annan en nivo lizyenn ki sa bann madanm i bezwen garde e sa i annan keksoz pou fer ek zot, sirtou parey akse delo.

I annan landrwa ki annan bann problem sirtou delo. Tousala i fer en mansyon. E osi i met en form distribisyon pou zot kapab – Kote? I annan bann *points* parey i annan bann fason fer, ki zot fer. Zot met bann pwen ki zot kapab ale pou ganny sa sanitasyon li menm li, e ganny sa prodwi pou naryen.

E osi i annan bann lezot mouvman. I annan en an partikilye ki i enteresan, ki apel ‘*The Happy Flow*.’ ‘*The Happy Flow campaign*.’ E li, zot vwar poudir Gouvernman i bezwen vwar sa sityasyon akse avek

bann prodwi sanitasyon koman en nesesite. Zot pe met lanfaz lo nesesite e zot osi target sirtou bann zenn.

Akoz ki zot in vwar ler zot in fer serten reserse, se ki bokou adolesan i annan en peryod letan dan mwan, 3 a 4 zour ki pa pe kapab vin lekol. Zot bezwen reste se zot e zot mank lekol e zot ledikasyon i perdi.

E osi i target bann zenn ki zot in vwar ki i annan in bezwen al vann zot lekor, pou zot kapab ganny larzan pou zot kapab aste sa prodwi sanitasyon. So, i bann sityasyon reel ki laba deor, pa neseserman Sesel i egziste. Nou pa swete.

Mon pa anvii ki nou bann zenn, ki mon bann zenn fiy pa al lekol aköz sa. Mon pa anvii ki mon zann zenn fiy i al fer bann aksyon seksyel zis pou kapab ganny en pti larzan pou zot kapab aste sa bann prodwi.

So, tousala i sa bann gran, gran portre ki nou bezwen met devan nou, menm si mon en zonn. E nou konnen poudir i annan en konsern reel la deor.

Alors an siport sa Mosyon Mr Speaker, petet Gouvernman i bezwen vwar lafason pou sey anmenn sa kanpany aköz lo nivo SADC, mon form parti SADC. I annan sa kanpany ki pe egziste. Vwar ki metod

ouswa mekanizm ki kapab ganny met an plas.

Byensir i annan en kou bidzeter ki vin avek. Me si parey Onorab Lemiel in nonmen, nou kapab fer kanpany pou donn *condom free of charges* pou bann zonn. Annou rod fason ki manner nou kapab soutenir bann madanm, sirtou bann zenn adolesan lekol pou tir en pe presyon ekonomik lo sa paran.

Bann ki travay mon konnen zot kapab *afford*, me annou fer *at least* en *trial*, annou get sa bann ki dan lekol ki'n komans vwar zot reg. So, ki manner nou kapab siport zot.

E mon pa tro petet konnen dan ki direksyon i kapab ale, petet lot kote vi ki zot dan mazorite, zot dan Gouvernman pou sey *lobby*. Aköz sa i pou vin parey en program sosyal ki i en problem sosyal ler ou pe donner. E i pou kout larzan. E nou konnen zot pe sey rod tou fason pou arete sa bann sistenn donner. Me i annan en fe reel la ater pou nou kapab vwar lafason.

En lot pwen ki mon krwar petet nou ti a kapab tous ladan Mr Speaker, i bann pri ki varyan. Ou tann diferan pri. Eski napa en fason petet pou nou get en kou byen sa bann

enportater ki pe fer vini sa bann prodwi osi.

E si i annan posibilite osi pou donn bann *tax incentive* ouswa serten konsesyon atase avek sa. Eski sa osi ede fer pri vin en pti pe pli abordab pou nou bann madanm, si kapab.

E Mr Speaker, an terminen osi mon krwar i annan en responsabilite pou nou bann msye osi zwe ladan. Mon konnen i annan msye ki li menm li volonterman i aste sa prodwi pou donn son madanm.

Me eski i annan bokou nou ki pe fer sa? Eski nou met en pti larzan a kote, nou dir be *ok* mon a koup lo sigaret, li mon pti lalkol par en mwan. Par mwan mon a donn mon madanm. Ouswa mon zanfan, menm mon fiy. I enportan sa.

So nou osi nou annan en savwar viv ek en responsabilite anver sa bann madanm akoz nou bezwen nou osi. Nou bezwen admet, nou bezwen zot. So annou get en pti en git ladan, nou ava vini. E mon swete ki nou ava vwar en *way out* ladan ki mannyer nou kapab fer sir i bann prodwi i *available* e i abordab.

Mr Speaker, avek sa mon swete ki Onorab Arissol li osi i a met son kontribisyon. Mersi.

(APPLAUSE)

MR DEPUTY SPEAKER

Mersi Onorab Aglae. Zis pou mon, annou tonm dakor lo en zafer. Lo nou *Order Paper* ozordi i annan 3 Mosyon. Mosyon *LGB* nou pe pran demen bomaten. Mosyon Onorab William, mon pa vwar li pe vini la, nou pa pou pran li ozordi. So, nou pa a *break*, konmsi nou ava fini avek sa bann entervenans ki annan apre nou al en sel. Parski nou'n antre 2er edmi.

E an dizan sa nou annan detrwa msye ki'n eksprim zot lentere pou koze, ki byen. Solman *let's be mindful of time*. Mon vwar poudir, konmsi grander nou bann prezantasyon. Mersi, so mon ava envit Onorab Loizeau.

(APPLAUSE)

HON NORBERT LOIZEAU

Bonzour Mr Speaker. Bonzour tou Manm, tou dimoun a lekout.

MR DEPUTY SPEAKER

Bonn apre midi.

HON NORBERT LOIZEAU

Bonn apre midi. Mr Speaker, mon kontan Onorab Aglae in re lans nou. Akoz mon konnen ki bokou nou pa oule koz lo sa

sityasyon, me selman zot annan en madanm kot lakour.

Mr Speaker, parey sa Mosyon i ete, sa Mosyon i konsern zis madanm e mwan mon vwar li i konsern osi nou zonm. Ki mannyer i konsern nou zonm? Les mwan mon a eksplike.

Tou zonm i bezwen okip son fanm. Lekel enn ki pa okip son madanm la? Sa enn ki pa okip son madanm, ki pa trouv nesosite pou son madanm ganny lizyenn, ganny tou pou mwan napa sans i annan sa madanm. E mwan mon enn Mr Speaker, ki okip byen mon madanm. Mon pa per pou dir.

(laughter)

(APPLAUSE)

HON NORBERT LOIZEAU

Akoz dan nou Bidze le mwan Mr Speaker, dan nou Bidze le mwan ler nou kalkile, sa osi ki nou pe koz lo la i antre ladan. Sa bann zafer sanniter pou bann madanm, *pad*, sepa ki zafer. I antre dan nou Bidze lemwan. Napa enn ki pou dir mwan, bann zonm la ki pa antre dan nou Bidze le mwan.

E mwan Mr Speaker, mon aste. Mwan mon aste. Mon pa

servi Onorab Andre, selman mon aste.

(laughter)

HON NORBERT LOIZEAU

Ki rezon ki mon aste Mr Speaker? Akoz mon osi annan en zenn fiy mwan. Mon annan en fiy 12an ki servi sa bann keksoz koumsa. Si mwan mon pa aste pou zot, en lot boug pou aste. Apre nou pou ankoler ler sa lot boug in aste pou zot.

(laughter)

HON NORBERT LOIZEAU

Alors i enportan ki mwan mon aste. Pou ki kan mon aste, Onorab Cosgrow ouswa lot pa pou vin aste pou mwan. Mr Speaker.

(laughter)

HON NORBERT LOIZEAU

Akoz zot pou konnen poudir ki sa i mon propriyete e mwan ki okip sa propriyete.

(laughter)

HON NORBERT LOIZEAU

Mr Speaker, ou konnen, i gou nou riye. Mon pe fer li koumsa akoz mon konnen bokou nou la napa kouraz pou mont la pou

vin koz lo sa sityasyon. Napa bokou nou ki annan sa kouraz.

Me mon kontan Onorab Aglae i annan sa kouraz, mon pa konnen lekel lezot ki pe vin koze.

Mr Speaker, i annan bokou nou ki per pou aste. Mon a akont zot en zistwar. En zour mon pe al fer mon pti legzersis avan 7er diswar. Laboutik i fer 7er. E mon ganny en *call* an desandan *come quoi* mon fiy pou bezwen sa.

Alors mon sot kot *Bel Air Store*, 7er si pa sonnen avan mon antre. Ler mon antre mon vwar en boug pe dous obor letazer. Bann dimoun ki frank *Bel Air Store* zot pou konnen, kot sa bann materyo i mete i en pti kwense. Zwer pe dous, prezan mwan mon pe prese 7er pe sonnen. Prezan dernyen er mon dir li "eskiz mwan mon a pase."

Pa zwe bliy mwan Mr Speaker, mon le mon pe pase zis mon pran mon zafer, lo kontwar, mon pe al peye. Prezan zwer i ganny en kouraz. E mon kontan mon'n donn li sa kouraz akoz zwer ti napa sa kouraz.

I pe esper tou dimoun sorti pou li kapab pran, al peye. E mwan mon ti montre li ki ou pa bezwen fer sa. Ou bezwen ou zafer, vini ou aste.

E la Mr Speaker, ozordi apard sa ki zot dir *pad*, i annan bann lezot keksoz, *pad* zot servi tou le mwan. Mr Speaker, ozordi dan nou Bidze i annan en keksoz ki apel *panty liners*. Mwan mon pa ti konn sa. Ti annan en zour mon ganny demande pou aste.

Ler mon monte, mon mont ek en nespes pake soz, mon'n ganny problem. A lafen ler nou'n vin ansanm in montre mwan lekel, la mon'n konnen. Tanzantan mon aste en pti pake.

Mr Speaker, sa bann zenn fiy ek madanm i met toulezour e i pa kout 1 sou. Sanmenm ki mon dir, dan nou Bidze nou zonn, ler nou fer nou Bidze ou fer antre tousala. E i en kou, sirtou pou en fiy. Mon annan en fiy 12an mwan, i pa travay li Mr Speaker. Be lekel ki pou aste sa pou li? Be mwan ki pou aste sa pou li.

Ozordi parfwa mon pase mon vwar bann zenn fiy, zenn manrmay pe monte. E ler ti annan sa Mosyon mon vwar 2 zenn fiy Perseverance.

Zis mazin, eski zot pe gannyen sa zot? Mr Speaker, mon demann sa keston akoz i annan zanfan ki'n zis ganny fer, met la. Pa pe ganny sa ki mwan mon pe fer ek mon fiy, mon pa pe dir mon perfe. La deor i

annan bann zenn fiy pa pe ganny sa kalite latansyon. Mon konnen nou tou nou pe donnen. Pa pe gannyen sa kalite latansyon.

Zis zot in ganny fer met la ater. Papa pe bwar dan en trou, pe fim son *steam*. Manman pe donn bal en lot bor e li i zis la. E pou mwan ki annan en zenn fiy 12an parfwa ler mon vwar bann keksoz koumsa i fer mal, i tris. E mon ti a kontan ki nou bann zonm nou osi pran nou responsabilite. Siport nou zanfan, siport nou fiy dan sa bann letan koumsa.

Me ozordi ou'n vwar Onorab Esparon in dir ki in ganny en *call*. Mon'n ganny en *call* ek menm dimoun yer swar mon, en zonm. Ler in *call* mwan, mon'n dir li frer plito koz ek loter Mosyon. In rod nimerò, mon'n donn li. In *call* Onorab Esparon.

E li in dir mwan pa siport sa Mosyon akòz nou pe al met en fardo lo Gouvernman.

Mr Speaker, ozordi parey mon'n dir, sa bann zenn fiy ki monte i annan nou ki kapab *afford*. I annan nou ki pa kapab *afford*.

E mwan mon konnen, dan mon louvraz koman *MNA*, nou tou ki la nou konnen. Tanzantan i annan en dimoun ki vin kot nou, en madanm ki

vin rod en larzan pou zot fer egzaktèman sa ki nou pe koz lo la. Konbyen zot ki'n rankontre sa sityasyon?

Mon asir ou nou tou ki la nou'n rankontre. Mon plizyer fwa mon rankontre sa sityasyon. Zot napa, pou bann ki annan, ki kapab *afford*, i en pti pe eze, i *ok*. Me pou bann ki petet zot en pti pe mwen fortinen, mon krwar sa i ava ede.

E mwan mon anvi siport, mon pe dir. Mon pou siport sa Mosyon Mr Speaker, akòz kot i konsern lizyenn pou nou bann madanm e pou tou dimoun an zeneral, mon en dimoun ki pou toultan siporte.

E la Mr Speaker, mon ti a demande si i annan *tax* lo la, mon pa konnen. I annan i dir napa. Rod en fason, mon pa konnen mannyer zot kapab organize pou fer li pli abordab.

Mr Speaker, mon ti annan bokou pou dir. Me avek kontrent letan, mon ava termin la e mon ava dir Onorab Esparon, koman en ser, en koleg ki mon vwar ou annan lanmour pou bann dimoun, pou bann zenn fiy Seselwa, bann madanm. Mon dir ou garanti mon sipor. Mersi.

(APPLAUSE)

MR DEPUTY SPEAKER

Mersi Onorab pou konsiderasyon letan. Mon ava envit Dirizan Lopozisyon pou fer son prezantasyon.

HON SEBASTIEN PILLAY

Mersi Mr Speaker. Mr Speaker, i annan bann Mosyon ki souvandfwa ensit diferan lopinyon dan domenn piblik. E koman Lasanble, en Lasanble ki serye malgre nou pou annan moman kot nou pou annan levite. I enportan ki nou regard tou sa bann lopinyon piblik e regard tou bann eleman ki piblik pe met devan nou.

Nou bezwen admet ki i annan dimoun ki santi dan en fason ou en lot atraver sa Mosyon. E i enportan pou mwan ozordi apre midi sey met en pti pe, si ou le konteks otour lafason ki nou lo sa kote latab nou pe apros sa Mosyon, e byensir ki mannyer tou lezot Manm Lasanble pe apros sa Mosyon.

Premyerman i annan dimoun ki pandan ki bann Manm pe koze in eksprim zot lekor, e dir mwan poudir lafason ki serten Manm pe koze sa i en latant a lendepandans bann madanm. En latant a lendepandans bann madanm akoz i koz lo madanm bezwen ganny nesesite pou depan lo en

lot dimoun pou zot kapab ganny sa ki zot bezwen.

Mwan mon dir ki lentansyon bann lentervansyon sete pa pou fer sa. Lentansyon bann lentervansyon sete pou apros en size ki avek bravour, ki bokou dimoun pa oule koz lo la.

Ki bokou dimoun pa oule apros li akoz i, pou nou, nou sosyete, malgre ki nou'n fer en kantite progre, nou bezwen admet. E la mon pou fer sa admisyon lo lapar Lasanble, menm si i annan dimoun ki pa pou dakor avek mwan. Ki nou ankor en sosyete ki *revolve* otour zonm an kontrol en kantite keksoz.

E stigmatizasyon e tabou i ankor en keksoz ki reste parey, akoz par egzantp Onorab Loizeau in servi sa legzanp sa imsyete ki ti dan laboutik ki ti per pou pran *sanitary wear* pou son madanm. I egzakteman en sityasyon ki bokou bann msye i pas ladan.

Si par egzantp i a en moman donner, en zour Vandredi i avek en group zanmi. I pe bwar, i pe tap 2 labyer e li i ale i dir ek son bann zanmi poudir be mwan mon aste *sanitary wears* mon madanm. Bokou msye in pas ladan, nou konnen ki pou arive.

E mon krwar sa i pa neserman - I en keksoz ki pou

vin avek en evolisyon lespri, en sanzman *mindset*. E mon krwar sa Mosyon enn son bann bi prensipal i pa neserman fizikman fer sir ki tou zenn fiy i ganny akse avek *sanitary wear*. Sa i en keksoz ki normal, i en lekspektasyon sa.

Me enn son bi prensipal se pou nou annan en *mindset* pou sanze e pou nou apros bann size ki parfwa i difisil pou nou koz lo la.

Mon annan en lot dimoun ki'n *text* mwan. En madanm dayer ki'n dir ek mwan koumsa poudir i annan madanm ki ganny zot reg zis enn fwa par mwan e ki mannyer bann madanm pa kapab *afford* pou aste *sanitary wear*.

E mon konpran son largiman, me de lot kote nou' n tann bann *MNA*. Mon kontan, i annan bann *MNAs* lo tou lede kote latab in admet ki dimoun ozordi pe pas dan bann moman difisil. In admet ki annan bokou difikilte ki dimoun pe pas ladan, e ki i annan neserite pou dimoun ganny en koud pous, ganny en sipor dan en fason ou en lot.

Me parey mon'n dir pa sa lideal. Lideal i se ki *sanitary wear* i en keksoz ki vin normal, i lafason ki Bondye in kree bann madanm e ki pour kwa pa, kwa ki i pou afekte. *What will it hurt*

pou nou annan par egzantp dan bann lekol en *dispenser* ki *dispense pans* bann *sanitary wears* kan en zenn fiy i bezwen li?

Kwa ki i pou afekte egzaktaman? Nou annan par egzantp dan bann *bar*, dan bann lezot pei dan lemonn, kot serten nou in al etidye, bann *condom dispensers*. E la mon ti a kontan petet koriz en *misapprehension*. *Condom* i pa pou msye. *Condom* i en metod kontraseptiv ki mars pou en madanm e pou en msye. Mon pa krwar Lasanble apre midi se sa ki nou oule dir.

Sa ki nou oule dir se, si nou'n kapab apros kontrasepsyon avek sa kalite lespri, malgre ki lo komansman ti annan sa rezistans, nou kapab osi apros en deba otour *sanitary wears* bann madanm, pou bann zenn fiy dan menm fason.

E sa i bezwen ganny fer avek en bon lentansyon. En lentansyon ki nou pa pe zis pran sa problemn *put li out of sight e out of mind*. Me pran sa sityasyon, pa en problemn. Mon koriz mon lekor. Sa sityasyon. E fer sir ki nou konpran ki sa i en prosesis normal.

Mon en paran 2 fiy e bokou nou la nou paran. Nou

annan madanm e nou annan zanfan. E nou konnen poudir a en peryod dan adolesan e sirtou mwan koman en edikater ki'n fer, ki'n aprann psikoloji ledikasyon, i annan en lenpak lo bann fiy ler zot pe pas atraver sa proses. E sa parfwa i afekte zot letid pou en bout moman.

Se sa kot ou vwar parfwa serten fiy a en moman dan zot laprantisaz zot komans, zot pran en pti *decline*. Me apre ou vwar zot, zot *pick up* ase vitman.

Akoz i en transformasyon, i en sanzman. E mon krwar se sa ki nou bezwen pa aproz. Akoz koman en sosyete, mon kwa nou tou nou a dakor la annan se ki malgre en kantite progre ki nou'n fer koman en nasyon, nou reste ankor en nasyon as konservativ. Dan nou panse, dan nou nide, e dan lafason ki nou vwar keksoz.

E pou mwan sa i en keksoz ase enportan. E pou mwan se sa, sa nwayo ki mon tire dan sa Mosyon. I annan lezot konsiderasyon ki *mover* Mosyon in koz lo la e mon konnen poudir lentansyon *mover* Mosyon i enn ki bezwen bon.

Akoz in en dimoun ki'n travay dan domenn medikal, in rankontre sa sityasyon. En profesyonnel lasante i toultan

kapab regard sa bann sityasyon avek en lot lizye osi. Mon krwar sete sa lesansyel ki nou pe vin avek e sete sa rezondet akoz bann Manm lo sa kote letan nou'n entervenir dan lafason ki nou'n fer lo sa Mosyon.

Parey mon'n dir, fodre pa ki Lasanble alors i reste lo son *morals* e dir, *ok* ozordi nou pa sa Mosyon *and that's it*. Fini ! I bezwen annan en langazman.

E la mon pou koz koman en dirizan lo sa kote latab e osi mon pou demann mon bann koleg lo lot kote latab pou zenn ek mwan pou donn sipor Komite Madanm Lasanble, dan bann zefor ki zot pou fer an relasyon ek sa size.

Pour ki i en size ki zot kontinyen pran li e zot kontinyen regard li dan en fason ki Lasanble i donn sipor bann lezot groupman ki pe anmenn sa ki nou oule vwar.

Mwan personnelman mon ti a kontan vwar posibilite dan bann lekol annan bann *dispensers sanitary wears*, pou bann zenn fiy. Mon ti a kontan fer sir ki bann *toilets* dan bann lekol i vin pli *friendly*.

Sirtou pou konnen poudir dan adolesan bann zenn fiy pe pas atraver transportasyon, zot bezwen en lanvironnman ki ed zot.

I pa vedir nou pe fer okenn diskriminasyon. Annefe i en *positive discrimination* akoz mon krwar koman en sosyete, nou devret kapab devret fer plis pou asire ki nou bann fiy i devlop ankor plis e nou ganny nou en sosyete ki pli *fair*, pli ekitab e pli balanse. Sa se kote nou pe ale, se sa rezondet akoz nou la.

Me, la mon kosyonn Lasanble, mon oule ki tou Manm i mazin byen sa. Wi, mon konnen manm piblik ti a kontan nou koz lo bann lezot size ki pe pase, problemm sosyal, problemm finansyel ki dimoun pe rankontre. Nou pou annan deba lo sa bann size, nou pou annan deba. E mwan koman *Leader* Lopozisyon dan sa Lasanble, mon pou kontinyen amenn kestyon lo sa bann size a tou repriz ki mon kapab.

Me ozordi, parfwa i neserer pou nou regard en size e regarde kwa ki nou kapab tire ladan. E sa ki nou kapab tire ladan se ki nou pe donn Lasanble loportinite pou fer en deba lo en size ki Onorab Loizeau e Onorab Aglae in entervenir lo la, ki vre i difisil pou serten msye koz lo la. I fasil pou nou fer *jokes about it*, me i difisil pou nou koz lo la.

E mon krwar ler mwan, mon pe pran sa pa koman dirizan lo sa kote, e mon konnen mon koleg lo lot kote latab pou zwenn avek mwan, ki nou lans en lapel ferm ki lide deryer sa Mosyon se pou anmenn en *mindset* e ki nou pa bliye.

Lasanble in aksepte ozordi ki nou annan dimoun ki dan difikilte, me lide deryer sa Mosyon se pou regard sa size dan en lot fason. Anmenn en lot fason panse e asire, asire ki sa i form parti bann zefor pou nou kre en sosyete kot nou valoriz tou dimoun, pe enport ki sex ou ete. Ki ou madanm, ki ou en msye. Mersi Mr Speaker.

(APPLAUSE)

MR DEPUTY SPEAKER

Mersi Onorab Pillay. Mon pou envit dernyen entervenans lo sa size, sa se Onorab *LGB*.

HON BERNARD GEORGES

Mersi Mr Speaker. Bonn apre midi Mer Speaker. Tou bann Manm Onorab. Mersi pou donn mwan laparol pou parey tou mon bann koleg ki'n koz avan mwan, pou dir detrwa mo an sipor sa Mosyon apre midi.

Mr Speaker, premyerman mon ti a kontan abord sa size, eski i apropiye pou sa Lasanble

koz lo sa Mosyon. Eski nou devret kontinyelman annan dan nou lespri en *stigma* ki atase avek bann keksoz ki toutafe natirel, ki nou tou nou konnen i arive e ki'n arive depi ki zonm ek fanm i lo sa later.

Mon krwar sa se premye refleksyon ki nou devre fer. E i trouble mwan koman en sitwayen sa pei ki ozordi nou ankor *still* bezwen annan en serten retisans ler nou koz lo serten size.

Mon krwar sa se en keksoz ki fodre nou aprann pou met deryer nou e fodre nou fer li ekstrememan vit. Napa size ki tabou e napa size ki tabou ki konsern let imen. Nou devret kapab e sirtou dan sa Lasanble, nou devret pran li koman nou devwar pou abord bann size kontrovers ek bann size delika.

Akoz se nou ki'n ganny elekte koman bann reprezantan sa pep pou fer avanse sa bann size. I pa ti mon lentansyon koze apre midi, me avek lantouzyazm ki mon'n vwar tou bann Manm ki'n koz avan mwan, mon'n krwar ki mon ti ava pe fer en defayans lo mon kote latab, lo mon *constituence* ek lo mon nasyon si mon pa ti pran laparol apre midi pou abord sa size.

E mon remersye Onorab loter Mosyon ki'n annan kouraz

pou li ouver sa laport, pou permet nou annan sa loportinite apre midi pou adres sa size.

Mr Speaker, i annan 3 keksoz ki nou bezwen aksepte, e sa se a la baz mon refleksyon lo sa Mosyon apre midi. Premyerman se ki bann madanm i spesyal e zot annan en keksoz, en fonksyon biolojik ki nou bann zonm nou napa, e ki fer zot premyerman annan en sityasyon mansyel ki zot bezwen pas ladan.

E en kou mansyel ki vin avek sa sityasyon. Sa nou bezwen aksepte, nou pa kapab kontourn li, i kler, i le fe e i devan nou. Premye pwen e nou bezwen aksepte sa.

Dezyenm keksoz, se ki i annan serten dimoun ki pa kapab, ki napa le mwayen pou pey bann *pads*, bann servyet sanniter ki lezot dimoun ti kapab *afford*. Sa osi i en fe ki devan nou. E sirtou i annan bann fanmir kot i annan, nou'n tande la apre midi.

Plizyer zenn fiy napa mwayen pou pey sa ki pli bon ki zot ti ava swete, oubyen parey nou'n tande, napa mwayen pou pey oubyen pou *afford* okenn sa bann prodwi sanniter. Sa se en fe e nou bezwen aksepte li e i devan nou.

E trwazyenm fe, e sa i relye senpleman avek bann zenn adolesan, se ki i annan - nou tou nou konnen, nou tou nou'n pas ladan dan nou bann landrwa kot nou reste, dan nou bann lekol kot nou'n frekante. I annan en move sistenm e i keksoz ki let imen in adopte. Kot annan de fwa nou riye, nou gognarde bann ki ganny en problemn.

E Onorab Esparon apre midi in donn nou en levantay sa bann kalite problemn ki kapab arrive avek bann zenn fiy, sirtou bann ki napa le mwayen pou anpes zot lekor. Pou protez sa bann defayans arrive. E olye senpatiz avek zot, nou konnen ki mannyer zenn i fer. Nou prefer gognard zot e fer sityasyon vin pli pir ankor.

Sa 3 fe Mr Speaker i se 3 fe ki nou bezwen viv avek e ki devan nou. E nou bezwen donk an fas avek sa 3 keksoz, trouv en mwayen koman en sosyete pou nou kontourn sa bann problemn e rezourd zot.

E Onorab Esparon in donn nou loportinite apre midi atraver sa Mosyon pou fer egzaktteman sa.

Mr Speaker, nou bezwen koman en Nasyon parey mon'n dir annan de fwa pran-pran nou responsabilite dan nou lanmen.

E nou bezwen menm an fas en sityasyon ekonomik difisil.

Menm ler nou asiz lo kote latab e ki Gouvernman nou konnen pe ganny difikilte pou fer zwenn son de bout, e ki'n dir nou pa met presyon ekstra finansye ekonomik lo Gouvernman.

Nou bezwen pran nou responsabilite koman Manm Lasanble e dir tel keksoz i nesaser, annou trouv le mwayen pou fer li e si fodre nou ava koup lo en lot keksoz ki pa osi nesaser. E se sa lapel ozordi mon krwar ki nou pe fer avek sa Gouvernman ler Mosyon i ava pase.

Pa tou dimoun ki pou aksepte lide deryer sa Mosyon oubyen son parol, oubyen son Mosyon li menm ki nou pou pase taler, ki pe demann – ki pe demann efektifman Gouvernman, sibvansyon en prodwi. *Basically that's what it is.*

Akoz nou pa kapab demann marsan pou vann son prodwi san en profi oubyen pou donn li. Pou fer vini, epi donn li. Alors i ava bezwen vin en sibvansyon ki Gouvernman pou bezwen pran an konsiderasyon e fer li.

Mr Speaker, mon annan en difikilte e mon krwar ki kekfwa nou kapab trouv en zis

milye. Mosyon i pe demann ki bann zenn fiy ek madanm. Bann fiy ek madanm ki napa le mwayen i ganny sa prodwi gratwitman. La mon vwar i annan en problem. Akoz lekel ki pou deside lekel ki annan le mwayen ek lekel ki napa le mwayen.

Donk i pou vin en difikilte, e mwan personnelman e mon konnen ki nou tou isi dan sa lasal nou mazin parey mwan. Mon pa kontan annan en sityasyon kot nou triye. Mon vwar li difisil pou aksepte ki i annan en serten kategori dimoun, ki akoz zot mwayen i pli ba zot pou ganny en serten diskriminasyon. Menm pa en diskriminasyon ki nou anvi. Me dan lafason ki nou donn zot en serten keksoz sa diskriminasyon pou la.

Whether i en goute ki akoz zot paran pa'n kapab donn zot en keksoz dan zot bwat. Zot pou bezwen al pran en keksoz ki en lenstitisyon in ofer. Oubyen en prodwi, oubyen en lasyet manze parey dan serten ka nou vwar. I fatig mwan sa. I fatig mwan.

E mon krwar ki nou bezwen elimin sa kalite diskriminasyon, menm en diskriminasyon pozitif Onorab, mon koleg lo lot kote latab.

Akoz si nou pe rod dan en serten sans en legalite, nou konnen ki legalite pa pou arive, me dan serten landrwa nou pa devret pe fer bann lenstitisyon ki kapab promouvwar Mr Speaker, en serten diskriminasyon menm si nou pa anvi. Menm si nou leker i dan en bon landrwa, menm si nou pe fer en keksoz ki byen.

Si avek sa i pou annan en divizyon avek en serten diskriminasyon, mon pa krwar ki sa ti ava byen.

Alors Mr Speaker, si nou pa kapab fer li pou tou dimoun. Kekfwa a dan en premye *step*, sa ki nou devret fer se dir bann ki pli nesaser. Bann ki pli bezwen se bann ki pa bann *wage earners*. Bann madanm ki travay, malgre ki sa i vin en *additional expense* pou zot. Kekfwa nou kapab dir dan en premye pa, bann ki travay zot *at least* kapab pey sa *extra expense*.

Me bann manrmay ki lekol, bann zenn fiy ki ankor lekol e ki napa en *wage* e ki bezwen depann lo zot paran pou zot ganny sa prodwi, mon krwar la i devret annan en sistenm. Pa kot nou donn, kot nou ofer sa bann prodwi avek sa bann ki napa le mwayen. Me kot nou ofer sa bann prodwi a

tou manrmay, a tou bann zenn fiy.

Les sa bann ki pa anvi oubyen ki pa bezwen, oubyen ki zot paran i kapab *afford* pou pey zot en prodwi siperyer *or whatever*. Les zot pa pran, me annou annan en sistenm dan bann lekol e pour kwa pa dan bann klinik ? Oubyen dan bann landrwa apropiye. Dan bann *workplaces* eksetera. Kot i ava annan en sistenm kot tou dimoun ki bezwen i ava kapab *access* sa bann keksoz tel parey on ganny dir ozordi.

Ki kapab *access* bann prodwi kontrasepsyon *free of charge*. Pa zis kapot, me pilil kontrasepsyon osi i tonm dan menm kategori.

Donk, mon krwar sa se en lekstansyon sa servis ki Leta pou bezwen trouve e fer en fason pou trouv le mwayen pou fer sa.

Alors, Mr Speaker avek sa detrwa parol, mon konpran kote Onorab Esparon, *mover* Mosyon pe ale. Mon konpran tou sa ki tou bann Manm i anvi vwar arive. Mon pledwari se ki nou fer li dan en fason ki soutenab.

E mon'n fer en propozisyon, mon pa konnen si Gouvernman i ava kontan fer sa distenksyon ant *wage earner* ek bann ki pa pe ganny anploye. Me *at least*

nou'n fer serten propozisyon kot nou kapab annan en sistenm an plas ki *provide* pou bann ki pa kapab, e ki fer li dan en fason ki pa diskriminatwar.

Si nou kapab ariv lo sa nivo e ki nou kapab met an plas en tel sistenm. Mr Speaker, mon krwar ki nou travay apre midi pa pou an ven e nou popilasyon deor laba. Nou popilasyon bann madanm ek bann zenn fiy, ava vwar en premye soulazman dan sityasyon ki zot in ne avek e ki zot pa'n demande pou ariv lo zot.

Avek sa detrwa mo Mr Speaker, mon oule asir loter Mosyon ki i pou ganny sipor lo sa kote latab, parey ki mon konnen i pou ganny lo lot kote latab osi. Mon remersye ou, Mr Speaker

(APPLAUSE)

MR DEPUTY SPEAKER

Mersi Onorab Georges. Avan ki mon donn laparol loter Mosyon. Mon krwar ki i en keksoz ki mon ti oule. Akoz mon'n ekout sa deba e mon oule dir sa 2 mo avek loter Mosyon, akoz mon krwar i enportan ki dan ou *summing-up* sa i sorti byen. Refleksyon ki *LGB* pe fer.

Parey in dir, pou asire ki travay ki nou pe fer la apre midi i pa an ven.

Akoz ler nou'n ekout bann entervansyon. Ki Lasanble ozordi pe demande. Ou Mosyon, mon'n sezi de fraz ladan ;-

'Prodwi lizyenn pou bann fiy e madanm i vin pli abordab e lot, bann fiy e madanm ki napa le mwayen pou aste i resevwar sa bann prodwi gratwitman.'

Parski dan bann entervansyon mon'n sezi poudir i annan sa zafer *profit margin* ki lo sa bann prodwi sanniter. Me nou konnen napa VAT lo sa prodwi. I ti enn bann keksoz ki'n ganny tire en pe letan pase i aparet.

Donk pou mwan, si nou pa sorti avek bann rekomandasyon kler, ki nou pou'n fer apre midi, nou pou'n senpleman fer en zes ver bann madanm. En zes en pe zantiy me selman i pa pou edekoup bann kou ki asosye avek sa.

Donk par egzanp si dan ou *summing-up* dizon ti ava en rekomandasyon for ki i ava annan en laliny bidzeter ki ganny *allocate*. Ki sa prodwi pou bann fiy dan lekol segonder, pos-segonder e Liniversite Sesel i gratwit. E i

dan en landrwa, parey *LGB* in dir, kot zot ganny akse avek.

Ouswa par egzanp ki i ava annan en proze spesifik ki *Caucus Madanm* i kapab zenn bann lorganizasyon parey *Caritas*, *Les Li Viv*, *Ladies Circle*, ki zot vin avek. I annan sa bann zafer *project* la kot Gouvernman, Minister Finans. E zot komans en pti *pilot project* pou regarde, pou asiste bann dimoun ki dan bezwen.

Nou kapab osi demande, swa ki Gouvernman i sibvansyonn bann prodwi. Parski en gran parti sa i vann dan sekter prive. Bann farmasi, bann laboutik prive ki Gouvernman napa kontrol lo la. Me nou konnen poudir i annan bann program kot Gouvernman pe sibvansyonn plizyer keksoz. *housing allowance* pou bann *returning graduate*. *Free Methadone* pou bann *drug addict*.

Nou'n tann koz lo program sereng. Mon pa konnen si in vin an fors. So, i annan bann legzanp ki sa i kapab ganny regard lo la.

Donk dan ou *summing-up*, ou kapab dir sa. Pour ki pou ed Egzekitif konpran sete ki lentansyon Lasanble ozordi apre midi. Si, mon'n dir sa bann parol, nou bezwen konpran poudir mon osi Manm

Elekte pou distrik Mont Buxton, ki annan en kantite madanm ki ti pou benefisyè avèk sa program. Mersi.

HON REGINA ESPARON

Mersi Mr Speaker. Mr Speaker, bokou keksoz in ganny dir. Me mon pou komanse par dir ki si *Ladies Circle* in vwar sa nesesite fer en petisyon pou ganny sinyatir pou demann Gouvernman pou get dan *welfare* bann madanm, e ozordi zot in ganny anviron 750 sinyatir, i montre ou ki laba deor i annan madanm e fiy ki pe fer fas ek difikilte pou ganny sa bann prodwi lizyenn pou zot servi tou lemwan.

Mon kontan ki Onorab Vidot i dir ofer sa servis atraver *Family Planning*. Sa i a osi en kontak ki sa zenn fiy a komans etabli ek son *Family Planning nurse* e letan ki i ava komans aktiv seksyelman, i ava alez ek sa *Family Planning* kot i a kapab ganny gidans e konsey pou protez son lekor kont lansentman anba laz, e kont bann lezot maladi transmisib par sex.

Mersi Onorab Kelly pou segonn sa Mosyon e pou donn ou sipor. Onorab Porice, mersi pou ou lentervansyon. Ou'n fer nou rapel ki mannyer bann dimoun aze lontan ti fer letan

zot ti napa sa prodwi. Me selman lemonn i evolye e sa sistenm pa pou tro marse avèk nou bann zenn fiy.

Mersi Onorab Lemiel pou ou kontribisyon. Ou'n byen dir ki Kenya in fer sa *survey*. Zimbabwe zot, zot ti fer resorti ki menm parfwa bann fiy ti bezwen servi zerb sek, kaka bef ansanm ek papye gazet.

Mr Speaker, mersi Onorab Jany pou ou kontribisyon, mon kontan ou'n dir ki nou bezwen regard ki fason marsan pe sarz bann dimoun. E sa i anmenn mwan lo en pwen, ki en msye ti telefonn mwan. Ti dir mwan poudir i ti aste en pake *pad* R30 pou son madanm.

Ler in aste sa pake *pad*, sa madanm in kontan akoz ti en bon kalite, zour i retournen pou al aste. Sa pake *pad*, dan 2 semenn in ariv R36. La lanmenm ler i fer ou vwar ki marsan pe osi servi sa febles pou sarz kliyan en pe enorm lo sa bann prodwi.

Mon ti ava osi kontan remersi tou bann msye Onorab ki'n donn zot sipor. Onorab Aglae pou bann pwen e refleksyon e pou ou sipor. Onorab Loizeau, pou sa bann bon pwen apropiye. Mon mazin en ou madanm i byen fyer pou annan en msye parey ou, e

ou fiy i fyer pou annan en papa parey ou.

E vreman nou konnen *panty liner* i annan bann madanm ki servi toulezour. Me diferans ant en *panty liner* ek en *pad*, ou napa swa letan ou dan ou peryod. Ou bezwen toultan pe annan sa *pad* pou sofgard ou e kit ou konfortab.

Onorab Sebastien, mersi pou ou sipor e sizesyon lo *dispenser* dan bann lekol. Mon krwar sa i en bon pwen, petet nou ava ganny sans pou nou elabor lo la en pe pli tar.

Onorab Georges, mersi pou ou sizesyon, me selman lo kote sa pti krentif ki ou annan, lo zafer si pou donn *free* dan lekol pou tou sa. Nou pou al angaz nou koman en *Caucus* Lasanble, pli tar nou pou angaz nou avek Gouvernman ansanm avek *Ladies Circle* pou nou regard ki pli bon fason pou apros sa size.

Pour lemoman vi ki nou pa ankor komans sa langazman ek Gouvernman, nou konnen Mosyon pa *binding*, se sa ki nou pou fer apre ki Mosyon in pase.

E mon annan dimoun ti menm sizere ki petet ankouraz atraver *school fund* pou servi larzan pou aste *sanitary pad*. E menm demann bann landrwa travay, bann gro biznes ki pe fer gro profi, pou ankouraz sa bann

biznes pou servi zot *SCR* pou donn bann travayer madanm. Met a dispozisyon dan bann landrwa travay oubyen pou donn bann madanm sa larzan pou zot kapab aste sa *pad* tou lemwan. Regarde dan bann lakonpanyen menm ki mannyer zot kapab fer.

Onorab Noline Sophola, mon kontan ou'n dir poudir kot *STC* i pli bonmarse. E mwan mon pou dir ou Onorab, avek sa *tight mark* ki Gouvernman pe mete lo *STC* pou fer sir ki napa koripsyon ankor, mon krwar ki petet sa i ava en bon keksoz, ki nou ava vwar dan sa direksyon ki i kapab desann en pe pli ba.

Mon krwar mon'n ganny tou bann pwen ki'n ganny fer resorti Mr Speaker. Mr Speaker, ou pwen se ki pour lemoman la nou napa keksoz tanzib pou nou dir nou oule fer sa, sa, sa. Ankor letan nou'n ava angaz nou avek Gouvernman e nou pou plan en *meeting* pli tar avek *Ladies Circle* pou nou fer, ki nou ava met sa bann pwen lo latap pou diskite e nou a gete kwa ki fezab e kwa ki pa fezab.

Me selman i osi bon fer resorti ki *average* en madanm la, letan i pe vwar son reg. Ant 13 a 55, ler i vwar son reg enn fwa par mwan i vin apepre 456 peryod dan son lavi. Lo kour

38an. E sa i *amount* to 6an 2 mwan dan son lavi e i ariv 280 zour ki sa madanm i vwar sonn regle. Alors sa nou vwar li i bokou e se sa pour sa nou pe donn sa sipor *Ladies Circle* pou ki zot kapab *attain* sa lobzektif ki zot in komanse.

Avek sa Mr Speaker, mon ti a remersi ou e mon ti a remersi tou bann entervenans. E laba deor mon pe remersi tou bann msye ki pe donn sipor zot madanm, ki pe ede letan zot madanm i bezwen *pad* e bann ki pe *provide* pou zot bann fiy. Mersi.

(APPLAUSE)

MR DEPUTY SPEAKER

Mersi Onorab pou ou *summing-up*. Donk in ariv le moman pou nou pran en vot lo sa Mosyon. Alors tou bann ki an faver, zot ti ava endike silvouple. Mersi, okenn Manm ki kont?

Donk vot lo sa Mosyon, zis pou rapel piblik. Mosyon pe demande ki sa Lasanble i demande ki Gouvernman i komans en demars pou fer ki bann prodwi lizyenn pou bann fiy e madanm i vin pli afordab.

E ki i angaze, i angaz li lo en program pou asire ki bann fiy e madanm ki napa le mwayen pou aste i resevwar sa bann prodwi gratwitman. 26

Manm in vot an faver, okenn Manm pa'n vot kont e okenn Manm pa'n *abstain*. Donk sa Mosyon in ganny aprouve par linanimite.

(APPLAUSE)

MR DEPUTY SPEAKER

Alors sa ti nou dernyen *item* lo nou plan travay pou la apre midi. Nou pou *adjourn* e nou ava re pran travay demen bomaten avek Mosyon LGB lo Bidze Siplemanter. Mersi.

(ADJOURNMENT)